

綿津山人

詩集



綿津山人集者牧仲宋先生自名其前後所為詩也先生以文康公冢子自少蘄然頭角綽有聲譽其稍長也以侍衛往來殿庭交戟之內進則長楊校獵宣曲馬射未嘗不扈從其間為



世祖所識賞退而侍文康公側賓接名公鉅卿熟習其言論風指耳濡目染用是鍊達累朝以來典故之沿革文獻之盛衰所以資其見聞者既至既而從事宦游南臨江淮北俯碣石所過名山大川長林峭壑無不往探古今金石之刻鼎彝之器經

史百家之學以訖法書名畫無不採覽隱逸之谷
耆舊之廬與夫四方騷人寓公之所在無不延訪
而折節所以拓其胸次而陶育其性情者復久且
深其志愈充其氣愈下於以發爲詩歌其長篇雄
變如蛟龍之幻化其短章秀傑如珠玉之瑩潤甚
至聯句角勝則寫難狀之物而吐難言之情如傾
江倒河益注而益不窮洵乎其才之高學之宏而
養之裕也吾聞之也非才不足以應猝非學不足
以馭才非養不足以蓄所學若先生之爲人固已
光明而峻偉博大而醇深及其達於政事也廉而

不劇嚴而不苛拊循吏民煦煦慈愛而不失之姑
息當其涖吳僅四閱月耳裁決簿書勾稽金穀往
往至丙夜雖精銳少年不敢望一二老奸宿蠹俯
首側足亦率不敢旁睨攷其設施詩歌特先生之
餘緒也顧輒以其間與賓客置酒贈答方揖讓笑
談之頃落筆如風雨他人未及構思而先生則數
百言立就矣苟非賦才之高而又佐之以學深之
以養必不及此夫豈屑屑焉摘章續句僅以詩人
自矜者所得而侔哉昔文康公以漁陽開府進登
宰輔今先生繼之復開府江右出爲股肱之臣入

必爲心膺密勿之佐遭時遇

主紹揚前休行且以賡歌諸什被管絃而施郊廟
當有數倍於此集者譬之五星之麗天芒寒色正
方與日月齊曜寧特於文康公有光而已先生出
此集命余序之余衰朽無似豈能窺見著作之原
委姑述其梗概云爾且以爲別康熙二十七年夏
五長洲汪琬謹序

康熙戊辰夏宋中丞牧仲先生奉

特簡來撫西江操冰飲蘖飭紀詰戎未匝月而百
政就理國以無事先生乃乘餘暇檢其生平所爲
詩刪而合鐫之爲綿津山人集若干卷屬於榛曰
吾昔汨於習聞雙江以後始有新機子其爲我審
去留焉對曰榛不知詩然見夫種樹者矣方其亭
亭初植雖一病葉不忍摘久之而繁枝芟焉又久
之而岐幹斲焉迨閱歲年之多虬龍盤於雲煙鱗
甲張乎風雨蒼然而愈老翠然而彌新望以託其
蔭樾者無遠邇也而顧使樵斧臨之丁丁以傷其

尺寸則貽人之恨惜者何窮乎予初讀先生嘉禾堂集二百版今則存四十餘章何芟其繁枝之多耶繼讀先生將母樓詩亦百版今則存九十餘章是其岐幹之斲又不遺餘力矣至於雙江以來吐雲煙之曾驚風雨之筆天下之老境盡於是天下之新色亦盡於是而予敢復提區區之柯睨於其後哉且夫古今之詩凡幾變矣苟無人焉以正之則必日趨於衰而不能返近世厭寒鴉枯木之觀而飾宮柳宸楓之氣象以爲大雅在是也然朝華旣披而不知朽株相守而不厭幾以在我之止義

發情爲他人之妝枝綴葉極其至而似唐似宋亦不過隋宮之剪綵被樹豈復有天地生生之新機乎先生之詩華榮而實茂質古而色鮮蓋閱歷於著作之林積有歲年故森森乎叅青天而直上然則正風雅之趣而樹標表於海內端惟以先生爲底柱焉榛亦復擲斧拋斤自養其萌蘖之生以希成材於萬一培之滋之先生當不我棄也雖然正斯世之趣又寧無先於聲詩也哉同里劉榛拜序

古竹圃稿序

孟津王 鐸撰

公卿大夫之子弟蹋鞠擊劔按瑟飲燕而已商丘
牧仲獨不相從何也其迂疎不近人情耶其握算
持籌而求厚實耶若然則牧仲即杜門擁膝耗日
磨月亦何以異於蹋鞠擊劔按瑟飲燕輩哉蓋牧
仲學書學詩學經生應制義而詩受鑄於唐音調
清新範我馳驅游意乎無窮之次方頷頷焉奚暇
蹋鞠擊劔按瑟飲燕以及握算持籌爲耶迹而視
之下簾靜居即謂之迂疎不近情也不亦宜歟牧

仲勗諸不貴與人爭一旦之名而臧修潛德千秋不朽之業具見於此牧仲僅僅一能詩之人也耶

古竹圃稿序

同里侯方域撰

自梅聖俞爲詩而歐公序之有窮然後工之論於是凡天下放廢無聊之人方外遊旅之士莫不自託於歌吟聲咏之間沾沾以爲能即有身世通顯者考其著作亦多矯情曲意務欲叩寂寞之音繪幽憂之狀蓋所謂和平者難工而愁嘆者易好沿襲彷彿莫之易也吾少而學焉亦以歐公之論爲然最後讀宋子古竹圃詩乃知歐公之序聖俞特有所寄寓感慨以求工其文非定論也宋子之詩

神蒼骨勁格高氣渾舉當世數十年爭喙學步之病一切空之直由盛明接於盛唐固幸爲之於論定之後易去其回惑而得旨歸吾則甚服其冲融大雅油然悠然從容自適而工者自莫之及未嘗有孤臣寡婦之怨悲鱷魚鵬鳥之稜怪引藉爲激壯也蓋宋子生於卿相之家又少年即膺勲命常從

天子左右歸而讀書自命尤自奮發攀躋於古作者之林未見其止固宜其詩之浩落而足猶矣嗟乎吾少時所遇自謂不減宋子未幾流離於兵戈

之餘所至見錮坎壈抑鬱者幾二十年殆無異於歐公之所謂窮而且老然而爲詩卒不工何歟豈非人之材分有限不能工者雖窮亦不工能工者不必窮亦工耶以余之泯沒甚愧其窮而不工幾使歐公之言不信賴有宋子之不必窮而工者叅証於其間庶足釋余之慙而歐公亦不必信其言矣夫天下剝復乘除皆有成數昔之兵戈之運流離之禍余不幸當之亦已往矣則今日幸見太平爲之導豫而鳴盛所謂作爲雅頌薦之清廟以追商周魯頌之作者必宋子也嗟乎宋子之詩之工

固終不必有藉於窮然而其不窮者豈非各有其時哉宋子歌乎吾猶願爲宋子和焉

嘉禾堂稿序

芑山張自烈撰

逞余由友人賈靜子侯朝宗二子知宋子牧仲一時名碩士頗推牧仲少好爲詩詩輒工牧仲由二子稔知余然兩人相慕不相見也見牧仲則始今年已讀牧仲近詩侯賈二子皆有序余乃益嘆二子知牧仲雖先余余之知牧仲蓋不待相見而後窺其能詩也牧仲生長著姓甫髫從諸顯貴人遊顧獨亡流俗嗜好日覃精詩古文氣志誠有大過人者詩自五言洎七言感事賦物庀材樹軌往往

與古合其後先爲侯賈二子所喜可非誣也夫今之號能詩者豈鮮哉迨跡其外腴中瘠類出入竟陵它險譁誹諧去古遠甚率三百篇螟螣耳惡足與牧仲較軒輊藉牧仲由斯進求之視近詩宜益工又非雷如侯賈二子所喜可而已雖然余聞牧仲先世莊敏公富理學家言諸所攬摭足翼經傳者非一牧仲苟能於工詩之暇紹聞典訓出而仔肩守待度牧仲不徒以詩著稱即余豈僅以能詩盡牧仲余願牧仲之無忘先澤也抑亦牧仲之志也况標季頽靡儒術陵缺識者思踵領恐後今朝

宗即世而靜子恭士諸人與牧仲雅數晨夕雖以倡明正學無難崎嶇如余矢絕諧際然極竭翬翬振揚關閩濂洛不遑暇此志未嘗斯須忘也牧仲歸而與靜子恭士謀得無蹶然興乎哉若夫詩教升降之自公安得失之辨暨牧仲之詩之工侯賈二子旣詳之余弗論獨余撫今愴昔有倍蓰於朋友之離合風雅之盛衰者余因序牧仲詩而竊有感也然則余始終期屬牧仲者深遠矣

將母樓稿序

婁東吳偉業撰

往余在京師從大司農歸德侯公以盡交宋中諸賢諸賢方以雪園文社相推許公仲子朝宗遇余特厚無何寇事作朝宗以其家南下一再見於金陵於吳門出其文所為二三同志作傳則皆不免於兵余爲之歎歔太息不忍竟讀已而酒酣抵掌劇談海內奇士輒又躍然起曰吾雪園近有年少軼才若之所未見者爲宋君牧仲牧仲相國文康公之子也相國彙官給諫時識余比余再入京師

相國久致政歸中州人稱牧仲者不容口朝宗之言益信余心嚮慕之又十數年牧仲通守黃州文章政事有當官聲因吾弟聖武爲蘄水丞哀其詩累百首以書寓余而朝宗亦已亡矣嗟乎甚矣余之憊也回首三十餘年舊遊恍如夢寐才如牧仲生平所願見者遠在江山千里之外焉得而與之遊乎牧仲顧猶不棄而索其一言余乃爲之序曰春秋魯僖公九年弦子奔黃十二年黃人不共楚職二國尋折而入於楚其地即今黃州之境楚之所以強者以其兼并江黃故能東向以爭盟長自

漢以降蘄黃實爲江淮門戶明季盜起其民罔有子遺迄於今流移未復瘡痍未起君子問其俗攷其風未有不爲之興懷隱惻者也商頌殷武之章曰撻彼殷武奮伐荆楚深入其阻次章曰維女荆楚居國南鄉莫敢不來享莫敢不來王夫殷道未衰楚人先貳高宗奮六師行撻伐深入其險阻始克有濟余以爲此必非荆楚盡叛之也楚莊王二年庸人率羣蠻麋人率百濮以謀楚楚人出師自廬以往振廩同食七遇皆北而後王卒會于臨呂子越自石溪子貝自仞遂以滅庸然則殷高宗所

捷伐者乃羣蠻百濮之屬以其欽寄林莽非搜討不能成功詩人所謂采入其阻也夫古之庸濮今之鄖房

國家光啟南服而西山餘黨連戰乃克牧仲官於楚將作饒歌以紀武功庶幾來享來王之盛比諸商頌之咏湯孫罔有加焉雖然楚人以餽餉之艱故紀其振廩同食以見爲役之不易今自黃達鄖二千里方事之殷民之轉運而死者不知紀極呻吟痛惜之聲至今未改也牧仲之於詩也其有恤人之心哉余按夫黃人之所艷稱者莫過於蘇子

瞻氏當是時宋有天下已踰百年其去用兵之日如孫曹爭戰者蓋已久矣月明星稀烏鵲南飛子瞻所流連興感者乃不在乎江山景物此風人之旨其所寄託者遠也牧仲宰相子生長兵間目擊乎梁宋亂離蘄黃糜爛生民之脫鋒鏑者曾幾何人豈知一旦官於其土江樓嘯咏爲今日之勝耶夫勞止之歌瑣尾之歎詩人所不容已者余故舉其流風遺俗以告牧仲庶幾休養生息聲施乎江漢非徒以其登臨才藻媿美昔賢而已若夫臨臯之館快哉之亭風帆沙鳥煙巒雲樹此牧仲攬之

有餘而黃亦余所舊遊也雖老尚當隨牧仲之後
從而賦之

雙江倡和集序

蓄川高珩撰

日在京雒緇塵中恨無純灰十斛濯之忽而排神
御氣鬱孤臺畔吐納清流冷然善也則牧仲以雙
江集示我云甫展卷即見一絕云鈞翰鳥語去仍
還雲樹雙江起暮寒自笑遊踪逐坡老十年前亦
宦齊安因憶十年前與牧仲夜泛楚江釃酒赤壁
之下俯仰千秋江山如故顧謂牧仲曰昔子瞻慨
慕樂天故亦自署東坡君復半刺于此將無爲介
甫安石之爭乎相與大笑而起頃覽諸君子之序

斯集也或云得江山之助或云爲江山生色言固
不誣適有客在座笑謂予曰子無昔人之文藻風
流而亦怡然扁舟無乃唐突西子乎予解之曰否
否子瞻賦中江山風月之語固有餘義可引伸也
夫江山風月與蘇子諸客皆先儒所謂太極多却
一動留此紛紜耳然旣在大化之中遊衍今古茫
茫傳舍迭爲主賓則江黃未分茅土以前漁父樵
人私爲湯沐固已久矣漁樵能不自私數千年後
公之孟德公瑾又數百年而公之元之子瞻及牧
仲與余余固漁樵之倫也江山風月又忘情而體

道者也是以英雄鵲起文章輝映而未嘗見多漁
唱樵歌寂歷荒寒而未嘗見少則牧仲與予皆有
欲炙之色又奚不可至牧仲與山水殆有宿緣甫
解齊安之綬旋權章貢之關夫造物者無乃瓜分
漁樵之湯沐而供其綵筆乎今長吟諸什如姑射
仙人淖約冰雪此真得助于江山而又能爲江山
生色者也雖然予將更有問焉古來山水情深者
多矣而慧業文人可以生天作佛則有謝靈運在
宰相之子再致台鉉能以奇功報國則有李衛公
在牧仲將何從乎恐衡山芋火未能便淡金紫也

雙江倡和集序

新城王士禛撰

詩三百篇於興觀羣怨之旨下逮鳥獸草木之名無弗備獨無刻畫山水者間一有之亦不過數篇篇不過數語如漢之廣矣終南何有之類止耳漢魏間詩人之作亦與山水多不相及迨元嘉謝監始創為刻畫山水之詞務窮幽極渺挾山谷水泉之情狀昔人所云莊老告退而山水方滋者也宋齊以下率以康樂為宗至杜子美韓退之皮日休陸龜蒙之流正變互出而山水之奇怪靈闕發露

且盡若其濫觴于康樂則一而已矣虔州當閩楚
百粵之會挾雙江之奇爲東南山水最勝處牧仲
先生奉

命視權其地值閩粵湖南初定之後爲政清靜務
與商旅休息放衙無事時時與客登高望遠形爲
歌詩又其邦之高士彭君魏君輩遯跡金精山中
先生皆能致之相與流連倡和至于扁舟數千里
所過匡廬九子彭蠡落星諸勝莫不畢見於其詩
盛矣哉古未有也今讀倡和集有二謝有杜有韓
有皮陸有西崑又有元白有張王樂府蓋山水之
奇秀至先生而發露無餘而康樂以還諸家之體
製亦至先生而綜括無遺憾矣自用兵以來贛石
烽燧達章門者數載一旦得先生巨麗之筆爬剔
而洗濯之豈非西江山水之幸乎哉余旣爲評次
之而爲述其梗概如此

雙江倡和集序

汪琬撰

贛西瞰交廣東達汀漳輪楫之所銜尾商旅之所
駢跡其形勝冠於嶺北控峒摩天章貢激石前賢
稱其有涌翠流虹之勢加以層巒回互諸泉淙琤
魚鱉之饒草木竹石之麗衣冠文物之繁此皆采
風者所不得而遺也商丘宋子牧仲往持使者節
治權於此旣已拊恤估人俾大和會及其聽政之
暇則又偕賓從子姪極風流好事之致敷茵坐花
飛觴醉月弔鬱孤之故墟訪八境之遺址流連翰

...

墨倡酬交作往往散華落藻探奇角險能使覽之者目駭誦之者神奮以是阮亭王先生評其詩曰有少陵有昌黎有西崑又有元白有皮陸又有牧仲所自闢譬若萃千腋以爲裘合羣琲以爲佩庶幾無美不臻者矣及予受而卒業則又嘆牧仲所以臻此者非徒善於取材而工於摹古也實得江山之助多焉予老矣才竭而思窘不能爲牧仲盡和斯篇姑贅數語於卷端以志向往云

雙山詩集序

回中集序

康熙二十年三月

仁孝

孝昭兩皇后梓宮將歸寔于昌瑞山維時

萬乘臨送八神開蹕會

皇上有事于

孝陵王公宰相而下扈從者凡若干人羽林飲飛

之衆震耀山谷皇哉一代之鉅典也比部員外郎

臣犖祗役其間歸而輯其道路往返之詩若干首

曰回中集以視國子祭酒

臣

士禎讀之終卷乃作

而嘆曰嗚呼

聖朝孝治之隆

兩宮徽音之美

昭代典章文物之盛胥備是矣

是不可以無述者也

臣

犖少以相臣子侍衛

世祖皇帝嘗冠鶡冠從豹尾出入陛楯之間甘泉上林羽獵遊幸未嘗不從洎

世祖龍馭上昇犖亦一麾佐郡浮湛江外積有歲年今者瞻望橋陵傷懷弓劍撫日月之易逝悲攀髯之末從其哀慕宜有過人者又其先臣文康公昔以節鉞填撫茲土旋乃登庸九戩之思東人未

沫犖始以羈貫之歲趨庭于此今白首爲郎復以王事于役山川如昔風景不殊距其先臣建節之年俛仰之間忽一世矣語不云乎邇之事父遠之事君三百五篇大抵皆忠臣孝子之所爲作也讀回中集爲之感動流連不能已已如見古忠臣孝子之用心焉其亦無愧于風雅之義耳矣夫離騷之於君非不忠也然而其詞懟伯奇之於父非不孝也然而其詞傷彼皆不幸而值家國之變者也斯集也其猶得風雅之正歟若其紀山川備掌故論世者皆宜有取焉不具論論其大者濟南王士

禎頓首拜手謹序

其信則好言不棄而直者固之變者也
其信則好言不棄而直者固之變者也
其信則好言不棄而直者固之變者也
其信則好言不棄而直者固之變者也
其信則好言不棄而直者固之變者也
其信則好言不棄而直者固之變者也
其信則好言不棄而直者固之變者也
其信則好言不棄而直者固之變者也
其信則好言不棄而直者固之變者也
其信則好言不棄而直者固之變者也

聯句集小引

康熙庚申冬偶讀韓孟聯句詩遂與諸君子效之
矜新鬪險嘗刻燭至丙夜無何高念東先生曹實
菴舍人去此興索然矣今檢篋中得若干首蓋旬
日間豪況若此梓而傳之知十丈塵中尚有閒情
如我輩也犖識

西山倡和詩序

王士禎撰

今日論古文率推侯朝宗第一遠近無異詞顧朝宗不工於詩如唐之皇甫持正宋之李泰伯蘇明允盡然未足爲朝宗多憾也牧仲先生與朝宗同里同時獨專攻詩昔人論琴謂初下指一聲不合即終身無復合理牧仲之於詩蓋其天性合耳黃州以前尚守而未化虔州以後每變愈上今所傳雙江回中諸集是也諸集余皆爲之序論讀西山倡和詩復爲跋尾如此要之朝宗之文牧仲之詩

自當抗行中原梁園風雅自鄒枚莊忌夫子之徒
于今爲盛矣後有識者其以予爲知言也夫

西山倡和詩序

同郡湯斌撰

宋子牧仲遊西山歸示余詩一卷而屬爲序余謂
山水文章恒相因也謝康樂赤石麻源諸詩岡嶺
谿澗松竹猿鳥讀者歷歷如見元次山道州諸詩
柳子厚柳州永州諸記亦然獨怪終南去京兆爲
近唐世號多詩人遊南山詩彷彿康樂元柳者殊
不多見也豈士大夫身處京華日僕僕緇塵遂不
暇窮山水之勝與抑或縈情圭組不能心跡雙清
雖遊而詩亦不工與牧仲官西曹稱繁劇更盡心

職業嘗爭疑獄數大案似不暇游又清羸善病而
於休沐之頃呼朋攜子極登臨之樂其詩與康樂
元柳不必盡同要之蕭閒澹遠無長安貴游繁囂
氣習披覽一過煙雲杳靄繚繞几席間信牧仲於
山水文章有深情也余入京師且數年埋頭史局
忽忽無意緒每薄暮下直信馬垂鞭望西山暝色
輒凝目久之而不果一往今序牧仲詩余滋媿矣

嘯雪集小引

余自官通潞以來文案鞅轡吟情不屬每當歲杪
鎖印始偕賓朋觴咏然猶時苦酬應得詩不過數
首歲庚午臘於豫章官舍又值鎖印數兩大雪迨
燈夕尚封三逕中間人事屏絕戛然清嘯如在深
山計得詩廿有一首名曰嘯雪將寄故園諸子知
我裏章束帶依然平臺風味也犖識

廬山詩序

廬山之勝至淵明慧遠始著遠常倡蓮社於山中
好事者圖之世傳匡廬十八賢圖是也鮑照陰冰
實夏結炎樹信冬榮謝靈運晝夜閉日月冬夏共
霜雪要是廬山警語唐宋以來詩文爲廬山重者
李太白白樂天周茂叔蘇子瞻朱元晦明則王伯
安李獻吉六七君子耳嗟乎自淵明至今山遊者
日千百人亡論已其間文章之士作爲詩歌深鐫
大刻欲與茲山爭不朽者何限而千三百年間剝
泐頽仆於樵斤牧礪風霜野火之餘亡一二存者

廬山詩序
廬山之勝至淵明慧遠始著遠常倡蓮社於山中
好事者圖之世傳匡廬十八賢圖是也鮑照陰冰
實夏結炎樹信冬榮謝靈運晝夜閉日月冬夏共
霜雪要是廬山警語唐宋以來詩文爲廬山重者
李太白白樂天周茂叔蘇子瞻朱元晦明則王伯
安李獻吉六七君子耳嗟乎自淵明至今山遊者
日千百人亡論已其間文章之士作爲詩歌深鐫
大刻欲與茲山爭不朽者何限而千三百年間剝
泐頽仆於樵斤牧礪風霜野火之餘亡一二存者

梁蕭統南唐李煜且不能有是山也矧下此者與
然而六七君子之名特重者詎不以其人與壬申
秋漫堂先生自江右移撫吳泛舟彭蠡攜衲子宿
應超淵山人羅牧訪白鹿洞尋栖賢三峽開先諸
勝得古體詩六章既刻石開先寺復命蘅序蘅以
謂公之名垂廬山者當與六七君子同不朽蓋不
獨以詩重也羅山人故善畫惜未能爲之圖與蓮
社並傳然而後世誦公詩一時文采風流具可想
見畫之有亡無足論云門下士毗陵邵長蘅序

廬山詩集

綿津山人詩集目錄

卷一

古竹圃稿二十二首

卷二

嘉禾堂稿四十首

卷三

柳湖草十九首

卷四

將母樓稿上三十九首

卷五

將母樓稿下五十二首

卷六

和松菴稿五十首

卷七

都官草三十七首

卷八

雙江倡和集上七十四首

卷九

雙江倡和集下五十四首

卷十

回中集二十一首

卷十一

聯句集六首

卷十二

西山倡和詩三十六首

卷十三

續都官草六十三首

卷十四

海上雜詩二十六首

卷十五

漫堂草三十三首

卷十六

漫堂倡和詩二十二首

卷十七

漫堂草五十四首

卷十八

漫堂草三十二首

卷十九

漫堂草四十九首

卷二十

漫堂草四十八首

卷二十一

嘯雪集二十二首

卷二十二

漫堂草七十三首

卷二十三

漫堂草二十七首

卷二十四

廬山詩六首

綿津山人詩集卷一



古竹圃稿

商丘宋 犖牧仲

擬古五首

鳳凰覽德輝羽翼昭文章五雲橫清漢千仞恣翱翔梧桐始一棲竹實始一嘗秉身既有德豈在荆棘傍紛紛鷄與鶩徒知謀稻粱

人生宇宙間譬若地上蓬飄搖無根蒂到處隨天風莊周古達士栩栩觀無窮一身忽變化萬事孰要終飲酒被紈素長嘯脫樊籠

欽定

城東桃李樹菲菲向春開須臾霜露至枯萎等蒿
萊李斯感倉鼠置身宰相臺削法要始皇聲施震
八垓無何下獄吏坐使骨肉摧上書不得奏熱燄
同寒灰

白日既西沉明月復東舉俯仰天地間蒼茫變寒
暑朝槿耀華滋蜉蝣念儔侶萬類自紘紘倏焉何
處所安得飲菊潭煙霞任容與

驅車出宋城乃過梁王臺臺上青草生臺下黃河
來歌舞既已沒鄒枚安在哉徘徊日終夕洒淚空
悲哀

齋居

窮秋風雨積茫茫失昏曉擁被卧匡床簷前嘒孤
鳥披衣啟蓬戶千林忽如掃黃葉滿堦除菊華亦
已槁紫蘭落其英飛蘿尚嫋嫋顧此歲云晏抑鬱
傷懷抱空簾閉幽獨遺編恣探討今古兩難名寒
窓盪叢篠

空城雀

空城雀聲啾啾羣飛往來求其儔蓬科有子壕有
水朝夕飲啄樂無已慎勿飛向人家裏少年挾彈
子兒童把黏竿人家待爾供盤餐嗟哉爾雀百憂

攢

駕出

北極臨朝肅南郊享帝誠千官迎御氣萬姓仰天
行析羽文旌抗鳴鑣禁籞清小臣觀大禮拜舞賦
初成

駕入

郊圻廻玉輅城闕引朱旗扈蹕天街肅鳴鐘大內
知雍容周禮樂踰濟漢威儀鷓鷯呼嵩罷卿雲繞
殿墀

賜宴

執戟趨丹陛雲霄侍禁鑿仗前朝賜坐苑裏晝傳
餐醕醑黃金椀櫻桃赤玉盤承恩歌湛露獨有近
臣歡

大獵

講武 天王事觀風 聖主心三驅寬肅殺八駿
鄙荒淫龍幄留中野霓旌出上林飲飛隨衛士夙
昔荷恩深

古廟

峻嶒古廟坐荒岑神鬼森羅玉座深畫壁旌旗間
自動雕簷松柏晝長陰行人十里聞鐘至怪鳥三

更入戶吟欲問何王香火地螭碑零落土華侵

天河

萬古秋霄上迢迢一水橫光涵星宿小影帶月華
清灑氣通滄海餘波洗甲兵年年鵲橋渡牛女可
憐情

送里人南歸

幾日烽烟息天涯君獨歸且消今夜酒去掩故園
扉臺圯黃河逼村荒紫蕨肥吟詩倍惆悵心逐片
雲飛

戚家堰

遠樹重重雜暮烟荒灘流水自潺湲漫言此地行
人少解甲歸農始二年

東村刈麥同侯朝宗賈靜子賦

五月東村麥芄芄沒壠高因風翻廢圃過雨亂平
臯官帖儲胥急田歌銍艾勞永言勤力作庶此慰
嗷嗷

過北莊四首

凌晨天氣佳策馬荒城下一徑度陂塘泉源自傾
瀉菱葉靜如拭荷花秀堪把迴溪鳥語多近岸人
踪寡縱目碧煙深嘉禾盈四野

雨意有無閒隨風倏以至喜茲土氣香何惜露衣
袂捎捎林表疎灑灑田間細雲脚指顏岡雷聲出
古寺白鷺遠更明黃鸝濕欲墜道傍有孤槐枝葉
相虧蔽下馬雜地坐斑白與童穉話言固無倫樸
直亦可對所願歲功成一朝償積稅

雨後耳目清幾處鳴蟬聒逶迤到荒村田園慰飢
渴我屋八九間軒楹對空濶卧起遂移時憑几進
粗糲俯仰愜初懷吟咏得開豁朱槿綴籬邊青藤
纏木末桃李何離離瓜實亦堪掇地偏勝事收心
遠塵緣割寄語市廛人樊籠自可脫

振衣陟林丘曲徑任吾取有廟峙其巔蕭然見環
堵鳥雀聚几筵牛羊散廊廡碑圻古篆文年代誰
能數再拜一眺望微陽正亭午豆葉碧連雲黍苗
青映土農事信可悅躬耕詎云苦攘攘走兒童前
村喧社鼓

歲暮

臘雪看將盡庭花漸欲然滿城春酒熟共擬醉新
年

落花

昨日花簌簌今日日落如掃反怨盛開時不及未開

好

綿津山人詩集卷一終

二八二

林池採蓮

青烟土裏平許口郊漢採蓮云苦難對去兒童前

銷燬再耕一湖望對對五帝千古葉寧與雲香苗

散鳥雀巢八鼓手羊燒瓜熟平我古葉文千古

好意想林五曲野對吾年亦應和其巖蕭然具

綿津山人詩集卷二

商丘宋 犖牧仲

嘉禾堂稿

蚤過東村

凌晨發逸興策馬背荒城平原何膾膾秋色殊空
明疎雨夜來過林壑被餘清茅茨相因依蒼蔚藏
柴荆已喜塵鞅隔况聞好鳥鳴披襟話野老愉悅
盪心情攘攘市廛內無乃喪吾生緬彼堯花源永
言羨躬耕

曉起

曉起元坐南軒前物華滿目相新鮮海棠斑斑紅
點地栝栢鬱鬱青參天屋上鳴鳩亦何意籬邊戲
蝶真堪憐十日五日望雨急喜爾雲氣來飄然

過孝烈將軍廟卽木蘭

孝女從軍尚有祠斷垣荒砌碧苔滋鐵衣共訝寒
光動玉珮休憐冶步遲幾處清蘋羞錡釜三秋皓
月照呆愚渦河野岸經行處漫詠當年樂府詞

宿州道中相傳州有盜黠祠

故國辭梁苑孤城問宿州驅車岐路遠到眼亂山
稠塔廢巢雙鶴渠荒下片鷗東陵香火在試問欲

何求

過鳳陽

廢殿今猶在祠官久不供牧牛來豎子棲鳥失長
松日抱蒼崖遠雲流碧澗重興朝忠厚意隧道
有人封

夜發大山舖至關山作

夜發大山舖西南陟諸嶺崖谷將萬轉山木相與
永殘月在林端層層散清影激流趣不稀躋險心
猶逞白芷映紅榴青蒲交翠荇行矣復停輿晨光
忽耿耿何處子規啼回頭得深省

瑯琊寺

數里環蒼翠山門轉折多佛樓橫澗底講席峙巖
阿細雨斜侵竹長虹晚入河到來清興發絕頂自
高歌

歸雲洞

不盡登臨興新晴肯遽還側身山谷裏捫葛洞門
邊石乳時時雨松陰處處烟黃昏仍倚杖片月向
人懸

楚江曲

楚江來湯湯瞬息已千里明月在遙天清光散江

水揚舲鼓枻欲何之今夜鄉心只自知側身北望
風吹袂江水東流明月西

江南曲

采石江頭日欲曛誰家遊女出紛紜不知太白宮
袍色可似今朝六幅裙

咏史二首

吾觀曹參相英偉有竒抱攻城與野戰氣象凌蒼
昊一聞蓋公言刻意遵黃老去齊語代者獄市并
容好及其登朝後酣飲忘昏早歌呼和羣吏中懷
何浩浩守成無異術清淨以爲寶史遷贊匪誣極

言能合道寄語功名人鋒稜亟須掃

古之恭謹士乃推萬石君躬行感人主舉家盡欣
欣惟建稱克肖遇事展殷勤退朝入子舍手浣親
中裙慶也稍簡易數馬有令聞雖曰天姿厚亦惟
和氣熏千秋讀遺史藹然接清芬嗟哉世儒輩務
華徒虛文

偶成

寒風胡烈烈過我亭前樹中夜猶未息羣動相喧
呼黃黃者菊華摧殘亦非故況復百卉零豈敢怨
霜露

贈無可大師

無可公無可公三年住錫雨花臺江聲背郭聞茅
宇月色銜山照徑苔毒龍欲制渾閒事坐對孤雲
去復來

夏日同杜于皇康小范陳伯璣董文友倪閻
公過高座寺訪無可大師復至萬松菴訪張
爾公吳漢若即事有作

凌晨結伴出長干雲白山青野望寬花雨高臺聞
遠磬松陰曲徑覓幽蘭六朝興廢從誰問一代風
流接席看欲刻新篁留姓字茶烟輕裊夕陽殘

烏江

落日烏江繫小船
拔山氣勢想當年
一間古廟荒烟外
野鼠銜髭上几筵

題胡循蜚畫石

素壁陰森翠幾重
卷然削出玉芙蓉
知君不盡西湖興
特寫飛來第一峰

贈汪孟初山人

石耳山中七十翁
往來梁苑鬢如蓬
可憐大有吟詩癖
一日新篇滿一筒

送郭卧侯給諫還白門

承恩給事新歸沐
此日褰帷雪正飛
梁苑可能留賦草
江鄉未許戀漁磯
十年河決民勞急
千里屯荒廟算違
一路瘡痍堪灑淚
重來肯使諫書稀

西風

一夜西風急
間門落葉稠
青烟收曠野
白日媚窮秋
鴻雁歸應盡
芙蓉晚故留
無端悲節序
惆悵向林丘

寄胡循蜚

忽憶西湖客
端居歲月淹
波光連小苑
山色滿虛檐
鬪箸尊絲滑
彈箏玉指纖
何時能過訪
賦筆許

同拈

送胡去驕七十四韻

先子晉綸扉乃在丙戌歲賤子藉餘蔭觀光太學
內時維童子年碌碌隨流輩君家先學士適踐司
成位師道煥然明端居垂訓誨講學似昌黎斯文
未終廢諸生荷鈞陶賤子破愚昧正如草木生因
人得灌溉持此感至德終身矢不匱無何歲月遷
彼此忽異地回首嘆猶龍中心徒憤憤辛卯夏五
月先子遂勇退未成綠野遊已見墓門閉嘆我失
怙兒常懷負笈志嗚呼壬辰冬師也復長逝造物

何冥冥吾道任凌替痛哭向昊天形容日顛顛狂
與阮籍同貧豈原憲愧去去向京華孤身歷幽薊
宮闕鬱嵯峨遠近相虧蔽桂棟映蘭橈臨風何綺
麗奔走九陌中詞賦成嫚戲丁酉孟秋月與爾倏
然值夙昔未相逢一朝快把臂不遑問出處先自
述家世四目如湧波各灑終天淚泣罷乃還歌斗
酒竟沉醉俯仰天地間身名貴自致鸞鳳卽雞鶩
駑駘亦騏驥萬事無端倪誰能辨軒輊所幸有吾
徒先猷未失墜一嘯暫揮手踪跡兩捐棄西山新
雨後何人挹蒼翠淹忽逾二年中懷鬱以積梁苑

有薄田日夕甘負耒善病類文園殷憂恒惴惴每
咏蒹葭篇秋水渺無際山寒桂花落幾日幽盟遂
徘徊歲云暮霜雪凋蘭蕙蓬蒿滿院宇直如張仲
蔚客自廣陵來停驂叩我第連宵夢見之失喜故
人至入戶坐我床張燈解君佩酌酒話艱辛山厨
薦霜菜酒闌各就寢誰能便安寐更起步月明蕭
蕭朔風吹轉盼和氣回春事自茲始平臺峙沃野
晴雲浮鬣隸登高望四海樽酒尋常載黃河浩蕩
流鄒枚竟安在懷古發竒情高吟屏塵態鴻鴈競
嗷嗷飛鳴向邊塞城市隱鱗鱗人烟何瑣碎時從

竹圃遊還向鶴洲憇平原十日飲盛事應難再此
日最風流前徽幸可逮論文宗馬遷咏詩追曹植
正聲變衰靡明堂尊鼎鼐敢言身後名且快吾徒
意門掩卷常披盃空酒更貰情親見肺肝意洽呼
兄弟舍弟炘與炆頗亦稱解事圍棋展戲謔染翰
叨陪侍徐子恭與葉君荃十載甘蘿薜時來共盤
桓妙論焉能計君言親未葬此地敢留滯中夜忽
徬徨淚下霑衣袂將命邗江舟兼鼓洞庭柁言辭
何凜凜所貴在大義青眼更誰開白駒難爾繫且
復立須臾顏色暫相對風前遠樹齊雲外晴巒出

顧景倍惆悵折柳起長喟再拜贈芻蕘明德須砥礪

城西陂泛舟二首

萬頃琉璃外城樓似畫圖危橋憑浪遠野艇帶雲孤渚淨花堪摘沙明鳥自呼歌頭傳水調高興滿江湖

柁響蛙聲歇舟停露氣微渚烟間泛泛汀柳故依依白破晴沙遠青抽亂葦肥羣鷗吾共汝莫漫拂波飛

牽牛織女

夜靜河漢明迢迢流中渚鼎足三星間盈盈者織女彷彿是牽牛相對還自阻抱此萬古情悵望不能語惟有左右旗每夜伴機杼

出郭

出郭行未遠林壑相因依散步發逸興茅茨帶斜暉牛羊下前坡一一望柴扉徑轉桃李熟溪平魴鱖肥翠荇牽且流小燕止復飛時見村中人持竿坐漁磯即此堪怡悅攘攘竟安歸

秋日過秦虞桓草堂

借得山僧杖來尋處士家一丘森竹樹半畝足烟

霞路轉寒潭靜堂開斷嶺斜漁舟時復至溪上有
桃花

杖策

杖策城西路涼風八月天林深喧老鶴澗窄湧清
泉雨氣秋原外人家夕照邊桃源真可覲吟眺未
能還

登廢城

荒城亘數里形勢自森布秋草碧參差閒雲莽回
互停車陟其巔披榛得徐步白日忽西馳乾坤入
薄暮行潦接洪流歸人喧野渡遠村蚤稷收近岸

寒鴉聚縱覽感孤懷含悽倚獨樹往者全盛日茲
城稱虎踞城中十萬家歌舞不知數狂寇來縱橫
蹂躪失險固燐火照郊原通衢走狐兔遺鏃樵夫
拾廢堡山僧住回頭市井間人煙已非故淒涼二
十年小康猶未賦暫此息鼓輦遙天看飛鷺

稍晴

久雨苦泥滓瘦日見亦稀稍晴氣象好繞屋烏雀
飛朱杞搖壞壁翠竹倚頽扉岸幘步秋草雲影落
人衣蕭散有如此合取五絃揮

過盧溝橋

盧溝橋畔雪霜多今日衝寒又一過不道鄉心南
去急祇疑波浪似黃河

涿州道中

暫喜風霾息還愁道路長蚩尤傳戰鬪獨鹿見青
蒼地迴城依水天寒樹帶霜忽聞吹感策獵騎出
長揚

宿金隄驛有感步申鳧盟壁上韻

晚飯依童僕燈前粗糲香窮途驚歲序好友惜淪
亡

謂邢臺黃更生
臨洛李臺辰

月暗寒雲重風淒畫角長鄭虔

雙白鬢何異魯靈光

時丁野鶴為
容城廣文

清風店口號

店有西泠難
女宋娟遺筆

淒風苦雨不勝悲獨宿清風店裏時一夜幾番添
蠟燭墻頭細讀宋娟詩

邯鄲道上

邯鄲道上起秋聲古木荒祠野潦清多少往來名
利客滿身塵土拜盧生

山齋

庭隅危石競巉巖石上蒼松映碧杉登眺無煩尋
五嶽晨昏長此對千巖風前雲氣來書幌雨後苔
痕照客衫一卷南華堪累月滿塔秋草不須芟

送李草樓太守之官黎平

五溪南下擁輕船後夜思君倍寂寥定有功名酬
虎竹何妨詞賦繼龍標山盤銅鼓愁陰洞江遶牂
牁指暮潮回首中原飛鳥外嶺梅好寄一枝遥

昭君曲

回首温風解凍時陰山雪氣尚難支昭陽殿裏春
光滿今日承恩知是誰

沐浴子

澡身濁井泉沐髮渾水溝本欲求光澤翻貽七尺
羞所以濯足者須乘萬里流

飲酒

日暮山色紫池水深且清園花半欲落宿鳥向人
鳴浩歌酌春酒蕭然適此生明月如故友相對坐
南榮

綿津山人詩集卷二終

綿津山人詩集卷三

商丘宋 犖牧仲

柳湖草

秋夜

野花零蔓放牽牛
蕭瑟空庭見素秋
多病他鄉常伏枕
懷人初地一登樓
蛩聲帶雨當階切
螢火隨風入戶幽
無限荒涼清夜裏
那堪哀鴈下林丘

秋日柳湖僧舍二首

西風吹淡蕩秋色
晝陰陰古寺塵喧
隔空庭煙雨
沉寒蛩啼壞壁
清磬落疎林
獨坐披圖史
悠哉愜

素心

秋花開石砌散步挹清芬山色當門見鐘聲帶月
聞短衣添敗絮晚飯憶香芹騎馬帝京客真同涇
渭分

劉鴻臚歌

宣城劉叟名光揚年過六十鬢髮蒼一身落拓僅
三尺雙瞳如水分毫芒十年海內盛翰墨短碣豐
碑盡鐫刻琅華館與快雪堂至今處處生顏色憶
昔先皇天縱才臨池學書何勤哉宸翰精妙
古無比上與雲漢同昭回猶云絕技必古人窮搜

墨寶前具陳真蹟雙鈎上文石揚也奉詔無浚巡
元秘塔九成宮經年摹勒何其工縱橫波磔無遺
憾本來面目將無同搨成匍匐瀛臺奏至尊含
笑當清晝賜金賜絹皆固辭賜官拜受誠希覲官
列鴻臚承帝眷從茲出入文華殿退朝常得奉
宸遊日下人爭識君面無何龍馭忽升遐薄俸雖
存罷曉衙疲驢漫走長安道手持御墨賣誰家
歲云暮矣卧茅廬車馬蕭條故舊疎無限傷心堪
灑淚柴門猶自署鴻臚

過沈仁伯寓

同是他鄉客看君倍可憐柴門寒背日土竈靜無
煙車馬交遊少丹青歲月遷騎驢暫相訪談笑得
悠然

長安曲二首

滿目飛沙十月天名王新唱凱歌旋燈前解却黃
金甲兩隊吳姬奏管絃

中和大樂類咸英九奏瀛臺悅 聖情昨日金鰲
橋上過天風吹落鳳凰聲

過舊中貴慈仁寺別墅用郢凌玉使君壁間

韻

古寺藏幽圃雙扉盡日扃閒情消梵唄往事說宮
庭舞愛階前雀書留座右銘中厨香飯出猶憶五
侯鯖

和唐人姚倫感秋林作

霜滿空庭樹芳菲事已殊葉隨千陌迴影落四鄰
孤蕭槭來秋月槎枒集夜烏東皇消息近何必怨
凋枯

鴈

萬里憑雙翼三秋乍一聲影隨霜月落陣帶野雲
橫絕塞眠孤戍深閨倚繡楹淒清偏入耳何限暮

愁生

雨餘

雨餘片月上光彩晶然開青松蔭幽徑白露霑荒
臺攬衣恣閒步忽見飛鴻來浩歌感流景鬱思難
爲裁

題女郎畫梅

竹外香飄艷雪姿多情翠羽哢疎枝掃眉才子無
雙筆貌得羅浮夢醒時

聞砧

一片空中響閨人萬里情夜深時斷續聽久忽分

明韻起霜堦冷風傳遠巷清搔頭添客恨不待峽
猿聲

題雪景畫

層巖策杖立從容積素凝寒千萬峰老樹敲斜飛
鳥絕寺門深掩一聲鐘

道中遇雨

目斷鄉關杳陰雲萬里生春衣逢暮雨疲馬望孤
城隴麥參差秀村烟斷續明懸思歸舍日嫩竹滿
前楹

武城道中

柳湖草

四

小邑名元著蕭條戰伐餘河流環廢堞茅屋枕荒
墟日午行人少天空過鴈疎明農方下詔誰爲勸
耕鋤

荒村

霽色催征騎荒烟望戍樓斷雲寒繞樹殘雪曉盈
疇菽水經時缺風塵幾日休歸心同塞鴈迢遞下
河洲

將抵里門途中苦雨二首

咫尺淹歸騎荒村暮雨聲愁眠曹叔邑夢繞宋王
城野店牛羊聚虛簷鳥雀爭出門泥滑滑翻羨雪

中行

入夜響滂沱空房水氣多也知田父喜其奈客愁
何紅燭消殘漏清樽發浩歌橫流前路滿聞說漲
黃河

綿津山人詩集卷三終

阿城歌前參... 商丘宋 犖牧仲

綿津山人詩集卷四

將母樓稿上

秋日赤壁公譙用徐亦史令君韻

飛蓋真成爛熳遊孤亭如笠俯黃州
褰衣盡有滄洲興對酒寧無白雪謳
斷岸霜風吹草樹寒江烟雨凍
鳧鷗中宵漸吐東山月揮手還登百尺樓

破額山前碧玉流歌

破額之山何崔嵬雙峰對峙雲中開
上有青松萬樹相糾結下有飛泉一道相縈迴
乘風直下一千

丈石魚磯上如奔雷石魚映日鱗甲動噴波幾欲
揚其顛我從塵中來選勝此徘徊釋氏遺蹟樵人
說山腰殿閣生蒿萊何必窮巖穴此際宜銜杯長
橋如竦跨瀑布顧盼忽已離塵埃橋邊三大字云
是柳河東石崩水激苔紋紫其書彷彿如驚龍摩
挲發高興吟眺凌長風安得携家誅茆此中住漱
流枕石歡無窮

食黿羹作

介蟲之元勢最豪如輪穹脊來江濤盤餐誰使窮
水族滋味直欲分太牢犀箸交錯亦何忍鸞刀縷

切隨所遭嗟爾子公竟染指須知口腹難爲操

曉起

朝陽欲上雲氣寒江湖一望波濤寬哀鴈去樓不
盈尺疎竹搖風纔數竿天涯歲暮倍惆悵孤身小
院仍盤桓樽中有酒須盡醉昨日菊花今日殘

種松

一片菁葱色移來歷萬峰數枝初伴鶴孤幹已猶
龍日瘦陰還薄風多響自重歲寒堪寄傲何必大
夫封

即事六首

兩年宦況一囊詩盡日都爲嘯咏時欲向前廳了
公事二三老吏正圍棋

危樓百尺向江開把酒登臨日幾迴隔岸樊山能
好我故將青翠入牕來

東齋不復似官衙竹徑松扉興自賒最是園丁能
解事黃昏時節課澆花

土定盤中堆茉莉漢銅壺內浸荷花垂簾靜對黃
筌畫散髮頻傾陸羽茶

雨過山光翠且重一輪新月掛長松吏人散盡家
僮睡坐聽寒溪古寺鐘

聚寶山頭日已曛閒尋怪石踏飛雲牧童樵子相
傳說拾得應來獻使君

江上行送陳義扶

籬邊黃菊如金錢與君對菊當秋天樽中有酒如
流泉與君對酒吟新篇盤桓十日樂不極如何忽
汎湘江船湘江之水流潺湲青山兩岸相連綿送
君南浦日將夕高歌一曲扣其舷一曲未終帆已
揚臨風分袂徒徬徨蘆花楓葉皆愁色況復猿聲
堪斷腸

贈王子雲

短衣破帽一衰翁，歲晚行吟楚水東。
人世滄桑頻灑淚，詞場鞭弭舊稱雄。
搔頭漫說無長策，倒屣今看有數公。
謂何道岑太守益歎稚川能得士，風流不減李空同。
葛屺瞻先生較士楚中曾以空同目之

秋興四首

楚中形勝說黃州，亂後依然江水流。
到眼雪堂紅樹老，傷心赤壁白雲秋。
官閒射虎時驅馬，歲晚看山幾上樓。
俯仰天涯蕭瑟甚，叢篁寒雀暮啾啾。
侍從當年向紫宸，天街走馬錦袍新。
門開左翼貂璫聚，樂奏中和豹尾陳。
西苑射生叨宴飲，南郊

饗帝仰明禋，鼎湖龍去辭丹闕。
淚灑滄江把釣緜。

昨日聞人說洞庭，滄波浩淼接雲汀。
遲迴烟艇空中見，斷續漁歌浦外聽。
柳毅廟深飛素月，湘妃墓冷閃秋螢。
何時鼓柁乘流去，遙識君山一點青。
公庭吏散快閒身，茗椀詩筒發興新。
春水得鱗晨獻母，秋風剪韭夜留賓。
三年偃仰江湖濶，數子追隨笑語親。
忽復冥鴻天外去，蘆花鷗鳥正愁人。
時

道岑王侯齋同罷官

葛殿卿雨中見過即席賦贈用彭禹峰先生

韻

吳楚風烟入望寬嗟君歲晚未能安半生遊宦功名薄四海依人道路難赤壁孤舟楓葉冷臨臯古寺雨聲寒何妨十日衙齋坐碧酒黃花取次看

陽邏大士閣

陽邏江邊赤石磯崢嶸高閣帶斜暉千帆風雨當窗過萬頃煙波傍檻圍白鳥銜魚棲佛座紅菼映水出禪扉宋元戰伐傳來久弔古悲歌幾振衣

送方四顏歸桐城省母

白髮爲人子居然一老萊春暉看爛熳歸路敢遲

回漢水扁舟穩浮山亂壑開到家調膳罷垂釣射蛟臺

寄徐恭士

海內文章伯還推徐稭優多時成白首何日到黃州鴻鴈三春少雲山四望稠臨風聊寄訊遲爾月波樓

瓶梅

愛爾菲菲艷雪姿高齋清案最相宜故園千樹開還落却向黃州借一枝

秋日江上送曹吉玉入粵胡去驕入吳

二子乘秋發扁舟泛大江別離知有約懷抱詎能
降庾嶺梅千樹吳天鴈一雙山樓相憶處明月正
窺牕

秋雨

浙瀝來虛閣蕭疎動遠林雨添官舍靜雲入大江
深客思消樽酒勞歌託玉琴一簾寒氣逼惟有草
蟲吟

雨後

雨後月倍明清光散秋圃魚潛幽澗水鳥墜空亭
樹我來忽感此披衣驚四顧含悽誰復言悠然成

冥悟

哭葉芊仲二首

九月蕭森候臨風哭一聲故人今不見天地總無
情相貌魁梧甚文章氣象橫沉思都在眼悽惻寸
心傾

有弟嗟難倚維兄屢抱疴積憂同母逝長歎奈君
何別苑淒風起空帷浩月過路人爲隕涕掛劍恨
應多

望龍蟠磯

孤嶼排空起波濤萬頃連蛟龍留窟宅殿閣自江

天法鼓聞山縣神鴉送客船沙頭間極目斜日起
蒼烟

過寒溪寺二首

曉起泛澄江寒溪尋古寺捨棹越崇岡遙山送青
翠稻畦遠近看窈窕垂新穗流泉活活通白鳥翩
然至伊余耳目清已快平生志矧迺澗壑幽咫尺
藏初地杖策望山門雙幢樹間出

琳宮盤谷口喬木帶飛蘿到門聞啼鳥幽意亦何
多褰衣入淨域樓閣森嵯峨老僧禪誦罷洗甕插
新荷見客競前進禮數謝煩苛茶瓜列方丈談笑
對巖阿淹留遂日夕齋鼓喧靈鼉

東齋作

官衙類荒村高齋莽寥廓几席控江湖軒楹帶巖
壑徃徃山水音冷然座中作墻隅竹與蕉枝葉相
參錯青黃麗可觀如對三春萼嚴霜旦夕來霑灑
將零落燦燦東籬花顏色已非昨臨風步廣除徙
倚聞寒雀眷言盛歲淹顧念修名薄撫衷抱鬱陶
任運甘蕭索載咏素餐詩于焉發內作

春日偶成同張長人用王雪洲給諫韻

城荒官舍靜晨夕聽江聲春晚烟波濶風高鸛鶴

鳴三年京國夢萬古楚騷情樽酒修篁下窺人片
月清

程石門覲畢歸滇舟過江上以新篇見寄依
韻奉答

虎拜新從鷓鴣班雲霄高躅未能攀纔來別浦風
前擢又隔寒溪雪後山一代雄文傳諭蜀十年薄
宦佐征蠻相思况接瑤華贈目極歸鴻落照間

黃州除夕三首

歲除官愈閒不復親文牒長嘯向高齋磨墨寫門
帖

弟作燕山客兄爲漢水遊高堂當此夕兩地思悠
悠

何限鄉關思天涯獨倚樓最憐小兒女談笑說黃
州

大別山謁禹廟

古廟峻嶒霄漢間紆迴石磴曉躋攀庭前碑勒岫
嶺字棟裏雲生大別山浩蕩神功崇報祀蒼茫江
水送潺湲自憐浪迹同漁父風雨孤舟數往還

樓上望江南諸山用太白韻

登樓望南山千峰秀無限朶朶青芙蓉嵯峨常在

眼山根界大江驚濤如雪卷坐來移我情高歌興
不淺薄暮白雲生茫茫失絕巘

月夜用韋蘇州韻

春風淡蕩吹堦草參差發晚晴林靄收步此階前
月徙倚望南山連天青未歇

綿津山人詩集卷四終

綿津山人詩集卷五

商丘宋 犖牧仲

將母樓稿下

送揚鄂州職方奉使安南二首 有序

安南黎莫二姓并受 國恩賜黎氏爲安

南國王莫氏爲安南都統使畫疆以居康

熙七年四月國王以兵脅都統廷臣請移

師聲罪 天子憫茲荒服不忍加兵 命

文臣宣諭之賜職方揚君鄂州一品服偕

詞臣以行道過江夏余賦詩送之

聖世今無外南交遠獻琛真王纔受賜同類忽相
侵斧鉞稽天討絲綸表帝心壯遊堪自慰銅
柱望江潯

歲晚灘江去西風瘴癘消錦衣輝象郡蠻女奏瓊
簫已見安邊易寧嗟擁傳遙歸裝輕陸賈健筆記
風謠

樊口二首

地接滄江遠波連曲港深人煙環近渚雞犬散疎
林水落魚初出山高日易陰只應同釣叟來往得
幽尋

落日荒江畔停橈處處船人間沽酒地風冷賣魚
天遠水菰蒲接空林橘柚懸坐看新月上長嘯破
蒼烟

感遇七首

涼秋豐暇豫齋居對空林微雨長苔蘚院宇晝陰
沈仰睇鴻雁翔俯聽蟋蟀吟撫時惻物變感嘆勞
余心江湖浩漫漫名山鬱嶇欽祇應遊寂寞沮溺
相追尋

北窗數武地蔓草不復除中有傲霜花枝葉何扶
疎繁英冒煙靄爛然照吾廬采采欲盈把馨香襲

衣裾晚成有餘美奚事艷陽初艷陽
桃李開歲暮將焉如

漢代重外戚田蚡與竇嬰灌夫豪俠徒爵位各崢嶸
大業旣已定氣勢還相傾如何杯酒地遂使荆棘
生竇氏稍退讓亦多偏黨行凶德適參會籍福
安能平徒令千載後史冊有譏評

斜陽在庭戶忽已至夜分空齋燒短燭耳目淨塵
氛蕭條風落木淡蕩月穿雲緬彼同懷子千里隔
清芬願言采瑤草寄爾將殷勤關山渺何許鴈影
徒紛紜中心怒如擣惆悵楚江濱

昔者郭令公英風擅八區功高名亦重豪奢爲歡
娛誰知歌舞場乃爲恬淡圖後世齷齪輩致身多
岐途一朝遂富貴金紫耀其軀堂上錦繡圍堂下
劍戟趨有時明月落酣飲卧瓊璣百事盡荒廢四
顧殊眡盱翻笑讀書子自守何其愚嗟哉孰與辯
頰首起長吁

巫山女粗醜乃有王明君峽中寡俊才屈原撰竒
文靈芝出糞壤所自安足云胡爲紈袴子家世誇
令聞俯視蓬蒿士宛如河漢分貴者擅其貴鷄鶩
徒紛紜賤者守其賤蘭蕙同芳芬

太上有立德其次有立功文章亦末事自古薄雕
蟲安能恒誦讀皓首敝帷中奮起擊長劍斗室生
雄風高歌命樽酒氣欲凌蒼穹歲月不我待江上
凋青楓欲濟恨無梁俯仰心忡忡徬徨日終夕羨
彼雙飛鴻

舟泊潯江望廬山次孟襄陽韻

名山勞夢想俄從江上逢偃仰在舟楫心已入雲
峰靈境燦往牒高賢撰竒踪駕言乘籃輦來聽虎
溪鐘

小孤篇

小孤之山孤且高于雲矗漢何雄豪崎嶇磊落遠
難辨惟見千尋玉笋穿江濤我來探竒乘漁舸長
歌直上如猿猱攀蘿捫葛踏陰磴耳邊恒聽風怒
號大江浩浩何處來排空倒峽岷山開洞庭彭蠡
相灌注此山不動真崔嵬馬當橫其下彭郎跨其
傍匡廬五老拱而立雲煙出沒遥相望山腰有飛
閣繡柱映雕甍金支翠旗光閃爍神之座兮何崢
嶸臨風倚杖興無窮振衣直欲凌蒼穹孤亭如笠
峙峰頂俯視吳楚青濛濛夜靜鼃鼃觸石壁秋高
鶴鶴鳴霜楓白鷗鳥鬼不知數銜魚哺子懸崖中

小孤勝如此大孤復何如江天空濶看不極白日
西下江月初吾生願此老樵漁采山釣水歌歸歟
安能奔走風塵朝復暮令人摧眉折腰有志不得
舒

舟泊老鸛口與丘曙戒登岸小飲

曲港危檣密空江落日圓故人初邂逅野岸共留
連筍擷新藺嫩魚烹小鯽鮮村醪容易醉好傍白
鷗眠

望太子磯

路轉從陽口遙看太子磯小山橫碧浪古廟冷朱

扉曝日靈鼉上銜魚水鳥飛何當佩笭箬一棹此
中歸

板子磯望蕪湖有感二首

雲影悠悠浪影微呢喃紫燕傍船飛春風桃柳增
人恨又到江南板子磯

乘風一棹向鳩茲獨倚船牕憶往時多少故人零
落盡識舟亭上又題詩

謂唐祖命陳伯璣諸子

春夜舟泊蕪湖飲識舟亭

岸幘空江上登臨有廢亭檻邊看夜市杯裏落春
星故友渾凋謝漁歌半杳冥淒其遊子意明發又

揚舲

江上望九華山

太白古豪士名比青琅玕常爲江南客九子得竒
觀坐愛蓮花峰排空何巒岼嘉名此肇錫洵足重
煙巒我行訪巖壑鼓柁凌江湍蕭晨懷勝賞敲枕
未能安須臾共舟子指顧天際看龍從羣岫出秀
色良可餐嵐光殊縹緲頓令江空寒雖未窮靈境
已發中心歡如同所思友一旦相盤桓悵望恐即
過捨棹步回灘亭午獨延佇願假高飛翰

雨中同友人過松濤菴小飲

共有尋幽興招提冒雨過雲飛深院靜松響暮山
多古殿聞清磬芳樽對碧蘿莫愁歸路滑吾欲卧
巖阿

賦得柳葉開時任好風

林開嫩綠雨初晴鎮日和風披拂輕對酒參差堪
送客雜花歷亂好藏鶯銀塘幾處煙光動紫陌千
條浪影生何待春殘飛絮後舞腰不定總關情

舟泊天門登梁山

水宿苦縈迴維舟步江滸天門劃然開並峙雄千
古梁山巖壑幽突兀若廊廡穿雲一逕遙林薄靄

春煦峰腰棠棣繁，礪側朱櫻嫵。芬菲表雜花，採擷
欣儔伍。峻嶒殿閣懸，飛梯裊相拄。登臨力屢疲，嘯
傲氣還鼓。乘風凌絕巔，浩蕩江天俯。博望咫尺間，
嵐影晴吞吐。題詩憶謫仙，斯人邈難覩。日暮愴忘
歸，漁歌發煙浦。博望山名

晚泊江上

蘆葉蕭蕭響，東風暮未停。船多成小市，浪濶湧疎
星。土俗從人問，江湖倚棹經。最憐明月照，千里亂
山青。

牛渚風雪歌

牛渚孤舟三日泊，浩浩狂飈天外作。驚濤巨浪若
奔雷，岸柳汀花俱寂寞。曉起篷窗望冥漠，雪花如
掌紛紛落。三月翻如臘月時，急解春衣換狐貉。雲
氣蒼茫波上飛，山村蕭瑟扃柴扉。蛾眉亭畔鷗鷺
集，水府祠中煙火稀。采石之山盡長松，盤旋磊落
千蚪龍。枝柯戴雲青，且白天然圖畫何。其工此地
由來號靈窟，逸興登臨莽超越。然犀照水事徒傳，
開國英雄亦倏忽。只應喚起謫仙人，把酒江天問
明月。

謫仙樓觀蕭尺木畫壁歌

謫仙樓外長江流謫仙樓內煙雲浮懸崖峭壁欲
崩落虬松怪樹風颼颼泉聲山色宛然在漁翁樵
子紛遨遊細觀始知是圖畫捫壁惝恍凌滄洲古
來畫手傾王侯筆墨恒令神鬼愁每逢勝地亦揮
灑元氣直向空墻留嗚呼維摩真蹟不可得通泉
羣鶴無顏色當今畫壁數何人鳩茲蕭叟稱竒特
前年掛帆牛渚來登樓一望胸懷開解衣盤礴使
其氣倏忽四壁騰風雷畫出青蓮游賞處千年魂
魄應來去匡廬雲海泰山松華嶽三峰點秋樹朦
朧細景不知數一生成出毫素雜花窈窕溪澗

深野水逶迤洲渚露危橋壞磴荒村連多少林巒
莽回互橫塗亂抹總精神河伯山靈不敢怒我聞
畫苑有本源北宋董巨品格尊後來大癡與黃鶴
氣韻超脫同法門叟也涉筆非徒爾黃王如在稱
弟昆此畫此樓並不朽殘山剩水奚足言我家賜
畫舊滿箱年來卷軸多淪亡每與名流講繪事輒
思鴻寶爲徬徨今也見此心飛揚衆山皆響殊尋
常不用并州快刀剪秋水但願十日寢食坐卧留
其傍

露舫祠次王阮亭儀部韻

細草平湖岸斜陽烈女祠扁舟人共繫懷古淚空
垂小院留殘碣迴廊閃畫旗坐聞修竹響蕭瑟佩
聲疑

張鞠存曲江樓雨後賞牡丹同周元亮陳階
六陸咸一揚修野杜湘草張雲子諸公即席

限韻

空林雨過送春寒別墅追隨訪謝安待月杯從芳
徑設撩人花似故園看漁歌乍逐清風起鶴夢閒
思碧海寬向夕振衣高閣上珠湖烟水正瀾漫

重遊北固山甘露寺從礪道過放生池慨然

有作

凌晨訪名山細草芳洲路萃律亘江天樓臺出煙
霧盤紆叢篠深淅瀝清泉注探竒憶疇昔如駛流
年度茲遊氣象殊初地添新戍嵯峨舊講堂列戟
老兵住當時飯僧釜刀劍久鎔鑄雕楹梁帝書摧
折等林樹遊人偶經過踈踏生恐怖山巔古石亭
曠覽欣如故依稀揚州塔突兀雲間露洪濤萬里
來蕩滴朝還暮孰知人事遷抑鬱傷情愫老僧三
四人幾載禪房寓較余爲後來安能話平素山陰
放生池礪道莽回互蒙茸荆棘生樵牧不復顧我

行曳短筇石磴屢停步既至殿宇頽誰氏新加聖
曩者三尺魚游泳生意足臨流倚曲檻朱鬣不知
數一旦化爲田牟麥青青布惟餘蘿洞存絕壁斜
陽駐三嘆共僧徒俛仰得深悟望望野薔薇微香
風際吐

金山二首

不盡滄江水中流湧一峰雲霄開殿閣鐘鼓震蛟
龍海逼風濤壯波翻紫翠重山腰添斥堠寥落幾
遊蹤

妙高臺上月郭璞墓邊濤今古傳靈境登臨倒濁

醪楚天雙過鳥吳苑一秋毫漁父煙波裏吾將共
汝曹

同譚長益周廣菴玉叔兄遊焦山暮宿海雲
堂四首

不負名山約登臨快此時片帆投斷岸斜日到荒
祠江俯盤龍窟人尋瘞鶴碑長風來萬里倚杖步
遲遲

三詔高風在千秋詎可攀煙霞留古洞江海蕩空
山絕壁飛蘿掛深林暮鳥還振衣峰頂上漁唱起
沙灣

竹響參差發松陰遠近舒長歌傳澗壑歸路俯空
虛梵放雲堂靜尊開海嶠孤坐間饒古蹟風調辯
才殊寺有周宣王鼎宋真宗明仁宗勅
楊文襄公玉帶寺僧古樵能詩
一榻山房靜燈光四壁開驚濤天外轉殘月夜深
來極目塵喧隔驚心歲序催白蓮期結社禪誦傍
香臺

焦山次王阮亭韻三首

山勢何峻嶒江流自平遠坐向海雲堂聞鐘日將
晚

山下有殘碑千年傳瘞鶴側足向荒崖奔濤幾時

落

洞壑不可識披雲共山樵夜深松響發疑是海門
潮

第二泉同計甫草賦

寂歷空山下涓涓第二泉來遊新雨後正值採茶
天古鬢莓苔積虛亭礧壑偏風爐松樹下石鼎句
堪聯

雨中遊虞山十韻

半嶺穿城起千巖帶雨探樓臺連竹樹市井隔煙
嵐岸幘行丹嶂支筇俯碧潭雷摧峰頂塔犬吠礧

邊菴突兀亭惟一紆迴徑有三疎籬新笋出虛牖
妙香含野卉飄鷺粟幽禽響石楠旛幢依古佛苔
蘚繡荒龕勝地從僧到嘉遊許客耽自憐微尚在
猿鶴未應慚

弘濟寺訪蒲菴道人次杜于皇韻

一棹破江光捫蘿到上方巖深石作屋地僻水爲
鄉鳥雀空林靜茶瓜夏日長吟詩偕老衲清磬下
迴廊

秋日入楚舟中漫賦二首

江晚碧鱗鱗輕舟下遠津吳牛穿葦出鷗鳥傍人

馴打鼓催田父焚香賽水神土風俱在眼頓使客
愁伸

向晚張帆去中流一葉輕吳山隨鳥過楚水劃天
明風雨王程遠波濤旅恨生烹葵還剥棗清絕故
園情

江行

秋風颭颭涼吹衣舟行遠望青山微銅陵縣前烟
沒郭縱陽渡口蘆攢磯一聲兩聲沙鳥叫千種萬
種江魚肥掛席飄然入圖畫扣舷高咏當斜暉
賦得他鄉逢七夕即次孟襄陽韻

他鄉逢七夕渺渺獨生愁月照江潭棹煙消水國
樓青山當赤岸白袷快清秋天上佳期在還應妬
女牛

馬當阻風歌

初唐才子瑯琊客棲泊荒江幾晨夕馬當相助一
帆風倏忽洪都走七百到時高閣綺筵張如椽之
筆樽前擲吳家小兒氣沮消千載風流照簡冊我
今入楚淹孤舟清秋浩淼江天碧石尤風起櫓難
開雁影蘆花共蕭槭名山咫尺凌飛濤萃嶺千尋
動魂魄臨流把酒酬山靈願借樵風慰于役夜闌

不寐倚篷窗瀲灩長空霜月白

舟過小孤次友人韻寄彭澤令李襄水二首

雨後江山氣象蘇白魚如劍躍菰蒲勞勞半載嗟
行役兩次征帆過小孤

煙波無際日高春萃嶺孤峰紫翠重羨爾風流彭
澤宰彈琴長對玉芙蓉

團風鎮避風用少陵萬丈潭韻

北風江上急濃陰忽如晦孤帆隨鷗鳥簸蕩洪濤
內繫纜向洲渚一水投煙靄咫尺見鄰舟突兀舵
樓大小船如蟻風絡繹兩岸對港深波復平陽氣

浮澹瀨雪花遠近飛着地明璣碎荒村盡掩扉漁翁不在外驚心列戍多到處懸旌旆江樓駐雄師聲名傳下瀨乾坤浩茫茫萍梗偕流輩百年境遇繁適意誰能最緬懷川路紆顧景篷窗礙悵然念去春遊賞欣吳會

解纜二首

解纜滄江上乘風過遠汀樹留殘雪白雲歛亂山青歲月慚萍梗鄉園念草亭閒關沙際鳥倚棹幾回聽

岸柳敲還立江雲斷且隨樓臺三楚麗巖壑九峰中
中坻

盆中無名草

樊山野草碧離披樵子移來總不知玉砌雕欄須愛惜古來空谷有竒姿

鸚鵡

啁啾架上綠衣娘隴樹秦山憶故鄉何似雙雙簷際雀羽毛雖惡任飛揚

綿津山人詩集卷五終

新雀呼子輓惡并飛野

殿烟染土絲不射翻樹秦山翻姑嶺何山雙雙

去春饒遊

愛散古來空谷育音交

樊山埋草孽竊外熱于絲來顯不映王吟輒歸

青歲盆中無各草園念草三前備

中

音次莊間露自天寒

綿津山人詩集卷六 帝京指彈前

商丘宋犖牧仲

和松菴稿

齋中賞芍藥歌

東風澹蕩吹芍藥幾日間園開
焯約重跼累萼相鮮新獨殿
春光破寂寞曉起園丁爭送
花竹筐絡繹當門遮一筐千
朶朶千瓣插來屏幃生雲霞
俯仰高齋花世界傾城傾國
誰能畫餘花還浸老瓦盆
分送鄰翁償酒債嗟我當年
江漢遊花開不見迴生愁
今也對此堪痛飲如澠之
酒罇中浮酒闌

獨把花枝鬪小史清歌停復奏春殘無計惜將離
惆悵宵來風雨驟

題一無道人妙雲精舍

禪房寂歷傍城隈滿院修篁蔭碧苔林外白雲拖
雨至簷前紫鴿引雛來天花自向經臺落樽酒何
妨丈室開壁上憨山留照在百年遺事首重回

余供

憨山大師
像于此

磁州道上

夾道清泉湧單車趁曉行魚苗穿荇亂燕子掠波
輕風景如江國雲山接帝京邯鄲前路近身世

問盧生

過內丘圓津菴遊印庭上人園林

別業連方丈飛蘿滿院青花深藏亂水山小帶孤
亭斲笋晨炊潔聽鷓午夢醒愁腸難遽洗俯仰近

沙汀

地近佛圖
澄洗腸河

山店用沈繹堂太史壁間韻

策馬來山店臨風坐酒家陰輕槐漸葉香遠麥初
花赤日空林外黃塵古道賒西湄無恙在秋水憶
蒹葭

米紫來見訪柳湖寺

有客曳孤筇禪扉扣晚鐘風騷初地話茗粥老僧
供藉草邀新月吹簫傍古松西山還有約明發入
雲峰

僧房即事同周魚服使君

雨過莓苔淨禪房暑氣徂林高翻乳燕盆小簇新

蒲畫識吳裝妙詩傳楚調孤故人遊屐遠山水話

蒼梧 周宦
粵西

聖安寺觀大內佛像有感

寺在柳湖村旃檀
佛嘗飛至寺中元

學士程鉅
夫有記

先帝十八載垂衣坐明堂聖德媿堯舜鴻功邁三

王猶恐機智儔未盡返混茫爰資象教力感化遍

遐荒黃金範古佛寶座森開張慈悲溢眉宇縹緲

白毫光諸天左右侍神彩何飛揚珊瑚間木難衣

甲相輝煌信非九重命兼之歲月長安能窮冥搜

法象傳上方何期先皇帝鼎湖驂龍翔金粟出

大內輿送柳湖莊如同旃檀降古刹飄竒香僧徒

肅鐘鼓旛幢紛兩行嗟哉都人士來觀競趨蹌維

余越一紀棲托到禪房晨昏遂瞻拜寸心起徬徨

嗚呼先皇帝高深難比量即此善俗懷千載恒

彰彰抱弓有遺痛淚下霑衣裳非徒向初地覺道

覓津梁長吟望霄漢薄暮林煙蒼踟躕誰與說杖
策入迴廊

寓寺晚步王阮亭以西山詩見投走筆奉答
次集中卧佛寺韻

禪房睡初足微颺灑空林縹緲落幽磬冷然哀玉
音支筇步苔逕拂石坐槐陰故人枉高唱乃自西
山岑吟咏當日夕萬象森沉沉冰雪色在手蘭蕙
氣盈襟始知簪紱客獨抱雲霞心操絃將屬和愧
此清廟琴

沙河旅夜用高蘇門先生韻二首

殘陽下遠山車馬行俱罷張燈飯始畢跂足身方
暇荒城槐葉疎新月紛茅舍緬想賦梅人商歌起
中夜

中夜不能寐擁被念疇昔幾年漢水舟往日金門
戟歲月忽推遷關山走晨夕三嘆惻余懷霜風撼
空壁

次韻訓陳其年早春雪翁煇命恭士齋中心

歲暮相逢掩竹扉林丘同着薜蘿衣天將賦草催
枚乘纔到梁園雪已飛
冬夜寄懷汪茗文民部

夫君江左彥郎署久棲遲傲骨今人少雄文後世
知別離驚節序京國憶追隨搔首寒宵裏梅花正
滿枝

陳其年同雪公早春雪後飲徐恭士齋中以
新詩見示依韻奉和兼訂元夕之遊

憐君高卧旅懷增滑滑輕輶霽後乘小院寒梅尋
故友一樽殘雪共詩僧相思竟阻山陰棹後會應
看兔苑燈七字新篇遙屬和傳柑清興已飛騰

元夕遲陳其年不至詩來相謝依韻酬之
雪霽遙天片月生茅堂佳節有逢迎筵前苦憶清

狂客戶外偏遲剝啄聲瑤草入懷空自好銀花繞
座爲誰明落燈風信無嫌逼後夜還期載酒行

答一無道人時歸自西湖

南屏山下路孤棹繫青楓瓢笠尋西子風騷屬遠
公去當霜月白歸及杏花紅莫漫詢遊記浮踪等
塞鴻

淇水

數里聞清響荒原一水流過橋噴亂石捲雪下空
洲岸竹何年盡沙鷗幾隊遊永言君子慕斜日更
淹留

夏日柳湖僧舍用王西樵吏部韻

向夕微風起，遙天片月斜。
禪宮添闕寂，帝里得煙霞。
小院搖清磬，長楸落晚花。
西山還對我，空翠浩無涯。

古槐篇

柳湖寺中樹，蒙密殿角古槐稱第一。
孤身挺砌繡，蒼苔老幹盤空蔽。
白日此寺傳來，自大金種槐幾尺。
今十尋風高，靈籟響深院。
月迴清陰，浮遠林帝京。
景物誇竒木，變遷倏忽同。
陵谷韋公海棠花已無，慈仁松樹枝全禿。
此槐依舊鬱蔥蔥，葉抽兔目。

何玲瓏病栢，敲斜恒借蔭。
長楸糾結徒爲叢，嗟我十年頻過此。
樹底歌呼樂無已，筵開每愛瘦作瓢。
夢去還憐人伴蝻，只今仲夏氣蕭疎。
望裏琳宮翠靄舒，且自披襟消永晝。
何須高枕憶吾廬。

聞蟬

雨過招提靜，新蟬幾處吟。
乍從空院落，翻入亂雲深。
蕭瑟驚秋氣，孤高託遠林。
誰憐羈旅客，愁思正難禁。

送友人下第還崑山

憐君不得意，歲晚放舟行。
風雨燕臺別，離騷楚客

情故山經虎阜遠水入婁城後夜相思處霜天過
雁聲

都門留別徐方虎次見贈原韻三首

極目寒雲萬里生天涯分手不勝情河梁欲得瑤
華贈故遣輕軺緩緩行

歲晚桑乾捲地風金臺回首夕陽中踟躕多少傷
心色柿葉山山照眼紅

記得金隄柳葉生與君載酒唱歌行誰憐旅店青
燈下獨聽箏郎摘阮聲

過濬縣訪李梅臣程箕山二使君不遇

清樽綺席舊曾攀十載相思尺素艱往事共傳梁
苑賦故人今訪大伍山雲深別墅踪難問雪滿前
溪棹獨還向夕不堪回首望朦朧煙樹閉重關

晚次黎陽村舍

幾載驅馳鬢欲斑單車歲晚又南還路迴漸入長
豐泊雲斂橫看善化山野店晚風留客早柴門新
月放歌閒連朝祇覺歸心急夢繞黃河水一灣

旅夜

歲晚嗟萍梗關山策馬行戴星纔一飽聞雁忽三
更燈影兼人靜霜華逼戶清寒梅開欲遍迢遞故

園情

白松

在密縣天仙宮相傳軒轅氏葬三女於此因化為松

松標百尺插蒼穹遠托孤根礪窟中剥落霜皮侵
碧蘚蕭森玉樹灑清風仙宮月出寒光映帝女魂
歸艷色空嵩嶽三花應此妬絕塵今古自青蔥

仲秋送僧還金陵

幾載南湖上開池種白蓮又飛梁苑錫去泛秣陵
船茅店清齋晚楓林野興偏中秋應到寺趺坐月
明天

題韓鶴仙畫竹

雪苑山人老鶴仙興來寫竹走雲煙幾回兵火留
遺跡手展鵝溪一惘然

介子弟重葺西湄別墅漫賦

已闢臺邊徑還開水面堂滄波當檻繞白鳥傍人
翔歲月消漁艇雲山借女墻啁啾絲竹在感舊淚
霑裳

送陳石泉入燕兼寄子昭弟

徙倚離亭下長歌對夕陽邾堪人北去正值雁南
翔霄漢瞻宮闕關河踐雪霜吾家季方在攜手得
同行

遊呂公堂

野艇晴波漾荒祠夕照殘林棲燒藥客門插釣魚
竿劍氣橫仙幄苔文繡古壇淹留新月上好取玉
琴彈

綠牡丹二首

小院名葩絕代無雨餘新翠出叢孤芳姿點染勞
青帝媚態依稀見綠珠色借苔紋春自占影分竹
葉望來殊徐熙好倩閨中黛別寫雕欄富貴圖
異種遙分洛下春青霞碧水鬪精神香傳蘿逕花
難辨葢映蕉窗色並新翠被鄂君元獨擁黛眉西

子正宜顰何當倒掛來么鳳點綴風光穀雨辰
泛舟南湖訪雪笠道人

過雨南湖去澄波漾夕暉破船雙鷺浴疎柳一鴉
歸鼓柁聞煙磬尋僧扣竹扉甘泉隨意煮真息漢
陰機

從石公覓寫洛神圖詩以代簡
開士丹青妙入神應知顧陸是前身澄心片紙收
藏久乞寫陳思賦裏人

周將軍邀同劉山蔚田梁紫南湖泛舟
過雨南湖浪拍天扁舟載酒興悠然魚莊解舍晴

沙繞岸柳汀蒲暮靄連鷗鷺不驚塵外客笙歌真
作水中仙漁陽老將顛狂甚倚棹高吟未許還

蘇八閏七夕思婦柬人

再見雙星會梧桐落已多依然風送佩不改鵲填
河愁更消機杼人還曝綺羅無煩重乞巧拙宦久
蹉跎

輓周元亮先生四首

梁木秋風一夜凋江關紫氣黯然消虛傳謝傅躄
高卧絲竹東山已寂寥
舟移夜壑事難知孔李通門涕泗垂多少招賢廊

廟客千秋還讓鄭當時

博雅爭推張茂先秦淮書畫載盈船即今舊物俱
零落遺草猶傳祭墨篇
令子長安比舍居南歸曾寄數行書何期生死須
臾判欲賦招魂淚滿裾

答雪公南湖寺見懷

羨爾南湖上烟霞與結鄰荒城斜抱屋秋水澹迎
人掛錫元無著抽毫迴絕倫不煩邀入社擬共采
芳蘋

梅下偶成

別院春風過雨時梅花十樹繞疎籬閉門小學孤
山卧領略幽香細細吹

季秀才賦桃花詩失却行囊詩以嘲之
季生落魄號詩狂春日高吟大道傍騎驢一笑歸
來晚賦就莼花失錦囊

雨中西湄讌集

衝泥騎馬到林丘坐向空堂俯碧流烽燧滿天飛
羽檄菰蘆此地隱漁舟開樽饒有清狂興散髮真
成汗漫遊簫鼓橋東喧作社太平風景尚能留

次韻答葉元禮三首

抱病經春掩敝廬閒看紅藥步階除臨風正憶人
如玉忽接雲霄尺素書

別後嗟余鬢欲霜閒閒十畝足相羊舊時歌管驅
除盡獨把殘編坐草堂

新篇吟罷倚庭梧長嘯如逢舊酒徒疎狂最惱汪
員外魚雁頻來一字無

謂茗文

綿津山人詩集卷六終

綿津山人詩集卷七



都官草

商丘宋

犖牧仲

同周杞公過楊士佳草堂因尋黃茅岡放鶴
亭諸勝和酬士佳見贈元韻

為看君家竹同攜勝友過門前尋古跡山頂瞰長
河鶴去空亭在岡迴怪石多一樽興廢感俯仰醉
顏酡

春日同二客遊唐口山三首

偶作邾城客來尋唐口山雨添花爛熳風送水潺

溪怪石環岡立殘雲度嶺還趣途偕二妙衣濕更
躋攀

霽後春光好山椒杖策過逕紆封碧蘚洞古隱青
蘿嵐翠侵衣袂樵聲答嘯歌斷虹天外掛流影入
巖阿

絕頂窮幽勝盤旋入畫圖花垂千磴滿峰抱一菴
孤傍竈泉堪酌窺簷鳥自呼嶧山看不厭回首日
將晡

趵突泉次趙文敏韻

歷下泉多似此無到來懷抱濯冰壺池開競向天

心湧源遠難將地肺枯突兀三花喧急雨淒清匹
練映明湖淹留欲發滄浪咏回首溪橋月影孤

榴花嘆用昌黎杏花韻

芍藥已盡豐臺空階前榴花亦自紅乍開還落炎
日裏狼籍其奈掀天風京師習俗好花樹中庭羅
列家家同瓦盆矯屈作壽字數枝纔發無全功憶
昔梁園掩關卧閒閒十畝東郊中名花千本竹千
个海榴百尺抽芳叢三徑逶迤向別圃幾間茅屋
環青楓花時觴詠恣盤礴清香披拂情何窮年來
作客廢幽賞風塵奔走隨西東獨對殘英起長嘆

抱甕擬作村居翁

題畫爲王阮亭作二首

稻穫荻花殘空江橫舴艋蟹舍寂無人柴門夕陽冷

軒開幽磴濱亭峙荒岡上來往茹芝翁楓林曳鳩杖

秋泛圖歌爲田子綸員外賦

田子磊落天人姿一官郎署聊棲遲太倉之粟轉輸急城隅坐閱舟車馳東南民力近已竭唱籌河上恒攢眉岸柳汀花漸蕭瑟俯仰正值清秋時樽

酒招尋展懷抱輕船容與浮漣漪授簡應劉賦公

讌南溪不數昌黎詩生綃誰爲寫秋泛丹青直欲

凌和之宋馬和之繫余卧疴掩蓬戶國門咫尺如天涯

傳來卷軸嘆竒絕摩挲三日右手胝長安冠蓋少

閒暇公等獨與煙波期淹留觴咏狎鷗鳥風流還

可千年垂但願普天洗兵馬曲江選勝長追隨

同葉子吉張素存二太史王阮亭民部遊

安親王園時王南征閉門不得入還過韋

公寺和阮亭作

竟阻尋幽興空携作賦才開樽思兔苑杖策過香

臺畫棟秋雲隔松關暮雨催南征聞奏捷飛蓋會
追陪

賦得荷枯雨滴聞

秋雨溟濛水一泓殘荷幾處向波橫田田頓改風
前色灑灑偏傳葉上聲傍岸蛩吟爭斷續眠雲鶴
夢助淒清初衣欲製嗟零落側耳方塘百感生

晏子披裘圖爲魏環溪先生題

文勝末俗奢紛靡不知止鑊篋而朱紘仲父猶爲
此勲業誠爛然器小盈易爾何如示儉德劑世齊
晏子一裘三十年敝之而後已身不滿六尺衣褐

最約矣尚懼怙侈生况乃大於是觀其相三君顯
名炳良史深知越石賢解驂脫絆縲嗇已以施人
士爭樂爲死千載慕高躅願同執鞭士

讀新安呂氏家乘奉弔大司馬忠節公

有明當末造盜氛遍梁園澠池與伊闕衝斥黃巾
繁偉哉大司馬里居作屏藩家資散不惜義士盈
閭門保障匪一朝誓死報國恩夫何辛巳秋洛城
被鯨吞城中十萬戶殺戮到雞豚而公罹凶鋒罵
賊類平原精誠貫白日生氣凜然存昔公避璫燄
七載卧荒村講學紹濂洛將使薄夫敦何期丁喪

亂天柱摧崑崙嘉號易忠節代遠名愈尊睢陽張
與許惟公足弟昆紛紛冠蓋者偷生安足論招魂
一以誦哀怨流乾坤

夜霽書懷

連旬陰曠忽晴霽雲氣盡掃遙天青月影娟娟掛
樓角螢光閃閃穿窗櫺松濤忽動鳥驚起鄰笛橫
飄人卧聽浪逐塵囂豈吾事詰朝擬斲嵩山苓

曹子有綠水送春帆之句一時艷稱之偶占
絕句以贈用阮亭韻

公子高歌綠水篇清新五字劇堪傳如聞疎雨梧

桐句心折襄陽孟浩然

遊祖園雜詩七首

春光偏向客中催選勝城南並馬來多少間愁消
欲盡路傍茅屋絳莢開

插天高柳碧絲絲一片東風淡蕩吹彷彿隋家堤
上過露條烟葉叫黃鸝

園林晴日散芳菲曲逕藤梢欲冒衣愛殺水亭風
景好蒲芽纔吐燕雙飛

亭北名葩取次看一枝將放倚雕闌梁園記得春
深日斗大花開綠牡丹

高臺突兀俯紅亭樹杪西山一抹青誰繫斑駘花
塢外故吹長笛使人聽
名園自昔追隨數回首俄驚二十年最是夕陽花
底坐遊絲依舊落尊前
折得風前赤玉枝帽簷斜插醉歸時重遊好待將
離放還唱旗亭絕妙詞

王北山給諫謝方山秋部招同諸公摩訶庵
看丁香因訪慈壽寺元福宮釣魚臺諸勝三
首

古寺花成幄霏霏過雨天穿林隨老衲捫葛上荒
阡雙闕晴雲外千峰夕照邊幸同江左彦觴咏足
陶然

鄰寺看碑入仙居載酒行荒涼前代蹟憑弔此時
情塔院饑鼯窺丹房野蕨生松陰留小憩格磔暮
禽鳴

欲訪垂綸處長歌鷺塢來澄波飛野鴨斷岸失孤
臺正喜青藤共寧愁畫角催勝遊應再續計日牡
丹開

阜城旅舍見湯西崖題壁有底事傷心誰與
訴曉風殘月又鳴鞭之句漫賦一絕

風流駘宕浙西生樽酒當年意氣傾今日郵亭見
題句令人却憶柳耆卿

奉送高念東先生 予告還山六首

香山今日咏歸歟真見高風漢二疏回首東華塵
十丈此中豈是列仙居

獨向丘中弄玉琴滿園修竹舊清陰松巢結就聞
竽籟靜掩雙扉戲五禽

自昔登臨說侍郎巖山萌亦足相羊撈蝦淺水花
明渚提榼空山雪滿岡

幾載勞山入夢賒荷衣今訪赤松家春風自唱遊

仙曲采采溪頭巨勝花

秋官讀律心常苦冬夜聯吟興轉豪最是舊遊忘
不得一樽赤壁月明高

京國淹留衣化緇烟霞骨相辱公知青鞋布襪追
隨去不待恒河照鬢絲

康熙二十年七月二十一日

上御瀛臺 召滿漢諸臣泛舟 賜宴兼頒彩幣

有差宴畢仍 賜菱藕紀恩二十韻

聖主垂衣日遐荒貢雉年輓輸方濟晉凱奏又平
溟世際唐虞盛圃宜苑囿前翠華臨太液白露肅

高天西嶺雲霞入南臺眺賞偏千官來絡繹一水
渡潺湲擢撥青蒲偃魚跳碧浪濺牙檣驚屬玉龍
旆映秋蓮路轉蓬瀛接樓開象緯連鋪茵依灌木
張幄對晴川文綺殊恩及重霄睿命宣珍羞
傳大內蘭蕙簇芳筵當坐清談許行觴跪飲虔勸
酬元老洽感激小臣先既醉頌嘉果言歸壓錦韉
遭逢真幸矣報稱豈徒然執戟蒙先寵分曹荷
世延屬車懷夙昔執法愧班聯身漸馮唐老心希
定國賢慶同洛都宴漫續栢梁篇

春海棠秋日復花和李梅崖客部二首

芳菲不減艷陽時獨倚秋窗媚晚颺多少斷腸階
下草枉將花葉向人垂

顏色分明奪晚霞一欄修竹翠陰遮少陵見此應
題句不比春風處處花

題高澹人侍講江村垂釣圖二首

垂楊窈窕掃晴波羽扇芒鞋選勝過常侍風流今
在眼羨他漁父有長歌

達夫有漁父歌

綠鬢優游侍從年何妨物外寄情偏釣竿籊籊江
村晚想像伊人一水邊

綿津山人詩集卷七終

林鐘賦對時人一本
秋聲外物有公平
其如美公與文有是
垂對空定計却如
眼高或入於翰
腹向不出春風
隨身公即奉與
不草叶律其兼白
矣非不感望期初

綿津山人詩集卷八

商丘宋 犖牧仲

雙江倡和集上

聞蟬

淒切空庭外新蟬作意吟
數聲殘雨後一樹碧烟
深物候他鄉得羈愁薄暮
侵柴門高柳下幾日許
披襟

和前韻

華亭 錢柏齡 介維

薄暮虛堂外新蟬嘒嘒吟
好音傳院靜嘉樹逼檐
深過雨聽偏切臨風感易
侵故園何處所林際想

開襟

秋日同錢介維遊東勝山

留滯雙江上招尋一壑間
老僧何處去初地任躋
攀浥雨佛桑落窺人山
鷓間風流錢翊在吟罷月
中還

奉和前韻

柏齡

望去招提境悠然林壑間
使君愛幽賞羣從樂追
攀時其崇維德錦含皆從苔色入秋淨
禽聲薄暮聞小山有
明月留醉不知還

詠庭蕉用松陵集新竹韻

蕉林高十丈櫛比羅前楹
白日不能下綠天杳冥
冥色割鴨頭水葉蠹爰居
翎好移青玉案就此碧
雲屏雨至衆響激風定微
煙生但苦三秋夜月不
遍間庭疎衣鹿可覆甘露
酒能醒何須美人號紅
萼發清馨炎州寡霜雪庶
同松柏零

和前韻

柏齡

甘蕉環數抱森綠浮軒楹
苞固若義竹聳蠹連蒼
冥何來垂天翼委此青雲
翎兀然樓閣表突起芙
蓉屏翻風碧靄動過雨飛
流生炎威熾西陸廣蔭
月中庭揮毫事已邈覆鹿
夢未醒偃仰高林下襟

袖餘幽馨終古飽霜霰蒼翠無時零

虔州雜詩用子瞻八境臺韻八首

縹緲江城百尺樓羣公飛蓋此銷憂星槎到日追
隨數遠泛應憐博望侯

鈞輶鳥語去仍還雲樹雙江起暮寒自笑遊踪逐
坡老十年前亦宦齊安

崆峒山畔暮雲堆風起芙蓉次第開向夕空庭堪
拄笏連天積翠月中來

誓師江上憶陽明讀罷遺編客夢醒惆悵斯人今
不見荒祠落日影亭亭

何日還叅馬祖禪花宮巖際自巋然捫蘿擬搨題
名字嗜古從人笑茂先

江關烽火幾年中壯士今歌零雨濛帆影蕭條鴻
在野雙流嗚咽自西東

無復當年章貢臺鬱孤荒阜素馨開殷勤獨有悲
秋客倚杖看雲到草萊

雨餘竹樹影參差耿耿孤懷明月知且喜尋常了
公事木蘭花下任題詩

和前韻

柏齡

千雉層城霞作樓烽烟初罷四郊憂憑高漫擬休

文詠幾見揮毫博徹侯
檐前越燕乍飛還滾滾雙流到檻寒檻外去帆輕
似葉臨風不獨憶長安

天南無限翠螺堆一徑梅花五嶺開不是炎州消
戰伐春帆那得佛桑來

蘭臺奉使號神明飛蓋登臨幾醉醒遲日紅牙敲
欲遍寄情塵外一間亭

時牧庵使君選
詩餘塵外集

競說當年馬祖禪層崖松柏自森然等閒閱盡塵
中客孰是能持半偈先

縹緲金精出望中洞天雲氣日空濛佳人已共風

塵絕采采蒹葭一水東

謂魏徵
君兄弟

千秋李勉已無臺贏得幽襟此地開乘興復尋清
獻蹟女墻高處有荒萊

青峰紺宇互參差暮靄凝來杳不知遲得金波湧
江畔一天澄碧照題詩

和前韻

宣城
袁啟旭士旦

突兀城闔起畫樓西風憑眺一增憂三湘百粵多
烽火辛苦專征盡列侯
何處漁竿釣月還東來煙水上衣寒驚心最是
新巢鵲三匝初歸夢未安

十八灘頭蔓草堆疎林破屋晚煙開誰家解唱邊
庭曲玉簫風中過枕來
深松掩映夕陽明亂罷山川似夢醒一自眉山人
去後江聲冷落到旗亭
獨客齋心似老禪亂山秋木坐蒼然登臨且酌他
鄉酒愛有橙香入座先
吳楚關山暮靄中一行煙艤破冥濛銷魂怕及賓
鴻候風雨驅人五嶺東
百戰經過賸此臺秋風吹動木蘭開孤雲明滅雙
江外莫遣新愁到草萊

迴岡雉堞吐參差石徑荒涼野老知昨日使君天
上至醉捫高壁共題詩

宋牧仲使君邀集城南精舍

寧都魏禮和公

愛遊繁華境招提作勝遊高僧殊磊落名士足風
流地僻難消暑心閒易得秋使君饒逸興不減庾
公樓

次韻酬魏和公處士

花宮逢魏野如向易堂遊

易堂爲處士兄弟讀書處

人靜苔堪

藉林深翠欲流高言驚法侶勝地得清秋擬識崆

峒面長吟上小樓

同集奉和

柏齡

初地一何僻相將得勝遊真同蓮社約不媿竹溪
流白袷宜殘日黃橙報晚秋翠微雲卧處百尺有
高樓

使院池上搆小橋待和公漫賦一絕

秋水蒹葭極望遙新成略約一相邀他時應有閒
人說使院墻東處士橋

次韻奉酬二首

禮

編木橫池逕未遙閒來不待主人邀使君風度真

尺曠夜踏青莎送板橋

麋鹿生成世事遙幽情偏愛使君邀蘇堤湖上稱
名勝雙水千秋有宋橋

和公以榭榼見貽口占爲謝

客從山中來贈我山中果蠻榼名最佳入手何磊
砢登盤十二枚所得亦已夥瀟灑風味殊豈在哀
梨左一片世外香遠自翠微墮珍重處士遺惠而
真好我題詩謝殷勤永言懷袖裏

次韻奉酬

禮

味澀不諧時榭榼類諫果其技能連理其幹癭磊

矻聊用物土宜袖攜未能夥顧邀使君珍置之玉
盤左自慙寒謬姿行恐家聲墮使君云好之非果
而以我敢效行冲言願得存藥裹

和前韻

柏齡

南國秋氣佳涼風薦百果處士投使君棋檯絕磊
矻數顆良已微方欣所得夥顧茲高賢貽味與塵
中左珍重閱圖經茗語燭花墮咄嗟成報章才盡
獨慙我詩人感木桃行當什襲裹

佛桑

殷紅朶朶閒輕黃花起重樓葉是桑過嶺定知梅

遜色殢人何必薜生香鷓鴣啼處紛愁態瘴癘開
時爛曉粧珍重炎州來異種休將玉蘂說唐昌

和前韻

柏齡

瑪瑙殷紅淺赭黃朝暉暎處見扶桑當筵自共霞
爭麗辟惡寧須麝比香戴勝降應驚別艷羅敷攀
合妒新粧木棉嶺上開無數難向重樓擬樂昌

鬱孤臺歌

鬱孤臺迴寒雲浮城中坐見雙江流酸風一道射
眸子我來正值天涯秋李公遺構已塵土碧草芊
綿沒殘礎側身北望魏闕遙野日荒荒照前浦奔

濤盪滴山嵯峨千年霸氣何其多誰是姚江後來者蒼茫倚杖徒悲歌

和前韻

柏齡

鬱孤之臺鼇背浮江波迴合煙雲流飛梯十丈拔空起想見輪奐凌千秋今我來遊但荒土無復方花列古礎仰天長嘯清風生蟬螻在東日南浦城頭雉堞何嵯峨週遭削出芙蓉多山中木客不可見月明彷彿來高歌

使院即事示介維

雙江如箭聒斜陽一髮中原是故鄉狼籍芭蕉堆

逕綠分明橘柚飽霜黃杯酬木客山中句衣染黎人海外香好趁瘴消秋雨後幽巖振策共錢郎

次韻奉酬

柏齡

官舍秋陰淡夕陽鱸魚消息渺江鄉紛披楚畹蘭叢秀冷落淮南桂藥黃載酒幾過池上釣檢書頻拂篋中香高唐麗藻元無敵此日風流屬省郎

題畫

楓林瑟瑟水泠泠望裏千尋石壁青誰寫子瞻當日句虔州城外古螺亭

和前韻

柏齡

溪山一曲似西泠落落修林望裏青應是倪迂高
絕處更無人倚竹間亭

秋日用李義山韻

題詩同魯望客况未應知章貢容浮梗崆峒待采
芝地幽行藥遍瘴暖得秋遲矯矯池邊鶴江湖有
素期

和前韻

柏齡

秋氣渾無賴羈懷只自知聯吟惟宋玉染翰憶張
芝木竹分甘遠扶桑競艷遲
木竹子翠微山果和
公處士携來扶桑即
佛桑翠微峰頂屐應待小春期

附步前韻

宋基維德

南樓終日坐客思竟誰知風急時聞杵山空憶
采芝芭蕉經雨大橘柚待霜遲白袷新涼候悠
然塵外期

山呼

嶺外禽名喚亦奇蒼衣素頰性多知漫將翠羽誇
鸚鵡祇覺清音奪畫眉瘴海舊林歸夢遠朱籠斜
日向人悲一聲婉轉西風冷玉輦空山有所思

和前韻

柏齡

炎方珍鳥見來奇閱遍禽經未得知金屋漫憐同

翠羽雪腮渾欲妒蛾眉喚殘碧海三更夢吟動蒼
梧萬古悲誰把玉筴籠致爾異鄉飲啄起人思
日九藥示介維用皮日休夏首病愈因招魯望

韻

丸藥晨披白袷衣在公何異卧巖扉漫言帆影橫
江少且喜花香入座微檻舞一雙仙蝶麗厨烹尺
半鯉魚肥連朝拚得吟詩瘦祇要風流鬪陸機

次韻奉酬

柏齡

秋老虔南正葛衣披襟遙憶舊荆扉連宵候月來
花外幾日攀蘿到翠微謂魏徵君隱處曲沼網歸魚婢小

雕盤剥出荔奴肥仙郎座上惟酬和相對真堪息
世機

宋牧仲使君留飲書齋即席有作

正韻

寧都魏

禧水叔

秋晚尋醫過贛江使君遲我讀書堂風吹北院清
歌隔雨灑東窗夜話長蘭簿交新渾似故橘盤坐
久不聞香寂憐出語關民瘼手把醇醪未忍嘗

奉酬

歲晚相思隔贛江何期聽雨共蕉窗人驚世外來
籃輦病起宵深對酒缸道德願留關尹喜風流真

接鹿門龐寂憐萬石洪鐘在一寸孤筵未許撞

蕉花追和葉元禮韻

綠天但說濃陰好吐秀涼秋見未曾密葉暗依花
瓣瓣孤芳倒壓葉層層香從暖發宜炎徼露喜晨
流慰茂陵采采正憐同菡萏何須修竹苦相繩

和前韻

柏齡

秋來綠蔭看逾好花發閒窗得未曾傲竹暗抽莖
幾丈比蓮難盡瓣千層露深不藉銅盤受風至愁
將絳節陵一種甘香真絕異楚騷空復美胡繩

遊通天巖作

宋陽行先隱
此號玉巖翁

凌晨越章波杖策遵江徼野日破煙霏心間展遊
眺稍窮林薄紆遠歷岡陵峭千巖如蹲鴟突兀藏
靈奧既至儼堂隍通天維一竅雕鏤信鬼工曲折
存遺廟山根洞穴穿偃僂僧徒導豁然世界殊飛
空巨石倒崎嶇難具陳盤礴發狂叫伊余厭塵囂
探竒慰所好緬彼玉巖翁彷彿聞清嘯諸賢相繼
來忘歸領其妙觸目多遐踪眷言託同調夕陽猿
鳥鳴移情此雲嶠磨墨搦題名千年碧苔掃

和前韻

柏齡

蘭楫亂奔流筍輿出幽徼磴路凌高寒晴空恣雄

眺越彼停雲岡石勢愈巉峭仙源湛水木萬古藏
僻奧鬼斧亦何工玲瓏鑿一竅碩人此盤礴千秋
儼遺廟仰瞻愧後塵冥搜託前導更窮邃洞紆忽
訝懸崖倒羣山青濛濛惟聞猿狖叫既異少文遊
良慰康樂好想見開闢初矯首發長嘯憑弔多古
音歷覽收衆妙詎惜下里歌上擬白雪調待緝薜
荔裳來卧芙蓉嶠爲問巖棲僧荒蘿幾人掃

月夜同介維暨子甚至著飲東勝山精舍

雙江風土連炎州歲暮那復披羊裘放衙行藥策
藤杖長歌還向招提遊城隅一徑入蒼靄花關竹

塢藏層丘講堂開處碧苔滿余曾題作山之幽斜
陽欲墮衆鳥集鷓鴣呼伴聲鉤輞俄驚紫燕舞墻
角社日已過仍淹留僧言此地少霜雪臘月時或
開爽榴我有嘉賓盛才調崢嶸賦手追應劉同來
命酒待明月興酣落筆雲煙浮兒曹識字強學步
微吟彷彿巴人謳玉盤漸見湧林樾松篁影亂紛
蛟蚪仰天大叫發狂態杯傾不盡章波流今夕何
夕樂無極盤桓叢桂簪堪抽參橫月落下山去臨
風徙倚空搔頭

和前韻

柏齡

仙郎奉使來虔州倏忽夏葛還冬裘雙江政平日
無事放衙常作花宮遊此山突兀傍城角禪關曲
折隨林丘白頭老僧意瀟灑手植百果耽清幽使
君過此雨初霽山門寂歷停華輶壺挈榼踵相
繼日云暮矣仍淹留木奴滿前香未了山茶欲傲
炎天榴即此一壺足盤礴招隱何必淮南劉使君
興至發高詠硬黃紙上松煙浮居然天庭振大呂
非徒瑣細工吟謳羣從意氣盡磊落下筆恍見騰
蛟蚪須臾暝煙淡叢薄中庭忽覩金波流新篔滿
酌那辭醉狂來聊復殘毫抽沉沉銀箭催不起濡

墨擬黑張顛頭

寄懷牧仲虔州

新城 王士禎 阮亭

虔州界閩湘蘭蕙賤干草復有寶珠香玉雪映清
曉江城微雨過炎瘴淨如掃高齋開八窗豁達涼
風早方床黃琉璃卧起日杲杲清芬惱魂夢仙膚
愛綦縞嶺外陸郎花未敢鬪媚好昨歲在京國冠
蓋苦紛擾朱門多林塘無由聽啼鳥今年八境臺
雙江入登眺間註詩楚騷多識不爲少遙憶書到
時顛石風嫋嫋

次韻奉答

繫余別京畿嚴霜凋百草故人相祖送駐馬桑乾
曉回首歲月遷舊跡忽如掃江山信阻修坐驚白
髮早瘴癘積晨昏鮮見日杲杲素心寄瑤華不數
延陵縞爲言章貢佳佩紉秋蘭好豈意當關勞羽
檄嗟紛擾那窮雲壑幽聊復親花鳥時登八境臺
側身中原眺迢迢霄漢間古道如君少心同訟閣
鈴臨風恒嫋嫋

移寓四絕句寄宋牧仲員外

宣城施閏章愚山

新移客舍面朝陽容膝攤書即草堂向夕疎簾從

半捲好教明月到匡床

書聲不敵市聲喧恨少蓬蒿且閉門此地棲遲曾
宋玉蘚牆零落舊題痕

葡萄霜際葉蕭森物色兼催遲暮心好處爭誇在
三伏豔笙烏几綠陰深

年侵出處自嫌身望遠間關入夢頻嶺樹江雲秋
未冷鷓鴣聲裏獨吟人

次韻奉答

虔州風土困驕陽上客堪誇有易堂安得宣城老
詞伯翠微峰頂共匡床

我居京國厭塵喧手種葡萄綠滿門此日棲遲君
亦得行吟應破舊苔痕
廬陵百戰氣蕭森疇昔耕桑節使心白鷺講堂何
處覓空洲燐火亂宵深
愚山觀察廬陵
日建白鷺書院
孤臺北望杖隨身迢遞雲霄尺素頻三案是非從
此定乍聞館閣得斯人

歲暮集亦蘇堂即席限韻

握算真何補霜華點鬢新山僧初薦果官閣正留
賓心遠江湖狎時艱歲序頻自憐餘賦筆收拾嶺
頭春

附步前韻

宋至山言

遠道趨庭子雙江入望新銜杯酬勝地作賦擁
嘉賓籠鳥窺人靜檐蕉過雨頻離歌猶未發覽
眺及芳春

綿津山人詩集卷八終

雙江倡和集上 十五

綿津山人詩集卷九

商丘宋 犖牧仲

雙江倡和集下

己未除夕喜吳遠度見過席上有作

今年元日留江東與君醉卧扁舟中今年除夕章
水上與君又泛椒花紅人生邂逅亦難得吾徒令
節誇奇逢當筵一笑快胸臆羈愁消遣隨春風何
以贈我雙錦軸道子圖畫嗟神工更有華燈妙剪
刻五枝青玉將無同張燈懸畫但鯨飲照耀使院
驚兒童此邦暄暖盛花竹庭梅久已開芳叢素馨

蘭蕙相繼發正宜登眺窮崆峒君言明發趨嶺嶠
丹青貌取羅浮峰我亦江頭命短棹乘春謁帝
蓬萊宮賦詩守歲永今夕無令良會徒匆匆千門
爆竹喧未了沉沉忽聽遙天鐘

和前韻

柏齡

吳君潑墨雄江東氣格不落丹青中得名海內三
十載素髯欲改朱顏紅今年使君駐白下元辰柏
酒曾相逢周郎題詩殊敏捷時雪客有作嗟峨青翰生
條風春帆送我顛江去妙跡常憶梅花工逡巡流
景三百六聯吟竊幸仙郎同只今除日日初夕雙

江爆竹喧兒童喜君至止正匝歲中庭蘭蕙開芳
叢贈有淋漓雙畫幅煙嵐彷彿凌崆峒九微佳製
更殊絕舉酌勝對鼇山峰頓使蘭臺動詞賦高吟
聲協黃鐘宮佳辰勝事良未易羅浮策杖嗟匆匆
明年聚首向何處還期同聽臺城鐘

題遠度畫三絕句

溪堂秋色佳楓葉空堦亂相對兩詩翁長歌竹里

館

攤書兩忘言林間適煮茗門外獨何人沿溪曳煙

艇

立 小閣面前山紫翠當窗入看雲歸未歸長使樵童

和前韻

柏齡

小築溪山幽秋色莽零亂若非灑西堂定是柴桑
館

艇 楓老欲作花竹煙知煮茗一編靜對餘目送迴溪

草閣雲邊開松濤空際入閣上復何人看山間竚
立

喜彭躬庵處士過訪即席賦贈兼送往江南

千仞金精不可攀荷衣今喜接江關林巒採藥文
章老湖海盟鷗歲月間暮雨清樽留顛石春風孤
棹過廬山南中耆舊凋零甚誰與天涯數往還

和前韻

柏齡

野服雙江喜乍攀追陪彷彿到松關不緣令尹冰
心迴那識真人紫氣間官舍梅花同一榻春帆樽
酒度千山分攜最羨冥鴻遠梗泛何由得共還

題遠度畫竹

柏齡

幽篠密復疎蒼然倚卷石春風坐彈琴一嘯湘煙

碧

和前韻

何來柏水翁翛然寫筠石秋風便面生一段瀟湘
碧

舟下十八灘用林澹亭戶部遊南華寺韻

章貢此交流水石驚千變虎牙激奔濤未許褰裳
踐鼓櫂念乘危亭午忘朝膳盤旋百折遙象馬瞿
塘見搖搖三板船遠下疾于箭青山兩岸佳咫尺
不及盼長年倚舵樓目注心還戰羨彼水上鷗容
與隨風便纔經洄洑艱又逐欽寄轉楓林送啼鶻
沙渚竄野艇暮過惶恐灘漸覩江如練蘋藻薦文

山斜月浮波面

和前韻

柏齡

贛水束萬山湍激紛詭變積雨添春波畫鷁喜初
踐駛流挾微風冷然忘寢膳倏忽龍淵翻峻嶒虎
牙見危埒駟注坡撇若弩送箭曲折爭毫芒瞬息
不及盼縱有長年師心悸股亦戰所嗟萍梗踪難
假羽翼便徒訝崖壁奇篷窗互迴轉深林聞鷓鴣
洞穴愁猥狺行行薄五雲坐詠澄江練千里信輕
帆快覩廬嶽面

舟過彭蠡望匡廬用澹亭遊懸空寺韻

昔我東遊登泰岱天下名山皆兒孫今從舟中望
廬阜始知嶽外茲山尊排空拔地幾萬仞身雖未
至搖心魂香爐峯聳律插霄漢橫峰側嶺相崩奔虎
溪何處鹿洞杳五老俯瞰南康門雨餘瀑布瀉衆
壑間雲不蔽飛流痕俄驚野燒起邃谷炤耀石笋
紛高蹲篷窗坐對嵐氣重湖光吞吐忘朝昏屏風
九疊莽迴互神仙窟宅通崑崙匡生結廬已千載
後來頻駐幽人軒林巒咫尺不可即生平微尚將
誰論臨風三嘆廢眠食山靈知我愁懷繁願同白
鶴鼓雙翅飄然獨向蒼巖翻

和前韻

柏齡

惟敷淺原見禹貢千秋嘉遯遊王孫蔚然靈秀甲
天下職方羣嶽難稱尊夙從圖史艷名勝望見未
得搖精魂春帆適過彭蠡渚積翠忽共洪濤奔側
身仰望不可極橫壓地軸排天門是日日霽湖氣
淨白雲斂盡無纖痕鑪峰劍峰總霄漢其下列阜
如鴟蹲玉龍隱見掛千尺金波欲上白日昏虎溪
鹿洞發幽想恍涉瑤海瞻崑崙斯時夜色淡天宇
舵樓縹緲開層軒酌酒試揖五老飲飄然逸興誰
堪論吁嗟匡君竟何許芙蓉自碧明星繁狂吟欲

就風乍起篷窗卧聽驚濤翻

附步前韻

至

匡廬之山鎮南服峰如苞竹抽龍孫我來扁舟
出其下巍然勢壓鄱湖尊屏風九疊散層翠一
一突兀驚心魂千巖萬壑競趨赴茲山屹立看
崩奔螺旋瓠剖望不極窅眇略辨山之門煙嵐
斂盡雨初霽匹練猶掛飛流痕獨有五老更奇
絕嵯峨各向晴空蹲東林開先邈何許鐘聲恍
聽來黃昏須臾野燒起山半北燭碣石西崑崙
髣髴絳節會羣帝定有白鹿隨飛軒吁嗟靈異

幻今古紛紛俗子誰堪論洞天咫尺渺難即愁
吟徒使胸懷繁夜深風急雲似墨蛟龍欲起湖
波翻

遊石鐘山次晦山大師韻二首

維舟依洞壑振策向孤峰吞吐江湖水崑崙上下
鐘巖危蹲虎豹樹老走蛟龍目極風帆渺雲濤正
盪胸

勝地水經著高文蘇子留嵐光侵縣市鐘響答江
流鷗許尊前狎人驚戰後遊贊公今寂寞遺唱付
滄洲

和前韻

柏齡

天地來雙屐江湖壯此峰怒濤從齧石幽澗欲聞
鐘徑轉迷荒雉巖虛凜蟄龍雲帆看不極萬里拓
心胸

舟楫三春至江山百戰留孤城依疊嶂禪室枕奔
流共策盧敖杖間追蘇子遊倚欄漁唱起落照滿
前洲

附步前韻

基

匡廬猶在望更此歷危峰突兀松盤磴旬旬磴
起鐘波光涵殿閣石勢走蛟龍搔首江天迴開

茲曠蕩胸

烽火三年後孤亭此尚留湍從深澗落石枕大
江流畫舫乘春至花關逐伴遊萋萋芳草綠鷗
鷺滿汀洲

附步前韻

至

已盡匡廬勝登臨更此峰湍飛穿釣石風急悞
僧鐘過眼帆隨雁驚心樹化龍春波逾浩蕩極
望一開胸

蹋遍尋山屐征帆喜暫留風傳深谷響聲入大
江流倚檻當斜日捫蘿憶舊遊坡公饒逸興長

嘯滿滄洲

江行

船尾紅旗獵獵斜
江天遙度幾雲沙
風輕日暖篷窗啓
穩坐中流看九華

附步前韻

宋著錦

駘蕩輕風日欲斜
雲煙縹緲接平沙
舟人指點江天外
朶朶芙蓉是九華

野泊

濤聲當暮急帆影落平沙
白鳥窺魚網青山出菜花
江湖行欲遍京國望還賒
閒共篙師語汀洲片

月斜

和前韻

柏齡

落日來秋浦
征橈駐淺沙
煙生敬岸柳
香送遠村花
片月依人近
三山入望賒
誰憐未歸雁
江上數行斜

附步前韻

至

荒陂朝雨過
淺水浴明沙
小泊隨漁舫
微香送菜花
春深江勢濶
鄉遠客愁賒
矯首煙汀外
峰高片月斜

荻港避風二首

石尤風急舞江豚，悵望中流落照昏。
遠岫連雲迷九子，驚濤捲雪下天門。
煙生曲港輕帆集，潮打危磯廢壘存。
多少齊梁遺恨在，漁歌欸乃自沙村。
春風小市賣河豚，薄暮津亭水氣昏。
不住江濤崩荻岸，俄驚山月照松門。
漁樵有淚遊兵過，鐘磬無聲古廟存。
明發揚舲更東下，杜鵑啼處幾家村。

和前韻

柏齡

無邊雪浪捲江豚，風際收帆日欲昏。
夾岸人家喧水市，半山佛刹隱松門。
鳩茲路隔春雲杳，板子磯高古戍存。
明月舵樓間對酒，數聲社鼓起遙村。

附步前韻

至

人家籬落散鷄豚，板子磯頭日已昏。
一簇雲沙明荻港，無邊雪浪走天門。
停橈野岸輕煙合，吹角江樓古戍存。
篷底瓦甌堪獨酌，朦朧斜月照孤村。

登謫仙樓

危樓獨眺大江隈，落日雲煙杖底開。
鞭撻風騷人，不見憑陵樽酒月。
仍來松盤曲檻飄，清籟碑仆空廊繡。
碧苔欲賦迎神還，閣筆千秋慚對謫仙才。

和前韻

柏齡

輕風斜日到江隈江上飛樓四望開萬古人同明
月在三春客逐野鷗來丹青滿壁留雲嶠煙雨空
庭積翠苔曠代風流誰繼起祇今獨羨出羣才

二老嘆

有序

余行大江以南見二老焉其行事有足異
者爰著于篇命爲二老嘆竊比于白樂天
之秦中吟云

維漢二千石爵高權亦專龔黃有遺烈千載揚簡
編我行見太守名郡儼神仙出入擁旌旆道路恒
喧闐簿書委官閣日午猶宴眠萬金設僧飯百金

開歌筵遂將惟正供揮霍如流泉昨奉大府牒責
算庫藏錢漏卮其何補稱貸及市廛百端索屬吏
湯火相熬煎稍稍囊橐空又復事管絃元宵觀火
樹一樹值十千旁人爲太息座上方陶然嗟哉此
一老霜華已盈顛但恣已所欲不問民顛連朝廷
有功令煌煌日麗天何事位邦伯褒如充耳焉爰
爲一老嘆用代相鼠篇

征商維古制本抑逐末人豈意當關者竟同虎豹
蹲朝出楚江道帆檣蔽通津正值節使出冠蓋如
雲屯僕從何赫奕登舟來算緡爰有吳地賈絲絮

前具陳苛計溢銖兩遂櫻節使嗔敲扑等劇盜仍
責贖罪銀稅一罰乃百敢不俛首遵揚揚方得意
歸誇筵上賓嗟哉此一老貴遊名譽振胡爲遲暮
年惟與阿堵親倒行而逆施覩此愴心神再爲一
老嘆願勿效其顰

讀雙江倡和集作

閏章

坡公遊處路重經訝許詩人共客亭留得板橋
長好在使星曾伴少微星

荔子桑花勸客杯匡雲東送片帆迴鬱孤臺畔
休回首早捲雙江雪浪來

宜興陳維崧其年

君昔射虎蘄黃州虎腥亂濺青貂裘年來不作
卜莊子慣逐我曹爲雅遊長安十子最籍籍格
律妥帖推商丘雙江一編歛駭幻奇而不詭蒼
然幽孟韓相值亦退舍萬牛穀鯨迴其輶乃識
使筆若使弩猛氣一撇誰能留朝士昨聞槎使
到競詢蒟醬和安榴那知蕭然百無贖只有吟
卷追曹劉鬱孤臺下聯水驛高檣如薺煙中浮
清吟半入黎母唱一半散作珠娘謳日余捷關
擁獨樹壽藤怪蔓纏蒼蚪配君此編兩踈豁樹

根仰讀嗟風流秋光連日劇無賴野籬菊藥行
將抽何能與汝出城去倒騎烏犢西山頭用集

夜飲東勝山
精舍原韻

莆田林堯英澹亭

屋背神鵲喧晴朝石根老柏垂勁條望子晨星

久落落忽喜稅鞅塵聲消左停鞭弭右鞬屬有

若迸水迴赤蛟竹寮炯炯好圍坐時牧仲同阮
亭實庵漪亭

峨眉蛟門方
山集余寓齋自言清興窮遊遨虔州二月春如

海雜花結障篁抽苞更躡鬱孤臺眺聽崩雲千

丈迎飛潮砰訇雷鼓日奔吼崆峒天竺疑動搖

城南官閣靜無事不辭佳客頻招邀共剪谿藤

命虎僕江風吹字成青瑤顧我經游已十載螺

亭入夢真湫溲把君此卷轉自失恨無傑句留

山椒投以小詩當杜舉徑須痛飲訶陵醪

安丘曹貞吉實庵

浩思臨風不易裁振衣獨上鬱孤臺扁舟誰破

澄江色白板橋頭處士來

納納溪聲走白沙魚床蟹舍兩三家唵安主客

圖中句輸爾青山出菜花

吹浪船頭豚拜趨峭帆如鷺下彭湖一雙斑管

凌江去玉立分明大小孤
雛鳳聲隨老鳳哦中原文筆宋家多他年名字
雞壇上爭許人間喚小坡

江陰曹禾哦媚

曾侍高唐賦筆奇重來楚澤騁新辭無端十八
灘頭水流出雙江倡和詩
賓從風流一代才清吟同上鬱孤臺金精山裏
高眠客披着荷衣入座來
我望廬山二十年至今塵土隔青天輸君行役
能相訪幾首新詩衆口傳

江都汪懋麟蛟門

橫江館外大江秋八境臺前月滿樓
句子怪多湖海氣黃州曾歷又虔州

錢塘高士奇澹人

章貢臺前江水流使君經歲駐彤駟竹橋路入
山村市蒲席帆開估客舟謝朓詩情留晚照士
龍才思發清秋登臨風物堪懷古煙翠嵐光足
唱酬

退食常關白板扉何來佳句和應稀
濤聲遠自三江合秀色高臨八境微
梅萼初成官閣賦芟

荷不厭野人衣平生亦有滄浪興烏榜蘭橈願
每違

德州謝重輝方山

抹麗芳蘭次第開使君花底放船迴尋常苦抱
名山癖便爲雙江也合來
卧閣閒吟日欲斜尋幽時過野人家極知覽眺
多佳句偏愛青山出菜花

綿津山人詩集卷九終

綿津山人詩集卷十

商丘宋 犖牧仲

回中集

望居庸關

羣山迴合來遠向都城壓千峰直北奇儼如劍騰
匣支筇走山麓紫翠落衣袷巉巖居庸關虎踞不
可狎似聞瀑布喧何處彈琴峽顧此險要區疇昔
屯兵甲祇今 帝德遙僻壤皆淪洽矧在郊圻間
奚用旌旗插擊柝良足爲棄繻應未乏春風林際
吹嬌鶯啼恰恰躋攀咫尺艱心同兕閉柙長歌羨

向平村醪且須呷

鞏華城候請

仁孝

孝昭兩皇后梓宮旋有事前驅聞同官謝方山將
至留此示之用東坡送陳睦知潭州韻

鞏華別殿雲浮棟北眺層巒如覆甕山陵巨典走
千官羽林雜沓聯飛鞚嗚呼

兩后德孔彰出祖靈輿

帝悲痛周廬迤邐枕長河水淺沙明宛流汞微雨
灑道鹵簿陳風卷旌旗閃雙鳳故人幾日阻同遊

頓使中宵託幽夢維余祗役效前驅回首春林暝
煙重聞君肅肅逐鷄班匍匐郊坰來哭送詩留店
壁待和歌坐聽城樓角聲動欲知何處最相思歸
途明月盤山弄

仁孝皇后輓詩

曳綈傳大內駕鳳忽層霄天付 儲君重人思壺
範遙霑襟勞

聖主執紼走官僚忍見芳春日陵花帶恨飄

孝昭皇后輓詩

淑德傳聞久中宮繼位初未成編女則俄見昇靈

輿旌施行相引風雲慘不舒小臣歌薤露隕涕望
周廬

鞏華城北新得溫泉

上命濬源甃池聽人往浴賦詩恭紀

鞏華城北碧峰前新甃湯池勝地偏不比離宮開
繡嶺偶來駐蹕得甘泉氤氳氣接嵐光吐蕭瑟聲
同珮響傳從此祓除歌 帝德真成寒谷變溫泉

孤山三首

突起孤峰曠野間峻增亂石出榛菅翠華縹緲曾
經此好錫嘉名駐蹕山

前朝風物有花宮山脊紆迴窄逕通尋得石幢無
一字浮圖依舊冷煙中

巖畔褰衣落照明潞河兩岸見春耕遙思大小孤
山在觸迂江湖揆柁情

薊州崆峒山用放翁臨別成都帳飲萬里橋

韻山有府君廟祀唐崔子玉相傳子玉乘白馬來此

薊門以北遵溪橋青松夾道風蕭蕭亂石犖确草
痕碧霜蹄騰蹋我馬驕崆峒咫尺足遊眺壁立千
仞真峇峩于役得從方外樂扶筇載酒非無聊是
日乍霽陽氣盛盤礴頓擬拋狐貂捫蘿攀葛穿礧

矚健如牛犢陵山椒黃帝問道或此地遺踪莫辨
千年遙府君舊騎白馬至其神何處不可招
孝陵東望連碣海峰巒合杳干雲霄鬱葱佳氣龍
虎抱晴霞一道儼絳綃行逐飲飛隨我
后匍匐遠向幽宮朝杯傾絕頂霑僕御斜陽回首
橫山腰會當解綬窮五嶽青鞋布襪分漁樵如猿
離檻魚脫餌長歌起舞憂懷消

獨樂寺二首

寺有李太白書觀音之閣四字及元蒙哥帝為賽典赤所立賢

牧碑先文康開府漁陽日曾攜犖來遊今三十六年矣

雙林尋獨樂攬轡薊門過殿閣諸天迴登臨往蹟

多署書傳太白遺碣有蒙哥坐聽晨鐘響將余念
薜蘿

在昔趨庭至於今扈蹕遊感時同過鳥灑淚自登
樓節鉞風前邈雲山檻外收故人餘老衲相對雪
盈頭

望

孝陵用少陵九成宮韻

陵之主山原名豐臺今更名壽臺遵化去陵咫尺為

先臣駐節地

夙聞華山巔清泉貯石臼未若橋陵奇一水龍門
口壽臺擁羣峰蒼崖儼戶牖禁籞環林巒神宮逼

牛斗嗚呼

先皇帝至德及飛走執戟感疇昔灑淚來原藪開
創仰 聖功天壤同不朽迄今二十年歌頌遍九
有王氣信鬱盤隧道熊羆守展謁阻末僚難附公
卿後寢殿闕以寥竚立徘徊久節鉞懷先臣臨風
更翹首

石門望石將軍用放翁風雨中望峽口諸山

韻

漢漁陽太守張純叛靈帝遣中郎將孟溢率公孫純往伐之大破于石門即此地也

石門之山幽薊雄兩崖對峙凌蒼穹石人屹立撫
長劍猛氣凜烈橫秋容傳聞漢代伐叛守六師此

地成奇功其人已歿迹已泯此石恒轟煙嵐中昔
我經過嘆靈異桓桓之勢來空濛重遊忽復三紀
後形貌還與當年同苔蝕兜鍪雨淋甲山隅蕭颯
鳴悲風

馬上見新燕

山逕逶迤繡碧苔薊門煙樹望中開春風策馬桃
花寺乍見雙雙燕子來

盤山詩六首

冒雨訪名山既至雨忽霽巉巖盡刻露歸雲曉溶
滴五峰互低昂青翠落幽薊初途得感化碑紀保

大歲法象最淒涼遺構荆榛翳旭日照山椒石磴
盤天際嘉遊方自茲小向精廬憇

自感化寺歷少林中盤古中盤

諸勝

發興窮林巒賴此孤筇拄威紆循礧濱曲折穿山
塢礧礧亂石堆遠近無纖土時見巖穴中幾點桃
含兩路傍瞭甲石上有清泉吐遺跡恐荒唐姑聽
樵夫語行經少林寺宗風緬初祖咫尺望中盤對
啓青蓮宇微聞仙梵幽寂歷日亭午塔院近可尋
池愛紅龍古誰從峭壁間貌得錢塘怒想像香臺
側震蕩風雷鼓淹留酌澄碧游儵粲可數當春雄

雉鳴似應丁丁斧高矚陵晴空遙探偕法侶舒嘯

振叢薄寧畏豺與虎

瞭甲石傳爲唐太宗東征時遺跡

茲山最佳處寔維古中盤幽磴幾登頓怪石驚巒
屹或如屋宇疊或如象馬攢或拱如野叟或矯如
翔鸞花宮忽仰覲琅璫響雲端精舍連邃洞詰曲
施朱欄突兀五松樹正蔭說法壇長風一披拂白
晝濤聲寒道人南國秀十載此盤桓 至尊昔臨
幸 宸翰留層巒昭回倬雲漢豐碑宜雕刻皇矣
聖人作欲和良獨難

寺僧佛藏維揚人

萱芽芼作蔬松花采作餅一飽不願餘斜陽掛西

嶺左踏屋角梯萬松如列屏嗟峨紫蓋峰望去不見頂石窟千年樹幹作三尺挺撫之詎忍去長歌扣其瘦右尋談經石陂陀更幽迴虬枝少拘束老此無人境有句不能道嗟如喉有顛嚶嚶谷鳥鳴徘徊步清影天外九華高直擬驂螭騁

空山正寂寥何處人語響遙見故人來臨風披鶴

氅洪厓許拍肩一笑穿雲上王宮詹吳廬洪子昉思後至聊啜

僧厨粥旋策山隅杖看松訝作龍拜石呼為丈願

結煙霞鄰拾此粟與椽嗟余王事迫返駕意悵惘

絕頂舍利塔萃嶽不得往佛牙走樵牧聖燈驚魍

魍勝蹟匪自今遠望但合掌其餘棲隱地一一託

遐想寄語青溝僧終期共幽賞舍利塔頂以地震墮內有小金棺貯

定光佛牙及舍利子聖燈恒于除夕見之青溝僧拙菴也

朝望白雲來暮移青松歸石逕屢延佇余情寔依

依返景帶山杏夕磬響巖扉弄泉聊盥漱寒色上

人衣道逢八十翁談笑共忘機此中事事佳豈獨

娛清暉退尋入村舍燈下蝙蝠飛賦詩興不淺濁

酒杯堪揮五更望殘月流光破煙霏倚馬語僮僕

我心仍翠微

將至都門寄阮亭祭酒

曠望長安道春風嘯咏還故人如問訊袖裏有盤山

扈送

梓宮瞻望

陵寢情易蒼涼遊賞之篇風尤遐散拔其五言雋
永不獨步武蘇陸即謝客之警句蘇州之逸響
尚冷冷未歇也牧仲官在法曹擅能政事而性
癖苦吟雙江扇美于和歌回中抒懷于登望鄴
下梁園于茲復秀矣宣城施閏章跋

綿津山人詩集卷十終

綿津山人詩集卷十一

商丘宋 犖牧仲

聯句集

初冬夜集聯句

同高念東先生曹實菴王阮亭謝方山

羈棲欲何為不如行荷鍤念翁筇倦招提遊先是有勝果寺

之飲愛文字洽仲牧晚照橫蒼山涼風吹白帔實庵稻

芒蟹初擘松床酒新壓阮亭殘菊映深杯狂言遞相

狎方山人皆白社侶詩競黃池畝阮亭妙畫鑒東丹是日

觀東丹王射鹿圖歸人憶巫峽阮亭坐中吟不得荔裳妻

西曹最喜齋北陸巧當裕念翁霜威逼簷牙星芒動

簾押仲牧不妨乘興哦未中考功法念翁煖思漢廟耐

冷畏堯厨蕙阮亭厄漏川灌河氣壯兕出柙牧仲暫爾

賢聖中詎必金貂插實庵采隱夢廬霍泛宅羨茗霽

阮亭斗室即江湖拍浮類鳧鴨牧仲旅懷歡已忘險韻

句偏恰念翁天馬行馭娑海鯨動呀呷聲殷雷破壁

勢急帆出夾阮亭縱橫字屢乙跌蕩顏能甲實庵銘鑱

聳叟樽書留老嫗筴牧仲久企松子游無事宣公劄

方山稍聞動鼉鼓曾否熱羊胛實庵勿憚金吾訶重沽

錢未乏念翁

聖安寺聯句同高念東先生施愚山王阮亭謝方山錢介維袁士旦

暮雲如斷山返照林下寺阮亭蕭散乃良覲斷續幽

人至入門盼寒柯揖讓爭行次念翁墻剝古時紅栢

剩經冬翠且士肅肅僧寮清穆穆禪宮闕方山草創緬

金元烝嘗借初地寺內舊有金世宗章宗像元初奉太祖以下神主于寺之瑞像

殿金貂會三族絳節來羣帝爰遡大定年下洎牧仲

至元世刹邠人代變彈指河山異阮亭茅社閉天陽

仍歸瞿曇氏念翁法象窮雕鏤鄭重先皇昇寺有佛像

出大內鷲嶺舊飛錫龍馭屢迴轡旃檀佛嘗飛至寺中元學士程

鉅夫百靈走蒼茫三車赫鼓吹愚山妙相初無言宛

若拈花示維摩不二門灼然第一義念翁畫壁商喜

留吳裝何詭麗仲絕筆追顧陸纓絡雜珮璫方天

女靜窈窕雲旗儼容裔仲勢伏龍虎馴氣攝魑魅

悸山方旃檀邈古跡金粟爛名繪介竹房穿碧煙苔

碣捫綠字昨聞捷奏宣黔陽走吳瀟從此罷鼓鼙

花龕得高會仲殿閣明佛鐙齋厨出香鼓方生菜

薦春盤巨七削羊截介難窮祖帳情時念翁略遣

文字戲山愚擁鼻發長吟談天奮高視酒氣徹鬚眉

墨痕浣指臂且雅調紛鳳鸞險語掣鷹鷲笑驅山

可移怒號星欲墜韓杜競倔强皮陸間流易錯雜

成宮商一滴大海味愚既足張楚軍亦已拔趙幟

念翁舒嘯和哀猿振藻慚上駟仲共擬寒山詩聊述

淨名意亭鼠鬚爭葳蕤鵠眼交睥睨揮毫詫脫兔

敵人不及避維河嶽曠遙情海岱羅奇思欣感共

顛倒主客謝拘忌愚綦烏錯羣賢旗鼓當大帥且士

鬪場號禪窟東安妙談議未能離塵垢稍欲藉鉗

錘阮精藍梅吐苞老樹烏垂翅蒲牢時一鳴牟尼

靜如睡且飛甍落果愚空垣凋薜荔仲篆煙縈後

猊香臺蹲鼻山野馬靜諸天蒼隼側雙背且醉

鄉戰已疲重圍或可潰天寒僕御愁促別喧車騎

念翁迴聽金琅璫星河宿檐際亭

讀高念東先生瓊花觀詩因懷廣陵舊遊即

席聯句

同念東先生施愚山王阮亭謝方山

瓊花何意也愁人念翁且遣當杯酒入唇萬事揚州

成舊夢

愚山

三生杜牧失前身

念翁

雷塘螢火猶侵夜

牧仲

官閣寒梅又放春

愚山

吟罷新詩轉惆悵

阮亭

二分

明月竹西塵

方山

即席奉送念東先生還山聯句二首

莫教嚴漏促行觴

阮亭

好月遲來縱我狂

念翁

九老幾

人歸洛社

牧仲

五言今日賦河梁

阮亭

還山白首身猶

健愛客清尊夜未央

愚山

他日登臨重相憶

方山

平泉

風物輞川莊

阮亭

瀟灑由來屬樂天曠懷今復見菑川方山香山舊隱

人歸去長慶新詩世久傳

阮亭

纔罷朝叅翻獨笑

愚山

頻耽野飲縱高眠

牧仲

勞君三疊殷勤唱我已風塵

四十年

念翁

筵上咏鐵脚聯句

同周紫海王阮亭謝方山錢介維程山尊袁士旦

經年疲塵鞅埋首困束縛休浴乘春閒客過欣同

酌

方山

春盤風味佳薦此野田雀

牧仲

羽族誠瑣細高

舉慚肉攫

阮亭

逐隊從鳩燕潛身避雕鷲

方山

曾向大

官版鼓翅恣饞啄

紫海

有聲但勞利無心慕寥廓

阮亭

稻梁性能諳林園意彌樂且士穿屋軀體微啁簷毛

羽惡仲牧祥知近集庭孝感遙投幕引羣賀厦來應

瑞銜珠躩六翮奮何時一枝且深託胡為鍛羽翰

橫取媚脾臆山尊啁啾鴛瓦翻歷亂雲羅着維介彈射

空城尋縷切初筵數仲牧量同十步飲智愧三嗅作

長竿類黏蟬明珠異彈鵲亭阮率場田父愁繞砌兒

童捉介維佛首野夫獻斲脛庖丁斫亭阮稍聞鼎俎香

太息虞羅虐且士品雖遜熊魚味終壓藜藿山方七箸

任縱橫口吻鑿精鑿充腸失肥甘膩手信披剥微

如出醢鷄飛似搶榆鷺且士鮮肥有本來香脆妙煎

搏腸胃少腥羶骨骼耐咀嚼夥聚無一鬻連啗豈

滿介維容瞪目冀豐餘朶頤恣酬酢山尊染指類鼃羹

鬪箸並鷄臠仲牧狂寧乞鵝炙渴欲思羊酪妙手菹

薑橙真意謝糟粕噬聞宮徵調老畏牙齒落亭阮髯

掀競橫肱纓絕肆浪謔海紫披綿映短燭截肪侑康

爵報恩懷玉環錫名徵鐵脚仲牧詎能咸其腓誰解

鑄此錯亭阮人生耽口腹是物勞熏灼仲牧適口念生

成感心增索莫山尊小鳥生有營老饕意無怍且士羣

飛失翾翾鬻取爭霍霍仲牧殺機滿天地繒繳到山

澤亭阮慨彼弱羽加何異遊魚涸山尊靜觀大化理坐

歎生機薄且侶燕危處堂伴鼠憎無角介探穀餓

憫趙銜穀貴占郭仲牧蚌蛤化已遲螳螂伺猶昨勿

笑掩目捕寧思撫髀躍阮亭我欲返其淳解網出湯

鑊塵清威鳳游政懌仁麟格皇然象帝先鳥獸稱

咸若紫海

綿津山人詩集卷十一終

綿津山人詩集卷十二

商丘宋 犖牧仲

西山倡和詩

將遊西山謝方山送酒

結伴看山待詰朝故人新釀寄來遙全椒道士真
輸我不得蘇州酒一瓢

附前題

至

春來花雨頻勞夢芒屨間尋破旅愁却喜宣城
真好事一銜羅酒餞山遊

由高梁橋往西山經真覺萬壽諸寺用阮亭

祭酒西山道中韻

曉度高梁橋迤邐遵晴波千峰來馬首寸心凌嵯
峨深林莽迴互路轉紛陂陀初地尋五堦方臺俯
層阿番華爛寶座儼從兜率過鄰寺饒古柏壞砌
清陰羅巨鐘鑄法藏字比春蠶多殘英作鞞紅故
衣憐邢娥提攜一筇杖此外遑恤他

附西山道中

至

鶯花三月漾春暉杏子開殘桑葉肥廢寺尋來
碑半仆斷橋行處柳成圍抽芒小麥翻青浪掠
水輕鷗鬪素衣望裏諸峰圖畫好吟鞭早喜謝

塵鞿

玉泉

清泉噴薄散驪珠咫尺流爲裂帛湖常送寒淙穿
大內新開水殿倣三吳煙霞窟宅天留勝楊柳汀
洲畫不殊森森恩波間極目願同黃鵠一霑濡
自玉泉至卧佛寺宿用東坡次正輔同遊白

水山韻

西山之麓湖之涯玉泉亭榭開天家訪古已入
華嚴洞徘徊敢駐巾柴車耶律孤墳竟何在荒煙
一抹宮人斜樵夫導客遊卧佛蒼巖抱處雲林嘉

其旁咫尺維退谷其巔古寺有五華尋幽無事相
迫促入門且看山桃花杪攤夾殿作蚪舞油油新
葉濃陰加披襟跂脚送落日斗大樹癭輿徒誇故
人命酒余戒飲清泉一勺煎三椀墻隅小丘啓紺
宇盤桓直欲凌丹霞微風不動萬籟靜何來聒耳
紛鳴蛙方塘瀲灩鑿山趾一泓不異樽壘窪黃昏
待月坐精舍跣趺豈與維摩差夜闌耿耿增感觸
繕性未熟同烝沙詩成題壁字敲側懸知他日無
籠紗錢翊屬和意良厚我詩尚望攻其瑕參橫月
落重呼酒倦僕相顧生咨嗟空階倚杖望碧漢迢

遙不見纖雲遮明朝結伴窮礪壑山靈知我不我
遐晨鐘忽動掉頭去松梢肅肅盤飛鴉

附
步前韻

至

太行迢遞橫天涯西山之麓堪爲家良辰選勝
欣就道擔簦提榼隨牛車蒼崖邃洞恣搜剔裂
帛湖水漾日斜爾雅所載信非妄甘泉時降萬
物嘉行行爲詢耶律墓竚聞野寺演法華大師
之墳遶榛莽不封不樹憐鶯花委蛇一徑達山
腹森森竹柏相交加荒涼古刹起何代杪羅樹
老人驚誇山櫻欲熟鳥先啄新葉蔭砌紛枝椹

殿宇無人帝掛壁飛鼉棲竄屯煙霞須臾暝色
冠林薄草根時復鳴春蛙杯行到手一仰眺跏
跌恰喜當山窪老僧導予看卧佛諸天羅列肩
相差村煙鬼火兩明滅微聞巖溜濺溪沙雨牆
題句勞屬和迷離醉眼如籠紗四山明月靜萬
籟玉盤却愛無纖瑕披襟殿角匝獨樹行吟聲
苦同咨嗟五華鐘磬下天際傾耳未許岡巒遮
夜來塏燈光耿耿香山可望知非遐明朝跨馬
躡險去蒼松夾路喧啼鴉

遊退谷尋水盡頭次阮亭韻

如笠亭開退谷前四山積翠落層巔花圍曲檻宜
呼酒木架荒崖任引泉蹋石尋源聞淅瀝臨溪濯
足愛淪漣蘿陰窈窕苔磯靜坐聽樵歌勝賞偏

廣泉寺用阮亭題鈍菴洞庭詩卷韻

山椒旭日哢春禽破寺何妨振策尋荒逕有人挑
筍蕨殘碑無字紀遼金禪房疊石吳中手別院看
花世外心雅愛僧雛能解事硬黃一幅索清吟

和前韻

錢柏齡

松逕斜穿逐野禽數椽新構足幽尋興來欲訪彌
天釋山好何須布地金樹外渾河能極目窗前花

雨了無心泉聲只在香臺畔傾耳聞庭起越吟

碧雲寺二首

寺後有魏忠賢墓

放眼來青嶂齋心入碧雲樓臺當礮起鐘磬隔花
聞初地惟流水空山又夕曛寄言猿鶴侶何日許
為羣

刑餘開黨禍國運遂迤邐何事窮奇骨仍埋大梵
天林烏催落日石馬卧荒煙一種松楸地應無牧
豎憐

和前韻

柏齡

一寺皆流水諸天迴碧雲到門森木合過礮遠鐘

聞洞壑留宸藻樓臺麗夕曛貂璫丘壠在狐貉
自為羣

宿香山來青軒懷愚山侍講阮亭祭酒即用
愚山蘇門山韻

碧雲赫弘敞我意不再踐茲山荒而幽林壑見亦
鮮磴道噴清泉松門積蒼蘚香臺花吐苞姚魏略
可辨殿側訪崇軒開襟興不淺宮闕迴明滅煙嵐
互舒卷煌煌宸翰留千秋重絕巘張燈聞放梵
對酒思摘阮呼兒此題名廿年懷抱展臨巖望故
人春衣露華泫

附步前韻

至

初地跨山腹細路羊牛踐門荒匝春流剝啄人
來鮮捫蘿快夕遊跣趺藉苔蘚土花蝕殘碣時
代誰能辨想像翠華留揮毫興不淺僧徒止
予宿風簾始一卷坐起揖纖阿酌酒西山巘覽
眺企向禽歌嘯緬嵇阮聊息登頓疲漸覺懷抱
展夜闌風景佳露下清泫泫

雨中由磴道上洪光寺二首

我遊得一奇維此招提徑紆迴十八盤老柏夾危
磴霏霏小雨來蕭晨作輕暝樹色雜煙嵐到眼殊

幽勝衣袂霑古香竚立發清興林隙望山門天風
送孤磬

關地自中使規模倣朝鮮毘盧繞千佛法像窮諸
天幡幢盡奇麗照耀蒼崖巔胡爲名勝區僧徒散
如煙影堂弔山鬼松鼠竄几筵荒寒不可留亭午
風淒然却顧階除上遊踪破苔錢

和前韻

柏齡

未窮香山遊已穿洪光逕盤道何迂迴九折凌幽
磴微雨生遙空萬柏翠欲暝紺宮迴寂寥宛轉造
其勝欲訪支公禪不減康樂興春風吹我衣隔煙

數聲磬

附步前韻

至

朝來野日昏微雨灑幽徑穿藤濕芒鞋杖策破
苔磴松杉交上頭作意弄煙暝未窮佛閣奇已
訝山路勝小憩據石床狂叫發清興遙聞山鳥
呼依稀答僧磬

入門何闐寂樹古苔色鮮禮佛啓中殿屋老通
青天月鏡與雲旗羅照華座巔僧徒去已久竈
冷無炊煙飢鳥下階砌鬪鼠登几筵回望香山
閣栝柏鬱蒼然稍恨春遊晚落盡榆莢錢

盧師山歌用東坡遊徑山韻

塵迹却掃尋名山渾如涸鮒投長川特訪盧師徑
榛莽欣從法界相周旋惟師初自江南至扁舟容
與凌重淵舟所止處便跌坐卓錫闢地茲山巔至
今古洞留短柏還看遶座開青蓮左右二龍爲弟
子行雨想像騰蜿蜒始知是物具佛性豈有達士
譏叅禪孤亭俯礧樹森立黃棟初發榆飄錢我來
駐屐一長嘯鋪茵愛聽松風眠遠望麥畦作翠毯
空天明滅飛鳥鳶人生有涯樂且樂奚取白髮恒
憂煎况我少無適俗韻每於上壑求安便竟須誅

茅隨衲子挹泉嚼菜心陶然那能苦戀太倉米踞
踏轆下嗟年年

和前韻

柏齡

盧溝之北盧師山山勢迴合如輞川礪道屈曲不
易到一路行迹同螺旋巨石鎮壓是何物或言下
乃蛟龍淵吾聞師來自江介破船欲拂蓬山巔從
風蕩漾任所止一朝此地開青蓮師乎兀坐洞壑
畔小青大青隨蜿蜒毒龍一制了無事秘魔從此
留安禪我來暮春春日霽楊柳飛絮榆飛錢披襟
策杖歷重險脫帽直向幽崖眠仰天長嘯激清響

白日欲下高飛鳶龍團一餅出行橐林間石鼎手
自煎恣意盤礴此亦得青松白石良靜便洞門古
柏不三尺遺跡一覩心茫然師乎掉船竟何處滄
桑倏忽驚千年

附步前韻

至

盧師結宇環青山谷深崖迴如斜川微雨纔過
景色霽短筇與我相周旋桑乾故道蔽叢木下
瞰不見蛟龍淵羅雀童子來日暮收拾媒翳當
層巔須臾顧兔湧林樾照耀佛座開青蓮眼前
洞壑盡詭異咫尺想見騰蛟蜿蜒繫予何事雜塵

迹到來忽復思逃禪夜深留厨供麤飯芼以澗
蔬烝榆錢青松濤起聒兩耳高枕直欲凌風眠
幽鳥棲定人跡絕仰面驚墮雙飛鳶新詩信屈
愧韓孟推敲字句心熬煎俯臨翠微不五里此
去沙路殊安便香臺坐久露華重停杯四望天
茫然吁嗟盧師歸何處手植短柏榮千年

秘魔崖晚坐

向夕蒼崖訪秘魔孤亭微雨對煙蘿長松自作驚
濤響不見扁舟泊礪阿

和前韻

柏齡

逸事千秋說秘魔斷崖流水映松蘿春風小憩孤
亭晚山鬼依稀嘯礪阿

雨後過翠微寺

一徑穿林樾看山向翠微松門過宿雨墻院得清
暉絕壁蒼藤掛閒階碧篠圍老僧辦粗糲知我憺
忘歸

和前韻

柏齡

十里到松扉花宮隱翠微遠山澄宿霧小院澹春
暉天矯蘿千尺扶疎樹幾圍未須窮絕頂只此足
忘歸

皇姑寺

扣馬名高中，幙中斜陽幽。寺帶芡叢黃，沙翠輦當
時恨。畫幔雲旗異，代崇流水若。教能納諫奪門奚
事更論功，淒涼尼子迎神曲。不少人間烈士風。

附同介維至兒豐臺看芍藥遲梁藥亭蔣京少

不至用東坡定惠院寓居月夜偶出韻

殿春花發作勝遊，折簡邀賓自前夜。微雨纔過曉
風輕，一路看松馬頻下。出城正值分秧天，田類僧
衣暗。泉瀉綠楊橋外小，塢幽林隙遙。憐一枝亞亭
開爛熳，雲錦堆竹几。繩床許相借，深盃漱灑那忍

啖崑崙蔗，長安貴游盡。奢豪雜沓，謹叟猶夢怕。
只應此地任棲遲，手斧腰鎌速訕罵。

宋比部牧仲招同蔣京少錢介維暨次公山
言豐臺看芍藥予與京少先至不得相值遂
入中頂登九蓮臺而還牧仲柬以詩依韻奉
答其四章則專贈京少也

南海梁佩蘭藥亭

右安城頭霜照瓦，官街鼓打憐長夜。晨雞呶喔人
始行，早出城門赴花下。宋公有約胡不來，獨遶紅
泉竹根瀉蔣侯騎馬忽相值。高揖金鞭立林亞，天

生我輩長間人日車容易義和借且就花前仰花
色花神喜我我拜謝白玉爲盤列雉田紅雲如蓋
銜僧舍飽看勝噉杏花粥渴解無用江東蔗鳥雀
窺人恣往還蝴蝶黏衫少驚怕此中樂事難具陳
霸陵醉尉那能罵

東豐西豐踏花路馬蹄自曉行入夜長安卿相空
滿城無有一人至其下先生好遊獨早出松風夾
道驚濤瀉邀予賓客蔣與錢有男好手推流亞珊
瑚筆架翡翠床準擬分題不須借愛花我欲就花
死摹花公等真陶謝誰知花林竟相失執鞭我似

辭到眼花開又花謝蓬蒿二仲悵莫同錢起吟鞭
來隔舍和詩髣髴雙江濱但少黃柑與紅蔗盤空
硬句擊鉢催橐鞬周旋吁可怕淋漓醉墨寫短墻
野老來看任嘲罵

和前韻

柏齡

看花有約去恐遲中宵攬衣起問夜平明連騎出
城南一逕斜穿柳陰下曲渚迴塘趁馬蹄紅魚撥
刺驚湍瀉花林漸入東豐臺欄紆萬字牆低亞司
馬園林蘭若邊閒亭喜得從容借開尊促坐香盈
襟婪尾春光未凋謝羲輪欲轉西山青倚醉尋芳

過鄰舍吟鞭遍逐遊蜂狂咀嚼英華如嚼蔗撲面
蘋風日夕高惜花還爲花生怕梁鴻蔣詡期不來
勝事已偏從笑罵

附步前韻

至

昨日慈仁買花歸插滿銅瓶香徹夜今日豐臺
賞花來鋪茵更坐芳叢下溥溥朝露猶未晞東
風吹過珠還瀉珊瑚成堆玉作盤殷紅膩白紛
低亞晴郊士女如雲屯野老孤亭容我借南國
美人悵望遙賦手空懷鮑與謝適情無事張華
筵白酒黃鷄供村舍側帽狂歌驚四鄰醉來欲

避三舍自來大將張大旗小技材官徒舞蔗側聞
詩成呵寺壁風雨颯颯鬼神怕取紅取白原女兒
百遍桃花咒成罵

名花有似傾國人相對恨不連日夜繡袷初臨綺
日前寶鞍擬解華星下鉛華并汲者誰子琥珀輓
轡隔花瀉道花無語却有情扶鬚抱萼交頭亞春
光九十逾八十今日何惜一日借不見艷李與穠
桃前蹊早已紛紛謝花開香鬢散天女復湧金輪
訝耶舍氣味真成蒼蔔林根株好是瞿曇蔗潦倒
花前我不辭斜風吹去當誰怕翠袖紅筵舞鳳皇

不值黃鸝數聲罵

君家愛花真大雅相過花龕竟三夜花晴花雨總
不言祇布瓊瑜坐林下香氣空濛錦繖圍露華的
歷金莖瀉黃衫少年那比數紫玉佳人差同亞世
人賞花祇任耳君有兩目非人借牢籠花態寫入
詩一字花翁一稱謝九疊芙蓉眺玉臺一條冰澗
穿山舍猶自高吟不離口滋味沙糖本霜蔗碧霞
仙宮衆祇肅龍象蹴踏驢所怕金犢車迴細馬來
羅裙畏見春風罵

和前韻

宜興
蔣景祁

京少

人生行樂須及時秉燭看花每卜夜西郊十里爛
如錦我曾三日卧其下丹砂晝炤金鼎燒珠露朝
擎玉盤瀉文采風流宋大夫雛鳳聲清允堪亞折
簡邀我爲再遊綵筆江淹許誰借揚鞭出門嗟路
岐長吟無計追顏謝巡畦穿逕各馬蹄茗椀爐煙
不同舍先生險韻詩早成諷之媿媿如啖蔗遙知
揮灑方丈壁龍蛇淋漓燕雀怕花穠酒香日已晡
豎儒不前乃公罵

綿津山人詩集卷十二終

綿津山人詩集卷十三



商丘宋 犖牧仲

續都官草

席上送袁士旦還蕪湖同朱悔人洪昉思賦
二首

寒宵樽酒送將歸
霜月朧朧照掩扉
明發江鄉尋舊隱
一間茆屋傍螺磯

梅花香冷下風簾
對此翻將客思添
多少故人裁別賦
消魂今夜過江淹

寄懷徐子星方伯用王幼華黃門韻二首

清香違畫戟梁苑柳如絲契濶憐星換綢繆美葛
纍烽銷麋子國酒載習家池上客同高唱謂朱
悔人應
無九辯悲下風氣世五階泯容及七好入姓
屏藩功不細轉運計能諳中野來鴻雁明堂待杞
楠風塵聞鑷白江漢望拖藍舊有南陽約何時飲
菊潭二首

冬夜示弟介山兒至用放翁同子坦子聿遊
湖中諸山韻

曠懷託張融我屋儼舴艋案頭仇沼石萃筆作峰
嶺休日歲云暮小憇無人境側身望故園南湖渺
千頃拍波羨鳧鴨漸樂春晝永未遂汗漫遊聊得
塵鞿屏觀梅設茗宴遠汲天壇井地爐添楮拙念
此幽花冷骨肉共情話壁閃孤燈影空階積殘雪
中夜光炯炯清詩和放翁工拙心自領置筆搔二
毛還期踐箕穎

東坡先生畫竹歌

我家畫竹亦云夥昔有與可今東坡到眼素練不
三尺琅玕幾個臨滄波疎枝密葉總生動荒汀一
抹蒼煙多根下奇石得位置遺籜滿地蒙青莎金
山老衲佛印舊題句荆公振筆不和歌詩清字瘦畫

增重四角朱印森遮羅憶髯道場寫風篠掀舞之
勢曾自哦醉墨吐作蒼蒼石涪翁擊節無差訛干
秋妙跡落吾手寶惜豈啻隋珠過堂上忽闢梁王
圃清陰一片堪婆娑竟須散髮尋畫去緇塵十丈
奈我何

白鸚鵡

奇禽寧並隴頭看南海攜來雪色寒珠樹流音藏
縞袂雕籠刷羽側黃冠殷勤妃子呼娘舊刻畫王
維作賦難鎮日依然紅豆飼誰教言語凭朱闌

舊爲

二妾薛
娘所養

歲暮絕句八首

捷書萬里奏明光吳淞餘氛掃夜郎 詔下金雞
恩似海西曹三日縱囚忙

松聲不敵市聲譁初地從教信貨遮一樹蠟梅開
磬口他鄉還買故園花

石塘新稻雪翻匙北海鱸魚斫玉脂更有老饕堪
賦處熊肪和蜜貯宣瓷

雕弓羽箭拜 天家曾獵甘泉逐翠華老冉冉來
懷抱改焚香掃地是生涯

蟹爪樹枝看郭畫藏經紙色 宣爐漫言好事囊

羞澁明歲新捐宦戶租

不分輕霜上鬢絲
逼除風景羨兒嬉
黃昏燈火仍多事
遍和鄰翁歲暮詩

莫爲廉吏世爭談
大厦誰知要杞楠
不信但看于定國
承恩制府又江南

令弟公車早着鞭
中男詩句效斜川
提攜不淺天涯興
况是昇平獻頌年

熊肪

猛獸曾占吉夢來
深膏截出色皚皚
人傳方法調蜂蜜
品愛珍奇過豹胎
映燭共誇和氏璧
摘文誰

並孝威才盤餐點綴三冬候
一片霑脣酒一杯

同弟介山兒至守歲用放翁夜聞湖中漁歌韻

堂上煜煜然松明千家爆竹同一聲
地爐暄暖共守歲
門帖爛熳香煙縈
嗟余幾年逢此夕
風雪僵卧長安城
天涯骨肉今在眼
有酒奚用琵琶箏
中夜盤餐逮僮僕
勞以大斗談鄉情
行騎瘦馬謁闈闔
干戈纔罷滇南征
太史正議郊廟樂
鳳來阿閣卿雲橫
座右忽覩浯溪頌
愧無此筆歌昇平

過永慶寺懷文然道人

道人閉關三十餘年本朝定鼎三月後始

知
古巷如空山幽絕招提境春風扣禪扉斜日林間
靜小別二十年依然磬聲冷不見白頭僧間堦踏
松影

三賢咏

蘇門徵君孫鍾元先生

吾道有攸屬徵君儒者宗椒山共里閑少多烈士
風孝廉舉弱冠懷抱凌蒼穹傾身救揚左高義等
華嵩更入賢相幕談笑籌兵戎晚值滄桑變俛首
簡冊中蘇門山水窟誅茆寄遐踪生徒環講席一

代開羣蒙百泉闡妙旨濂洛淵源同豈學鸞鳳嘯
聊以卧雲峰屢徵不一起魯齋有愧容伊余景行
切千里思扶筇雖託弟子列恨未接猶龍雲霄拜
短札薄劣荷陶鎔迄今二十載太行仰龍從朱絃
失遺調嘆息撫焦桐作詩明嚮往滔滔水流東

青原藥地大師

無公絕世人變化不可測當其直玉堂文采照京
國良讌招清流頗好傾城色如何過江後頓歛搏
風翼僧衣製水田鬢禿面鰲黑閉關高座時杖履
余初識新編讀炮莊創論豁胸臆妙畫逼雲林不

自人間得旋摘礪邊蔬殷勤授余食裁書寄侯嬴
中情殊惻惻時託余致書朝宗別來二紀餘悵望曷有極
遙聞住青原愈盡頭陀職種藥手如龜優入清淨
域滅迹向巖巒高風邈難即始知學無生端借英
雄力燈傳曹洞宗史載尼齊側

易堂魏叔子徵君

從來巖穴士未必工文章叔子著作手李杜同光
芒翠微高千仞其上開易堂提攜好兄弟彭躬丘
邦與相羊隻字落人世金石韻鏗鏘不知老將至
馳驟翰墨場前年奉明詔史館待子長使者登

門請卧不下匡床身如九苞鳳天外恣翱翔余時
客章貢蒹葭咏蒼蒼竭來子猷棹忽過空峒傍爲
我留十日周旋罄壺觴晨昏晰疑義子弟羅成行
老筆一揮灑卷軸俄盈箱謂此矍鑠翁晚節樂未
央何期別數月大鏞聲消藏迢迢五千里淚不到
山岡空餘不朽業諷讀悽以傷我名辱遺草藤蔓
附圭璋

題沈石田畫冊次原韻十二首

一曲溪山興不疎幽人自昔愛吾廬韓公曾取莊
騷配把讀應知是此書韓公論文嘗以騷配莊

參差竹樹短墻遮有客來尋溪友家恰似放翁居
蜀日頻拖藤杖訪梅花

草堂幽絕似成都几席何妨即五湖鎮日詩翁相
對坐桐陰滿地角巾烏

杖策迴溪上雲山許獨知斜川有高詠想見義熙
時

兩岸蒼煙暮靄一江細雨斜風波上輕鷗迴白林
間古寺微紅

風柳捎船水作鱗網來白小色如銀何須高卧幽
窗下始號羲皇以上人

水蹙鞞紋激灩清長林巨壑送猿聲依然敷淺原
中見觸迂篷窗夜咏情

叢篁臨水碧老柏點霜新破帽攜琴叟前村訪酒
民

羨爾高人作意遊松間磐石任淹留清琴橫膝渾
忘弄坐看飛泉百道流

湖山入手是樵漁艇子遙尋水竹居斷岸空林堪
小泊樹根還讀道元書

江村籬落接平沙野菊斑斑欲放花更愛一天好
秋色爛紅楓葉作朝霞

野岸梅花雪滿條空江風色晚蕭蕭漁翁詩思清
寒甚誰寄燒春一瘦瓢

春日紀事二首

祈穀當開歲張燈逼上元旌旗諸道撤簫鼓萬家
喧遠島輸蕉布深宮啓獸樽昇平新有 詔歌舞

遍荒村

八載神功著銷兵見此時獻囚符衆論考樂飭專
司上壽徽稱備 元儲典學宜爲郎雖白首鳥獸
共恬熙

水仙

海國名花冰雪姿叢叢冷艷浸漣漪黃冠乍識仙
壇返玉體橫陳小閣宜雙蝶不侵香寂歷孤梅相
伴影淒其開門無復澄江在惆悵涪翁一首詩

上元前一夜留錢介維小飲用梅聖俞荅吳
長文內翰遺石器八十八件韻

冠蓋紛長安我心仍樵牧寒梅如佳人愛此顏如
玉花間賦新詩古調恒自勗今節逼上元傳柑有
遺俗故友乘夜來蕙帶清我目小齋縱高談欠伸
頭抵屋壁掛舊歲燈一盞已云足瓶罄易水醪繼
之燒春酷奚必烹熊踏剪韭亦旨蓄中酒讀宛陵

髣髴金石錄

上元過慈仁寺買書

買得十六國春秋天下名山記

華燈九陌掛春風獨買殘編古寺中蠟屐久懷康
樂好紬書今識彥鸞工窗閒冰雪歸堪把月下笙
歌興不同明日又愁公事擾西曹讀律技偏窮

十六國春秋崔鴻著彥鸞其字也

元夕口號

紙燈掛壁酒盈杯草草元宵又一迴解道流年隨
手過梅花如豆已全開

放翁有流年隨手過之句

正月十六日送葉慕廬歸樊口

雪泥輕塵霽色開送行還藉上元杯旗亭草發東
西路歸棹人尋大小洞十子詩名容我附二毛郎
署望君來不須苦愛松風好祇向空山卧碧苔

春日同湯潛菴介山弟至兒過聖安寺小飲

有懷高念東先生

寺在柳湖有旃檀佛像常陪念東先生來遊

草色纔青放馬蹄春風隨意過招提旃檀又拜諸
天像楊柳兼尋幾曲堤精舍閒花留對酌空牆醉
墨和前題曠懷不見香山老回首雙林落日低

吳漢槎歸自塞外邀同王阮亭祭酒毛會侯

大令錢介維小集作歌以贈用東坡海市詩

韻

塞外長白橫長空吳質廿載冰天中豈意玉關得
生入雲霄重望蓬萊宮哀笳聽罷鬢毛改縱橫老
筆偏能工魚皮之衣捕貂鼠曾披榛莽尋黃龍計
倪寓書感生別謂甫題詩慘絕梅村翁歸來兩公
已宿草惟君懷抱猶英雄時平好獻大禮賦少陵
遇合寧終窮相逢一笑快今日俯仰况復當春融
談詩命酒皆老輩何惜頻倒玻璃鍾楛矢石罟誇
創見君之所得亦已豐夜闌醉眼望天漢恍疑鴨
綠磨青銅世間萬事一海市且看梅萼開東風

和藝圃雜咏十二首

有序

藝圃爲吳郡文文肅公別墅崇禎時萊陽姜
貞毅先生以言事獲罪流寓江南得是圃而
終老焉今先生之子學在讀書其中鈍翁阮
亭諸公皆有圃內雜咏伏而讀之如見文肅
貞毅之高風暇日聊爲屬和用志嚮往云爾

南村

墟里何莽蒼人煙疑谷口疎林帶茅茨空山對戶
牖緬彼荷鋤翁春風事南畝

鶴柴

縞衣海上來結此煙霞侶警露失孤眠
唳月思遐舉放去效雲龍蹁躑何處所

紅鵝館

虛館面碧流雙鳴任容漾斜日賞花開
梳羽空洲上想見晉代人臨池鎮相向

乳魚亭

閒居種魚苗一泓開碧沼噉喙亂淪漪
倏忽穿荇藻徙倚向空亭濠梁趣不少

香草居

幽芳羅戶庭萋萋蘭與杜采摘紉余襟
髣髴瀟湘

浦持贈念佳人風前獨延佇

朝爽臺

朝遊上崇臺吳山何突兀雨餘嵐氣生
氤氳遍城闕白鳥去翻然相看坐超忽

浴鷗池

濯濯野岸鷗慣與高人狎雖遊曲沼中
終不逐鳧鴨湖海共忘機幽盟詎須歆

度香橋

遙川迴空明紅橋列雁齒淙潺響珮環
荷香滿中沚溪翁曳杖來陣陣微風起

響月廊

竹煙翳修廊寂寥非人境月華浩然開寫出檀欒
影靈籟颯空林徘徊夜方永

垂雲峰

孤峰擢片雲誰截洞庭秀菱溪謝寄嶽雪浪愧比
耦青天揖丈人咫尺風雷走

六松軒

六叟盡支離老作蒼虬舞盤空翠蓋停清陰散廊
廡側耳聆驚濤幽琴正堪譜

繡佛閣

居士多微叅焚香坐小閣倚檻讀楞嚴孤懷寄寥
廓時有林棲僧同來聽簷鐸

乾清門奏事用王維早朝韻

鴉盤宮樹鳴月落金門曙啓事逐上卿迤邐層霄
去氤氳接御香咫尺垂衣處欣飛感昔年執戟
隨騶馭

余家東齋櫻櫚一株花開最盛偶讀岑嘉州
對酒櫻花香之句悵然有作

三逕當年興不疎幽花簇簇愛櫻櫚晴窗偶讀嘉
州句一倍春風憶草廬

端午夜示兒至用東坡與邁聯句韻

客散雨忽晴如眉月初吐庭榴千葉明風枝捎半
戶逼檻振斯螽張燈走黠鼠小啜頭網茶徘徊步
廊廡嵐影落遙峰露華霑絺紵生平耽勝遊屢結
登山履句喜得斜川冠將掛神武悵然念汨羅一
弔風騷祖

題阮亭祭酒讀書圖

紅葉蕭蕭下短楹幽人如鵠坐秋聲吟成五字菜
黃洗好並溪流徹底清

秋林我有讀書圖寂歷空亭碧礪隅今日題詩還

一笑兩人風調不曾殊

夢中得起結二句醒而足成之

槐葉蕭蕭菊蕊黃傷心歲晚又他鄉夢迴寂歷風
開戶一縷蛩音月滿床

張水部晴峰雷琴歌

絙桑以來紛制作國工好手不記名有唐雷氏起
蜀郡妙合變化通神明時代悠悠已千載遺製猶
復傳冰清所嗟賞音杳難覲塵埃碌碌埋精英景
州張公僻好古焦尾適遇中心驚徽軫脫落絃斷
絕世人那解無絃聲司空清俸不復惜解囊買得

千金輕吳門奇士善髹洗疏剔空竅勞經營鳳池
乍啓露欵識大唐雷氏刻畫精修治完好一再鼓
冷然肘後松風生勝日高堂會嘉客賦咏題遍名
公卿平原馮君擅八法馮進士大木更合衆作驅墨兵
松雪妙楷入神化一物數絕相兼并余也嗜痂亦
有癖論辨古器甘如飴矧茲七絃具妙理搏拊可
使心和平幾時從君滄海岸流水一曲移吾情

戴氏鼎

烹飪著羲文象物垂夏紀時代旣杳茫制作紛變
詭魯贗或亂真泗淪未易起曠望千秋間鴻寶存

有幾戴逵博雅宗古器藏累累胡來玉鉉珍光怪
動神鬼馬鼠聊記年饕餮不見尾體格云是周秦
漢匪所擬萬緡未足酬百朋豈但已圖繪振希聲
詠歌集繁綺劣眼昧蒼黃什襲未敢啓耳食拱璧
名亦復輟然喜紀甑無遺形籥鼓徒屢徙何如法
物傳想見清廟禮遥羨棊几供摩弄移日晷

綿津山人詩集卷十三終

綿津山人詩集卷十四

商丘宋 犖牧仲

海上雜詩

康熙癸亥秋余以通永僉事奉檄偕部使按
海濱地自鹽山抵山海關紆迴將三千里爲
書裡日三十有八得詩二十四首率於馬上口占
授兒至使書之用代紀事云

雲濤翻萬疊曠覽到天涯野岸懸鷹網鹽池引浪
花草痕消斥鹵颿影落敲斜漢武荒臺畔愁聞日
暮笳

畫角傳荒戍征旗指大沽雲沙看不極疆理辨全
無茅屋行彭越天風送海鳥晚潮吹地至想像百
靈趨

到面霜威凜驚鴻報晚秋鹽花疑雪積海氣似城
浮野飯難求井居人盡狎鷗神山何處所天水共
悠悠

訪舊津門道聊停倦客車樽前嗟鬢髮燈下出圖

書展帖驚狂草看山擬卜居寶章余有錄珍重劫

灰餘為同年孫茂先作時觀張長史墨蹟文待詔畫

雙林仍小憇花藥徑纔通古鐵珍高邑寺有趙儕鶴先生如

意匡床借贊公妙香清夜得圓月碧山同魚麥勞

鄉思搔頭磬響中

在昔新河口曾漂海大魚然脂分異縣遺骨尚專
車風物聞皆別農桑望轉虛自慚鞭算拙闢土定
何如

鬼蟹蹲沙惡狼魚出網腥海翁瞻使節竈戶作郵

亭岸隔關門紫波涵島色青輸渠張木筆臨眺賦

滄溟

客路偏增感西風况海陀重泉添骨肉謂姪弟陸著兩兒

故里曠煙蘿斑駁三年鬢蒼茫萬里波佩萱徒浪

語腸斷黑洋河

十子成高會

葉井叔林蜚伯曹升六田子綸王幼華曹頌嘉顏修來汪季角謝方山及

也千秋有素期况從王祭酒風雅得宗師熊白雪

中賦仙巖花下披

余藏董文敏仙巖圖

幾多離索感暮雨聽

潮時

小船如鴨嘴荒步號煙頭所見詎曾見言愁真欲

愁危旌沒亂葦霜月照空洲晚飯知何地塵風雁

影稠

沃焦秋更熱噴薄下灤河眺望蛟龍窟微茫十九

陀

相傳唐太宗征高麗住此十九日

地憐榆塞近人說釣臺多上海

多有太公釣臺侍側中男在雙江續舊歌

真欲窮荒外追隨節使行朝朝觀日出夜夜聽潮

生浩蕩求僊志艱難徹土情何時沙磧裏提榼餉

春耕

七里亦名海寒潭作鏡平數峰當岸秀雙鷺照波

明漁艇通蒲泊村煙接柳城因思靜修句世累一

簑輕

七里海蒲泊柳城皆在昌黎

千里惟遵渚連峰又見山石林開鳥道雲海對禪

關濤拍牛頭響巖留話石間秦碑淪沒久鷗泛自

沙灣

連峰山牛頭崖話石皆在撫寧

海上雜詩

傑閣從前代

山海關城樓

平看碧海流千年留碣石一

髮辨登州潮送斜陽落風傳絕塞秋倚欄聊咏志

俊鶻下荒洲

峰逼榆關起巉巖振策尋路危緣石齒寺古抱山

心

角山寺

泉滴苔紋綻猿啼榭葉深暮天飛鳥外海

色碧沉沉

看松越孤嶺大壑啓山庭荒塞一痕白遙峰千疊

清流泉靜宛宛伐木遠丁丁安得金鷄嘴提攜劇

茯苓

聞說懸陽洞秋雲隔幾重千層垂石乳四面繞蓮

峰疏沼養飛瀑推窗揖古松老僧年九十塞外自

鳴鐘

洞在關外

迴車肥子國涉水憶俞兒過雨空山路斜陽落葉

時明刑傳父老開府繫安危灑淚還加勉寧惟愧

主知

先莊敏司李永平先文康開府畿左迨榮來三世矣

大小經沮水青黃看栗林村孤煙窈窕邊近氣蕭

森攬轡當秋霽聯床感舊吟

憶灼弟也

中年幾哀樂那

禁二毛侵

高卧香山老家藏寒食詩涪翁原自重襖帖未云

奇宣示來村店摩挲埒鼎彝春江欲入戶還憶寓

黃時

遷安劉魯一先生以東坡寒食詩真跡見示黃州余舊遊地也

啓聖傳孤竹清風異代存渚蘋田父薦社鼓廢祠
喧虛榭憑雲豁方舟次水門聽松斜日裏疑是海
濤翻

桂檝擊空明斯人共一清如何禋祀地偏洽嘯歌

情舉網素鱗活當杯纖月生因風寄錢起早使報

章成

謂介維

楸峪看雲過溫泉策馬還依然趨潞水無計入盤
山夢穩風濤外愁添簿領間新詩如束笋燈下手

頻刪

楸子峪溫泉皆在玉田

讀海上雜詩偶成

王士禎

不見宋生久詩來海上峰振衣臨勃碣長嘯動
魚龍孤竹瞻高節烏丸指舊封聽潮相憶處吟
盡角山鐘

讀海上雜詩次牧仲用山谷韻

鄞縣周斯盛 此公

江州嘆車中閉置何其拘使君獨清曠官舍得
疎疎轆轤豈不殷未嘗廢讀書策馬歷山海浩
蕩足自娛遐哉孤竹蹤荒矣秦皇墟萬象入新
句奇懷一以舒暇尋招提宿飽食僧厨蔬洪濤

送涼月毛髮濯冰壺庶幾赤石遊謝公乃其徒

綿津山人詩集卷十四終

盡角山餘

商丘宋

綿津山人詩集卷十五

商丘宋 犖牧仲

漫堂草

秋日望盤山用山谷二月二日曉夢會於廬

陵西齋寄陳適用韻

隨牒作馬牛兒女鎖房闥朝來稍蕭散快值涼秋
月庭槐垂陰濃不厭蟬響聒蔬畦聊支筇曠望渺
城闕盤山排空來千巖迴秀發浩然遊興生輒欲
着布襪五峰儼芙蓉蒼樹如髮往者此林巒卧
雲得怡悅棲遲古中盤飽餐僧厨蔽高吟答松濤

岸憤擊銅鉢連篇鏤肝腎誰能狀毫末還經瞭甲
石愛聽泉活活今我蒞此邦一俗直到骨吏事有
程期曾不失圭撮埋頭簿書間風騷謝鞭撻何期
行藥餘忽覲煙嵐窟妙句佇英游庶無三獻刑薄
宦雖漫爾終愧厠簪笏他時紫蓋巔長歌采野葛
冬夜留周圯公漫堂小飲用山谷答秦少章

乞酒韻

我本湖海客苦爲吏事拘眠食簿領內漸與文翰
疎牙籤不觸手空羅千卷書之子遠見過寒夜留
清娛新篇氣浩瀚如水奔歸墟故疾逢蝦蟹使我

嘯咏舒起步霜砌月更剪官園蔬漫歌驥伏櫪且
爲傾百壺緬同蘇州宴還招騷雅徒

約與錢介維相晤

擬韋蘇州郡齋雨中與諸文士讌集用圯公

韻

恭承大藩地奔走靡餘閒一雨鈴閣靜小類丘壑
間華池帶叢薄曲折堪躋攀賓從盡時彥文酒相
往還招邀賦公讌藻思應劉班觴至輒復傾嘯傲
開心顏經時掃地坐有如馬在閑鴻鵠天外慕簿
領座上環疇能減獄訟高卧寧市闌煩襟滌流水
清響來淙潺友聲余有求况聞鳥間關申章聊咏

志寄跡懷空山

秦皇島望海歌用子瞻題王定國所藏王晉卿煙江疊嶂圖韻

渤海之岸聳斷山橫截巨浪排雲煙人言此是秦皇島迴岡輦道留依然白頭山僧葺古屋晨炊遠汲荒村泉危磯犖确帶沙石盪胸萬里開長川天吳出沒老蛟舞百靈彷彿驚濤前我來渝塞正秋晚蒼鷹叫侶摩青天鞞紋波細風忽止白鷗容與殊清妍俄頃變幻不可測歸墟豈必非桑田秦皇已去漢帝至孤臺野岸空千年蓬萊方丈在何許

一眉新月來娟娟解鞍脫帽便此住砍松煮藪容高眠移情愛鼓伯牙操無須恍惚求神仙秦碑磨滅蘚花繡誰能與結翰墨緣欲鞭蟄龍作海市良慚玉局登州篇

觀子瞻寒食詩墨蹟次其答舒教授觀所藏

墨韻

董文敏曾摹刻戲鴻堂帖中今在劉魯一先生處

書家三昧貴偶然右軍戲筆留隸几蘭亭再書便不佳千載風流傳片紙眉山人物岷峨高興至揮毫亦可喜剡藤半幅寒食詩玉環艷態真自比同時四家盡崢嶸不衫不履端讓此公惟意寄筆墨

先瓦池柿葉皆不鄙蛇蟠醉帖好事求敲門幾煩
中夜起况茲春江入戶篇價敵元龜與象齒憶公
困頓黃州年破竈濕葦輿隸恥誰知禁錮徒爾爲
一字一金固其理涪翁心折跋語公書則平原詩
則李想當掀髯奮袂時元氣淋漓任驅使北平亞
相博物才什襲雖多此最美寒宵遠道許借觀展
卷光芒拱壁委戲鴻摹勒良苦心僅得皮毛遺骨
髓起磨隄糜學雙鈎雪打窗櫺冰硯水

木瓜聯句

同錢介
維兒至

嘉果美中州碩大懸楸木蕪檀香勝棠烝栗色嬌

玉種處異東門摘日當西陸

仲牧

李生怪心空柰似

喜瓣簇數枚燕公袖五株華林曲

介維

實成壓哀梨

花發值杏粥刪葉煩村翁綴枝駭園鹿

至

斗漫誇

赤萍卵或遺黃鵠蠻榼顛遜芳諫果品同肅

仲牧鹽

山恨未登何賦快曾讀光怪金纍柯聲價珠傾斛

至曰瓜省鋤勞非棗惱鄰扑韻繼萬卉凋收比五

穀熟啄防大嘴烏蠹剔在桑蠟

仲牧

攀取得團圍拂

拭藉巾服

至

素商吹自幽青女飽更馥藥物宣城

良土賦杭湖足

介維

裝疑海國珍權慮關門酷

遞競兼程秬載妙盈簾

介維

聽鸝鄙一雙耀車當二

六懷橘自徒爾過江能化不仲牧濡澤佛手慙氤氳

仙掌出嶺南恣至持贈燦筐筐護惜視寒燠仲牧磊砢

幽人喜饗饗稚子欲至盤盞位置高橙柑娣姒屬

雖謝霜袖圓頗笑凍芋縮仲牧種憶黃臺分蔓匪朱

陵續蜜脾潤詎乾砂斑點未浴供訝緱氏埋削宜

公輸督維介當俎菌蠹敲縈座霏微獨仲牧冰骨傲雪

霜膩色逞膏沐侑酌薰夕窗伴書媚朝旭至鼻觀

趁靜便手弄戒迫促仲牧釀酒和秫糝瘳痾薄參茯

至豈惟呈陸離兼能已拳蹙維介夥薦傍畫屏醉攫

翻碁局釋名酢可餐御冬旨借蓄仲牧酸苦愁客心

苞苴感末俗宛將柅蠟搏邪異鬱金築維介三復報

琚篇相投莫碌碌仲牧

題錢舜舉畫牡丹次阮亭祭酒韻二首

一笑嫣然大小姑魏姚姿態未應殊春風吹起西

京恨頭白溪翁寫舊株

紙上分明兩折枝雕欄浥露晚春時殷勤欲向朝

雲寄愧少西崑艷體詩

蠟梅次阮亭韻

孤山幽韻出新粧瞥白深宮見靨黃解道能春水

雪窟何須攔入百花場

遊夾山寺用放翁瑞草橋道中韻

埋頭簿領無少暇奉檄東行馬一跨夾山之寺得
得來曉望林巒郭熙畫老僧出戶驚龍鍾天女窺
人儼姪妣全家避難憶曩時晨炊蕨麵然山柘重
遊忽復四十年依舊寶坊草可藉膨脗槐腹倚斷
碑欲墮雕甍一木架大青小青蜿蜒留尚畏春寒
藏石罅余昔弱歲今二毛于役盤桓信天借雲峰
丈室擬躋攀已抗前旌難稅駕臨風感舊詩易成
寫向黃茅菴裏舍

寺有大小
青二蛇

過明月山

冰泮迴溪響珮環煙林一簇鳥間關春風斜日小
燕峽又見天邊明月山

龍泉亭恭步先文康原韻二首

何限低徊駐馬心方塘無復舊泉音蒼松怪石能
相待向夕空亭取次吟
鼓棹難酬醉月心張琴且爲和松音微聞父老殷
勤語還似先公擁鼻吟

春日寓遵化有感

燕塞重來感鬢絲斜陽衰柳動春姿嚴城擁節懷
親日古寺挑燈哭弟時

時聞弟
所之變

父老有情相慰藉

雲山無恙但淒其驅車愧作觀風使勉和龍泉一首詩

從寺僧借楞嚴經

經時俗韻得針砭白板禪扉月影纖三尺文書且
高閣却從老衲借楞嚴

龍山寺

寂歷龍山寺山形似擺旗門開黃石亂殿倚碧峰
敲迸砌樹空腹撩人花滿枝春風正駘蕩蠟屐任
吾之

遊五峰寺二首

刻意作勝遊蕭辰歛晴靄五峰逼窮邊丘壑莽奔
會無終固擅名茲山足兩大首路緣澗脣水石相
映帶青松膏沐新延望殊蔚蒼層巒抱花宮不異
營丘繪簷楹肅而幽翠嶺壓紫蓋鴨脚輪囷奇直
上虬松最何物清客心長空響竽籟虎崑有遺踪
鷄石迴荒昧登探無限佳小憇飽粗糲振策凌絕
巔人影落塞外山鷓戛然鳴踟躕發深嘅

峰虎崑鷄鳴石
俱五峰之勝

無終山
名紫蓋

披榛下寄崆塔院尋古屋曲磴作蛇盤咫尺迷林
麓姚秦碑版二石幢字堪錄金元彈指間摧折如

斷穀粟殼刺芒鞋扶持困童僕脫帽榭葉庵四顧
軒窗樸山僧不出山見客同驚鹿萬松足怡情徑
不種花竹淹留聞磬聲還爲設茗粥憶昔祭戟臨
題詩愛幽獨趨庭余稚齡左右奉巾幅今疑隔世
遊有子相追逐飲酒大父風和歌頗能速人事幾
推遷繕性嗟難熟彌勒願同龕丈室那更築一燈
對楞嚴妙香來空谷子至侍行

菴花寺弔李光四處士用宋趙師李壁間韻
幽絕招提境嘉名自昔云陽崖疎樹映大壑亂淙
聞日暖催紅杏堂空養白雲鹿裘邈何許猿鶴尚

思君處士名孔昭薊州人明進士高隱常往來此寺

重遊盤山七首

盤山如盤龍舊名爲四正幽燕之奧區百里勢奇
橫五峰插碧天羣岫如奔命我行越薊丘曠望迴
生敬趣途隨山樵短筇喜孤勁千像凌晨經樹石
莽疎映矮塏儼衆僧導客來相競靈椿學虬松法
界殊清淨澤鉢失淪漪搖石具情性登攀忘渴飢
亦未暇吟詠頰首紫蓋峰會當持其柄千像寺有澤鉢泉搖

動石

去去遵山麓溪谷何成遲芒鞋鬪石齒竚立宜輕

颶迴岡穿老屋零落餘采愚艾而張網羅禍機嗟
虞師盤泉響珮環隔嶺聽愈奇既至得舊觀太息
水之涯照影驚皺面仍不改漣湔中盤白堦院少
林紅龍池停屐還振策胸已無險巖山心探初地
天藻仰穹碑道人知我來爲我掃茅茨松石知我
來爲我發幽姿所恨春尚早杏萼閱華滋經壇少
淹泊東菴榛還披月明嘯高閣願與山靈期
萬壑激松濤空山黯將夕失道困蒙茸蒼耳時一
摘谿欲勢搏人却步憐跼蹐稍循迳紆未怕層
巒隔人語驚栖禽老鶴聲格格聞鐘投寶坊片月

簷際白登臺撫長松天畔留岸幘鄰僧邂逅逢茶
話意良適河漢手可摩猿掛看林隙靈境清心魂
欲卧不安席頭陀催閉門云有虎行迹

此首謂
慧業庵

遊山如噉蔗佳處得以漸萃律掛月峰磴道一何
險孤堦入雲汀殿閣聳巖广探奇並鳥飛耳畔罡
風颭積雪明皚皚晴靄間冉冉幽磴藏上方禪扉
日夕掩老僧雖屢邀未去同回剡捫藤勞抗尻狂
叫等驚魘嶺脊得少休聖燈想光閃佛牙禮金棺
捧視意還歎盈盤薦棗梨地僻僧厨儉嗟余攜幼
來非向金仙詔愛作八極遊齊煙看九點

昔余吟五字幽賞企青溝凌風越西嶺攔入麋鹿
遊谷口訪邃洞門閉巨石留何時名將軍古蘚纏
兜鍪異鳥靜相語聲比山呼鳥名優松鼠竄窸窣
尾招其儔顧盼出叢薄花宮臨荒陬茅屋八九間
彈琴藏湯休新詩感祭酒謂阮亭奚啻珊瑚鈎黃精
潤齒頰名畫清人眸觀趙文敏寶牖圖幾年緝山志往牒
窮冥搜遺世幸同調矢口談莊周誰謂白蓮社高
風獨千秋此首爲拙庵賦
遊興動枯禪偕我登疊嶂煙嵐青冥濛斷續來樵
唱幽處衛公菴松石訝殊狀位置造物工左右恍

揖讓崎嶇到寺門劍臺屹相向纔聆梵放幽旋策
登高杖蘄絕苔壁橫徐緣石脉上篝火尋題名畫
腹辨字樣新月正如舟散髮一疎放人生蟻旋磨
今夕愜微尚四山響木魚清切聞法藏寺名風起海
雲鋪從師問真妄

曉起問歸路天城寺名經山隅如行鐵堂峽石氣侵
肌膚嘉果不知數千章雜槐榆林端響啄木顏色
憐衣襦幾日天爽開想見絕代姝峭壁壓臺殿詎
與屏風殊松篁紛點綴摩詰當能圖涓涓山脚泉
一寺皆霑濡折松作麈尾酌泉貯銅壺歸示華亭

客維介定恨不並驅簿書行委座柳粟何時扶

登豐臺太乙閣

海濱樓閣上清居碧瓦金莖落照餘幔捲靈風開
玉座鼓喧春社駐雲車明禋待舉甘泉祀宵火曾
窺子政書倚檻長空數歸鳥楚詞哀怨憶三閭

朝鮮牡丹

花葉羅羅傍檻披也從穀雨鬪芳姿沉香亭暖柯
全改鴨綠江空種乍移苞奪臙脂明霽日穗分瓔
珞颺微颺慙一剪穠春色會遣朝雲識此奇

送友人歸蘇門二首

送子故山去蘇門尋嘯臺遺音想鸞鶴古屋掃莓
苔砌下百泉沸窗中千嶂開飄然欲一往惆悵離
筵杯

平生懷有道引領夏峰村

謂孫鍾元徵君

爾去枌榆社還

經薜荔門清風留夢寐白首課兒孫揮手潞亭畔
綠槐晴鳥喧

夏日喜吳天章見過即次其貽介維韻以贈

觸目潞亭無一可盤山且喜在東郊觀河只媿蕭
騷鬢種菜常思大小巢座上故人談娓娓枝頭好
鳥聽交交匏杯醉向南榮卧未利香風過枕凹

遊聖泉

泉在密雲南山下志稱聖水鳴琴咸南塘常遊此

石窟雙泉吐迴波
蔭碧林淒清如裂帛
京師西山有裂帛湖
蕭瑟自鳴琴
破寺鐘聲和荒渠
蘚色侵老僧
談往事小隊此招尋

登冶山尋仙人洞用元王璉訪徐良夫韻

于役經檀州禪房養愁疾
行藥尋林巒自顧負奇癖
冶仙有遺構塔院看歷歷
風榛蔽鳥道紆曲轉
巖石絕頂縱遐矚
連峰更攀陟龍劍去已久
燈光傳靈跡崖敲若堂隍
古洞玉潭寂跼躄躄盪餘境
異心有得振衣望窮邊
千山黯將夕彷彿霄漢間

笙鶴忽來覲

綿津山人詩集卷十五終

綿津山人詩集卷十六

商丘宋 犖牧仲

漫堂倡和詩

漫堂與朱悔人夜坐出示曾青藜周青士詩
箋即用青士鐵舟讌集韻

花發傍地爐斗室安且燠隔牖聞驚風冰折階下
木歲晏鎖印餘來對萬卷宿高談得夫君偃仰愜
所欲碑版窮籀斯名畫亦在目時話匡廬遊緬想
康王谷更授處士篇敢不拜命辱冷然金石聲厥
品維嶽瀆放懷聊和歌跋燭頗能速何異登鐵舟

吟社一再續呼童滌匏杯漉酒出豐潤漱灑屬清琴

座間橫古調宜共勗

奉和前韻

潛江朱載震悔人

迭謁觀四運久旅忘寒燠攬衣向空階雪光搖落
木短檠几閣熒晚霧層檐宿有懷歲將晏沈吟同
所欲圖史恣幽探燦然豁心目時復憶貧交諮訪
到巖谷梅里與易堂處士名不辱愛才有如公廣
大同嶽瀆翻念經年別時序何太速迢遙東南望
高會幾時續大雅今未墜舉杯為公屬裁詩寄二
子今德永相勗

甲子除夕同悔人賦用曹升六舍人贈基兒韻

當今天子龍鳳姿坐致太平民物熙上陵瑞雪
孝思感豈必甘露麒麟芝沿牒良愧此卧理維齊
蓋公真吾師香凝畫戟遡先烈兩世姓字豐碑遺
瞻言祖德咏廸志循墻而走潮河湄竭來歲序類
轉轂千門爆竹聲相隨一時賓從得老輩掀髯抵
掌談風詩願與周旋屬橐鞬松陵皮陸堪繼之自
顧往往出下駟敢分壇坫稱工倕漫堂守歲燔兔
首明燈積雪光離離盈觴漉酒莫遽醉五更三點

起祝釐憶昔欣飛值此際執戟恒拂宮花枝祇今
短髭白頰鑷但未龍鍾來嘲譏盤山老衲屢招我
咫尺不去將何爲春風幾日杏花發相期濯足紅
龍池

奉和前韻

載震

雪消河柳搖春姿千門餽歲紛熙熙洩勃俱收走
牧豎誰辨赤箭同青芝凡魚作伴蟄汗瀆激流安
得逢川師漫堂先生雅好士旁搜汎愛無遐遺往
共論文金臺側招攜復向潞水湄孔李通門交最
篤更得小宋相肩隨

謂維德

守歲蕭齋竟何事爇香

酌酒一祭詩爲政風流迴不易才名節操將兼之
如余樗散成棄物雕鐫寧意煩工倕刻燭連吟鬪
健捷宛拂太阿驂纖離君家三世秉旄鉞東郊舊
德傳保釐焱民淳風今再覩塗謠式聽據槁枝丈
夫致身期不朽直道在人馮褒譏天遠蕩誅修且
廣翱翔馳驟任爾爲歌罷銅龍欲報曙栖烏炬散
飛差池

除夜懷王阮亭少詹黃湄黃門奉使嶺南
用青藜依園讌集韻

空階雪氣逼簾清又聽他鄉爆竹聲鬪箸冰魚當

燭眈浮蛆漉酒入脣輕與餘湖海慚初服醉逐兒
童鬧晚晴惆悵故人趨嶺表梅花香裏是王程

和前韻兼懷阮亭黃湄兩先生 載震

早梅香發入筵清風送街頭臘鼓聲盤點熊肪和
釀滑爐燔松火覺寒輕關心別歲聽宵漏極目朝
正問曉晴最憶海南奇勝地二王名紀往來程

齋中三詠

松雪齋集

雅願終身作蠹魚吳興集刻至元初華亭小記增
珍重不數虞山舊漢書

西園公子琴

夏邑彭堯諭

當年公子號知音也學中郎爨下尋今日登牀彈
一曲西園風調未銷沈

萬道人草書

徐州萬壽祺

年少襟期並鐵厓偶然賣字坐中街剡藤半幅山
僧寄醉墨淋漓亦復佳

和前韻

載震

松雪齋集

花溪沈氏刻

卷帙尋常厭魯魚一編精絕校讐言初吳興文字花
溪刻堪作淮南枕內書

西園公子琴

教嘈誰復解遺音彭叟風流尚可尋怪底漫堂偏
愛惜摩抄常到夕陽沈

萬道人草書

健筆蒼藤掛斷崖昔年價重洛陽街即今落落無
多字道是斯人便已佳

盤山拙菴道人書來有黃葉飄空白雲滿地
之語賦此荅之

白雲流地滿黃葉向空飄似此道人句寧殊叢桂
招聞鐘眠佛閣隨鹿過溪橋何限曾遊處分明入

夢遙

和前韻

載震

聞說盤山裏春風杏亂飄會須匹馬去不待老僧
招明月紅龍沼青松白板橋薊門連潞水東望未
曾遙

冬日寄牧仲觀察

秀水 朱彞尊 竹垞

今年燕臺數雨雪雪晴九陌吹回風欲鳴不鳴曷
旦鳥得過且過寒號蟲茸裘已敝庫尚典濁酒苦
貴樽長空故人念我儻分贈薊門白炭盤山菘

次韻奉荅

故人羈栖在輦下杜門委巷嗟霜風曰歸正須賦
緩緩小飲且爲呼蟲蟲書來大雪歲聿暮劍舞永
夜愁難空他年燒筍竹垞去飽餐那羨吳江菘

和前韻寄家竹垞先生

載震

潮河京東四十里往來策蹇衝寒風置身頗慚類
刻鵠過日訝許甘彫蟲千觴落手興不淺數帙滿
案囊寧空春盤待我走相聚黃芽脆並江南菘

人日出郭從響水牕過南溪寺觀先文康詩
版晚至觀音禪院同悔人用虞山先生自拂

水至吾谷尋南巖諸勝韻

時兒基孫
如金侍行

人日新霽宜遊騁飯罷兒童再三請東郊策馬一
放懷何必深林與峻嶺河冰將泮沙路融昨日風
霾息餘猛曲渚挑菜流光催叩首天涯嘆浮梗晴
雲斂盡氣乍暄擬脫敝裘兼露頂城隅響牕翻瀑
花匡廬開先到俄頃霆飛雷鬪耳欲聳大是奇觀
要細領迴堤迤邐野意多老樹長河背萬井吏人
莫進賓從佳旁午盤桓忽斜景招提訪舊罟魚傾
削磴雖存待重整周旋杖履三紀餘版上一詩還
記省如人短柏誰手栽不見叅天舊文杏傷心斗
室繩牀懸那得老僧同說餅壯歲已過訝抱孫仍

啜香臺一甌茗低徊欲噪林際鴉更尋南鄰初地
靜水精域裏欣慕生禪理貿然金在礦天童老人
夙所欽詎意空堂覩留影龕前再拜思皈依如汲
深泉乏修綆起登佛閣臨沙灣雲水瀾漫與天永
無終山色拂地來儼對佳人晚粧靚言歸衙齋閉
戶吟簿書且喜早春屏側理狂草作蛇盤蠟梅吹
香燈炯炯此情惟有朱髯知寧顧傍人怒生癭

奉和前韻

載震

野性從來愛縱騁聞說出遊不待請過歲三日天
氣和並轡東郊隄沙嶺草場之西牖流飛驚飈振

林恣怒猛佇立俯瞰逝如斯蒼茫身世等萍梗盤
渦不減玉淵潭泐滲恍陟黃巖頂長河彌望凍不
開日眩冰稜光千頃囂氛撲面苦赳赳幽意忽接
心已領此間勝賞人不識徒嗤躡躡窺深井坡陀
小逕廢寺通荒臺獨樹駐靈景歸然有版塵中懸
詩律清嚴字斜整相國風流宛在目年華逼人發
內省倚簷顧瞻原上村指數開田時望杏萬戶兒
童走跋跋拍手招呼啖煎餅僧貧竟爾學入俗文
公有僧貧難入俗句延賓升堂陳果茗導我郭南二里餘禪

礦登閣喜甚無纖翳殘照澹歛遙峰影欲向老宿
問無生怙悵臨淵但眠綆晚歸擘搯與不孤華軒
張燈遲漏永回首訇砢早雷奔還憶螺黛晚妝靚
樂哉此遊殊堪紀點筆操紙異慮屏公倡我和渾
忘疲起視窗外星炯炯街杯一讀一擊節且凭藤
輪敲柳瘦

春日過水月菴同悔人用阮亭少詹壁間韻

時攜錢舜舉
牡丹卷同觀

霽景佳甚停風沙首春遊屐趁放衙寶坊城隅不
數武清泉疎樹飄香花追隨上客愛幽絕琴樽聊

共開士家間房沈約有題字

謂繹堂
宮詹

疥壁誰使參

塗鴉雪溪名筆出行篋斐几爛熳留奇葩殘陽數
尺掛籬落僧雛屢進雷鳴茶高歌起舞逞狂態法
鼓取作漁陽搥禪栖遲暮學摩詰背癢奚事麻姑
爬南湖簑笠故無恙引領天末生咨嗟黃昏徇略
還小住女墻一抹明輕霞

奉和前韻

載震

我今尺蠖蟠泥沙銷磨歲月空衙衙公是老梅凌
霜雪春風一拂開繁花晝間興發何所適攜我步
屨來僧家祇林逕僻人跡掃窺簷時見翻慈鴉翦

綵作供盈百卉燦若陀羅飄天葩壁間新城盤硬
句味並橄欖蒙頂茶清言高詠日卓午遠聞街鼓
紛摻搗鄉思忽動不可極纏身坎壈煩搔爬竭來
雲溪寫生筆展對快意相稱嗟云胡不歸故園裏
飽看鹿韭烝紅霞

漫堂先生過海門出示倡和詩即用入日
出郭韻題卷尾

蒲州吳雯天章

憶昔少年尚馳騁頭顱四十愧朝請已知不是
宰官身自分常依居士嶺騰擲休任獼猴狂精

進當學獅子猛其如積習喜文字有類柔秭發
枯梗丹經一笑帛裹鬚皂帽幾頽墨淋頂惟信
胸中少鱗甲峨岬雪水一千頃食貧廿載成遠
游世態低昂暗知領本性往往受拘縛尺則鏡
困蛟龍井入洛安得比鄒枚懷沙只可弔屈景
公也威鳳知鸞飢作歌傷我羽毛整更念瑯琊
及安德殷殷慰藉常記省細雨空懷野寺梅春客
雨中王阮亭先生炎風幾憶巖關杏謝方山先生
約看花善果寺誰知羈栖東海邊公來同啖雲門餅
讀書圖賦詩甚多

漫堂伯和詩
九

爭上駟貪誦偏宜春夜靜才力韓孟各分疆交
情盧馬同一礦歸來長嘯驚神魚月明棹撥琉
璃影我亦蚓竅發蠅聲却使珪璋束藤綆公言
明朝當早發使我延望愁日永舉首高天雁正
過島嶼蒼茫晚猶靚移情是處感成連塵慮喧
囂一時屏故人己去鄉思深夢入通天見沈炯
低頭重懺起滅心木本無波木無癭

綿津山人詩集卷十六終

綿津山人詩集卷十七

商丘宋 犖牧仲

漫堂草

送李孝菴太守之官遵義二首

隨牒天涯去邊烽乍息時山川夜郎國風物竹王
祠露冕春行好銜盃別恨滋諸侯看負弩棘道擁
旌旗

離席留殘雪驅車趁曉鶯少年爲郡日遠道送君
情蒟醬憐行賈巴僮勸耦耕文翁遺範在早晚聽
休聲

題張青父清河書畫舫此書從竹垞檢討借得

清河書畫得新編何異襄陽往日船冰雪當胸開
卷帙風流過眼錄雲煙抄從太史由來秘副在名
山自可傳舊譜宣和余有續輸君先結古人緣余方

輯翰墨
綠一書

過河曲精舍同悔人分賦二首

長河環古堞別浦映疎林策杖迴隄去聞鐘初地
深杉爐燒鴨脚菜几玩來禽不淺滄洲趣聞房起
越吟

春淺冰花結寒光滿竹扉一僧開逕老千嶂隔林
微種菜宜煙渚撈蝦羨草衣他時芟梁上好把碧
筒揮

盤山拙公以野蔬見寄次韻答之

蔬名杏葉
豆葉豆葉

惟盤山與
匡廬有之

柔條纖葉碧叅黃春礪幽姿泫露光小摘雲林扶
短杖遠馳瑶草侑盈筐種疑上苑花時見菹憶廬
山雨夜嘗榆肉楮鷄誰得似殷勤真費道人糧

附 掇野蔬寄牧仲觀察

盤山 智 朴 拙菴

冉冉輕煙閃閃黃飯餘嶺上弄春光豆苗競茁
紅侵步杏葉才開綠滿筐偶摘最憐人不見小
鮮偏喜我初嘗非君古道誰堪寄只許山家作
道糧

春日憶淶波村用至兒韻

幾載春風憶敝廬粘天雲水望來虛何時放鴨亭
邊去紅藕花中罩白魚

春日書懷用竹垞檢討柳巷杏花歌韻

昔我遊雙江匡廬九疊往復經扁舟泛彭蠡如鳥
張修翎忽忽回頭已七載孤篷還憶泊落星榻來

客通路杖不扶郊垞簿書攪晨夕安得愁懷醒春
光九十隨手過如鞞奕萼嗟飄零婪尾行欲放送
花想園丁漫堂天陰對圖畫尺幅徒愛遙山青墻
隅疎柳手所種稊生金線紛婷婷參差石竹侵檻
碧灌溉時自攜銅餅朝來鄉心不可按側身南望
放鴨亭荷錢鋪水葦抽筍雙漿正好尋清泠冶遊
豈必羨吳會竹輿嘔啞闌支硯江湖篔簹笠故無恙
一聲漁笛何時聽寄書兒曹課種竹繞屋他日看
吟扉南榮鑷白亦良苦觀河吾自憎吾形隔城廻
帆聞搗鼓輕煙一抹連沙汀閉門科頭恣吟嘯氤

氤香篆留窗櫺盤空硬句寫胸臆吏人欲進仍須
停黃昏微颺響林末楊花如雪吹冥冥

附原倡 錢庸亭作

朱彝尊

頻年住會帝里一山一水何曾經有若蝸負殼

又若鳥剪翎疾風揚沙卷花去眼看春事如流

星邇來罷官居肆意尋郊坳朝從潞河還犯卯

酒未醒晨過漫雙橋東偏柳巷北小寒食後微

雨零偕行者二子各各駐輿丁杏梢含苞猶未

白柳條踈地今漸青晴絲冉冉香細細卑枝孃

孃高婷婷村童灌畦愛看客轆轤井架雙銅鉗

種花此地已難得那不更縛香茅亭江鄉爾時

春益好西神山下泉泠泠閭門遊人連臂出筠

車十里闐支硯即如南湖亦不惡桑鳩穀犬聲

可聽穀犬蛙也紫荷花草雜坐卧燕來竹笋生玲玕

人生還家貧亦足何苦晨夕勞其形吾儕田廬

况不遠峭帆柔櫓凌回汀都籃兼攜茶酒具悶

拓小眼紅窗櫺吳歛越吟相繼和五日十日恣

留停念此令人反惆悵夕陽四顧塵冥冥

題商惟吉江山積雪小幅用松陵集寒夜聯

句韻惟吉名喜明宣宗朝錦衣衛指揮常代御筆

披圖忽江天城闔當山缺磯危勢龍從波冷色澄
徹彷彿九派游淒其三冬節風物暮景殊觸迂冲
襟切營丘貌寒林摩詰工積雪共爾天機精邈然
人踪滅破窗虛白添素練靉黷結踽踽僧作蟻莽
莽洲如玦愁深對宜醒蹟妙心自折御床曾捉刀
畫苑位高設

賦得老樹空庭得

望去槎枒自作林輪囷偏耐雪霜侵閒階漫挺干
雲勢斜日常留滿院陰幹點莓苔宜聳鶴響傳竿
籟應彈琴幾畚鎖印徘徊處聊愒空山一片心

過樓桑村謁漢昭烈廟

弓遺白帝志難償正統千秋自蜀疆古廟巋然當
獨鹿新枝沃若發樓桑雲旂羽箭關張侍乳燕鳴
鳩禁籞荒讀罷迎神碑上曲梓花開落又斜陽

郵亭

苦甚郵亭面壁時往來輿隸盡題詩今朝一語堪
收拾村尾濃陰綠樹披

夏日過礦山寺

松蔭接廻岡禪關隱夕陽杖尋樵子路衣解贊公
房雲豁當窗邃山泉貯鉢涼自憐同倦馬暫得謝

羈韉

康熙乙丑五月

駕幸古北口避暑

臣肇

以通永僉事奉檄修治橋

梁途次恭紀

鑾輿避暑塞垣行谷鳥巖花喜氣生一路奇峰蓮
萼聳千迴流水縠紋明粗成徇略寬民力屢駐蓬
茅悅

聖情臣職觀風當擁篲忽來靈雨翹塵清

石盆峪龍潭歌用歐陽公晉祠韻

石匣鎮南十里間石盆之峪流潺潺我來策馬亂

石路兩峰合處窮其源微颺披拂瀑花落玉潭如

鏡籠山煙岸傍遺廟有短碣南塘題句幾平百年

謂戚大將軍

僧言神物此窟宅恒從萬丈驚盤旋少陵

小虵詫為雨靈異今又聞塞垣坡陀跌坐面澄澈

囂塵自訝凋朱顏時方苦旱向龍禱願一欠伸滋

枯田輕綃瞥見曳潭底雲雷恍惚騰迴川擬歌迎

神送神曲歲時伏臘被管絃言歸驛路轂相擊那

得耳聽噴薄泉黃昏野店聊竚立風林纖月方娟

娟

夏日雨中重過河曲精舍四首

微雨泛輕船城隅一水遙新荷侵壞道破網掛危
橋精舍花香入空林暑氣消茶瓜風味別齊已坐
相邀

瓢笠追隨數菰蘆偃卧清雲威低柳徑燕語會松
棚酒許當墻過詩難擊鉢成淹留淳朴處真悵侶
鷗情

雨急亂波光城闥入渺茫最憐鷗鷺喜倍覺芰荷

香豆莢分僧鉢菱歌度講堂緯蕭無限好惆悵水

雲鄉

余家淶波村
有緯蕭草堂

纂纂沿墻棗垂垂滿架瓜僧閒勤種植村小護雲

沙舊雨掀髯失

憶悔人

新愁對酒加衝泥歸路晚任

笑接羅斜

寄悔人

河曲重遊暮雨時都亭雲樹倍相思掀髯大似綠
坡竹古寺青燈獨咏詩

李卓吾墓

卓吾墳枕潞河濱御史交情不可泯火後老楊枯
芟發風前荒逕斷碑蹲放言高論全無藉禿頂方
袍自有真嘆息虞山非浪許異人端合屬斯人

雪園五哀詩

有序

往余鄉有雪園社即江南之復社也改革後
先輩凋喪余從侯子朝宗賈子靜子三徐子
恭士邇黃來玉復修爲六子社詳朝宗所作
社序今五子先後俱歸泉壤而余以薄宦日
益潦倒慨想故人潸然出涕爰爲雪園五哀
詩以代招魂之賦云爾

侯朝宗

朝宗天人姿才大不可囿文起八代衰所遇屢顛
覆當其弱冠日英名振華胄兩世東林魁謂太常
司徒司
成三聞見亦良富落筆五嶽搖十手寫難副徐吳
公

盡儒宗

徐霖蒼吳
讓伯延仲

哲兄亦耆舊

長華
赤社

壇坫與周旋

不及君馳驟江南復社興陳夏維領袖應社起雪

園

雪園社亦
號應社

遙託芝蘭臭君似孔文舉高義傾宇

宙無何丁喪亂江表避羣寇奇策棄汴京懷抱莫

能售抵掌公卿間如獅震百獸金陵飛尺書跋扈

爲之逗清流遭側目禍自皖城構艱難嘆備嘗播

遷匿岩岫歸來志未頽藻思日益茂慷慨慕魏武

霸氣得天授橫槊襟期同兼有陳思秀中原已冠

軍麟鳳網還漏鬼物若擲揄功名苦不就鄉曲諸

小兒那解洪鐘扣壯悔額其堂理學將深究嗟哉

中道摧身死文則壽遺編炳日星遠近餅金購邯
鄲學步多靡不君俎豆余荷獎藉殷文字煩糾繆
何異爨下桐適與中郎邁六子結同聲雅歌快迭
奏生平知己感淚漬衣裳透荏苒三十年寸衷自
銘鏤挽詩久不成念之心恒疚三復贈我書平原
買絲繡

賈靜子

世亂奇士生調高衆人訝賈生不羈才名豈長沙
亞年少賦雪園文彩凌鮑謝灑落萬斛泉珊瑚爲
筆架講院聚羣英君實冠同舍

太守鄭公三俊重修范文正公書院

招諸名士讀書其中君每試必冠軍

廿載落魄餘奎宿恒遭罵上書

請修史言大而非詐時危任轉蓬南渡傳聲價雄

藩開幕府書記特相藉雙刀展兒嬉

時有雙刀當賈生之目

筵或舞蔗壯志竟摧殘驂騮不一駕疎狂類正平

幸未死江夏歲晚返舊丘渦河親耕稼究心二氏

中草衣還布帕欵寄笑侯嬴作書屢彈射風期自

翛然肯寄人籬下君本余父交藝苑欣邀迓小友

辱忘形曹鄴附五霸遡園

君別業

數追陪倡和無少

暇策略用世心清言佐杯斝

君有策略清言諸書

進道迨耄

年故態一朝卸信乎侯生云羊質善變化易箠曾

目覩從容謝驚怕如此干雲姿寧教腐鼠嚇所嗟
似續無上塚誰觴炙感舊起悲吟臨風淚傾瀉

徐恭士

恭士恭而傲矯矯雲間鶴斯人忽九原書來心驚
愕痛哭念平生音塵恍如昨精悍眉宇留骨相何
磊落難兄曰霖蒼聲名等李郭之子稍後起旗鼓
相叅錯文筆追臨川構思必精鑿書法鍾張流人
號古釵脚作詩屢易稿清新吐糟粕早篤二吳交
晚踐六子約朝宗推畏友篇什勞刪削一字數推
敲諫官謝謇諤維酒雅無量雄談侑康爵立身迴

巉巖對客展戲謔吾徒科名艱獨君薦一鶚世稱

真孝廉自顧亦不作遊梁計與陳甫草其年地主皆君

託歸然魯靈光峻望比盧霍老偕余季遊余弟介子共

耽林泉樂人事莽推遷一旦舟移壑余失聯床歡

君有掛劍作懷友疾莫瘳平臺頓埋玉叶老成盡

凋傷風騷嘆寂寞天涯賦大招屋梁月華白叶

徐邇黃

高士推南州邇黃其苗裔絃誦甕牖中行潔色頗

厲惟操三寸管清芬播蘭蕙弱齡為諸生揣摩工

應制遠攀陳羅旗近接劉張袂干之伊人顧盼取卿相

勲猷將策勵賦命何軼軻終身艱一第吾黨得應
求鶴洲共談藝晚好性命言濂洛託深契教授聚
生徒白板門恒閉窮年手抄書字如蟻蝨細埋頭
向簡編髯落氣彌銳執鞭蘇門翁謂孫微君高踪信堪
繼方幸文獻留哲人倏棄世遺編伯倫搜山同學
中丞涕潛菴傳經賴侯芭謂田梁紫我菴詎云替君有我菴語錄
遠道未撫棺幾載悲思繫秋風忽愴懷寥天聞鶴
唳

徐來玉

雪園諸君子高曠慕晉人侯賈千載士恒遭鄉里

嗔懿哉來玉氏儒雅殊彬彬胸中少鱗甲選言務
去陳豐頤表微髭貌朴情彌真揖讓有恒度邂逅
嘆飲醇惟從良讌會論文昂其脣恭士愛小阮相
對如嘉賓君時已白首左右奉幅巾六逸皆澹蕩
與結煙霞鄰隨牒官上蔡鄭虔乃等倫一瓊卧未
穩還歸南湖濱長嘯尋舊好吾自安吾貧首丘願
良遂鵬鳥來承塵無兒感伯道著作空千春雍門
有深慟况此金玉身何日磨鏡去孤墳披荆榛作
詩效八哀淚灑通潞津

新秋雨後悔人書來將偕諸公爲河曲精舍

之遊賦此奉遲用兒至七夕後一日同悔人
京邸小飲以立秋日爲韻三首

一雨驅炎烝門館涼颼入烏几發鑑光鳳唳翻墨
汗懷人時悵而起向寥天立惟髯洵絕倫何日手
同執慶豐牖流飛淙潺幽響急留取官焙香澄碧
同君汲曰余總勞勞猶堪馬鞭揖

連宵有歸夢西村歌飯牛曉來坐茅宇高槐影修
修雲物蕭以澹冲襟宜新秋故人枉芳訊將訂河
曲遊芟梁足野趣雙林風颭颭願從梵唄罷摘藻
偕英流瓶鉢借老衲還買鴨嘴舟

愛尋荒寂區自笑林丘質偃仰千載心惜此半簷
日洩洩父子間矢口談聲律蓮社有勝招矯首忘
盥櫛夙耽文酒歡如啖仲殊蜜間房留妙香想像
開書帙籬落綴豆花斜日鳴蟋蟀

秋日戲爲疊韻

廊旁蒼筤香石隙碧柏圻陰森歌吟心客憤亦易
釋

題王暈畫

疎林開逕曲遠岫帶村孤粉本余曾見浮嵐暖翠

圖

題董文敏仙巖圖

獅子林推倪迂叟青弁圖誇王叔明文敏仙巖禿
筆畫何妨異代聯鑣行

衙齋絕無蟋蟀命小童覓而放之籬下嘽然
有作

庭樹蕭條逕草豐如何秋至少鳴蟲古人觀蟻空
堦上今我添蛩小院中似訴似啼當社日在床在
戶念幽風放衙自笑真無賴分取秋聲到菊叢

遙送曹實菴之官新安十首

舍人佐郡去江鄉山水登臨志許償薄宦蹉跎成

白首曹唐端不異馮唐

健筆如君鼎可扛一麾南國咏江秋風驛路青
衫去好看參天石筍缸

文章宿老困西清曲巷柴門歲月更多故人留
史局獨驅羸馬出承明

寫意開心十四年都亭咫尺悵風煙相思更倚南
雲望白嶽黃山落日邊

當年十子重京華舊雨晨星幾嘆嗟勝事祇今忘
不得寒宵聯句鼓三撾

鬪茶祭墨元同癖却喜夫君愜素懷他時相憶如

相寄玄璧龍團色色佳

砂泉香潔自淙淙浴罷還尋萬仞峰千歲老猿何

處覓月明多掛擾龍松

陳蕃兵後守新安謂陳憲之勸撫哀鴻莫破顏今日贈

言仍此志誰云司馬是閒官

雙江奉使君懷我歎浦之官我送君何時會合還

題句醉墨從教寫練裙

想像河橋酒幔青離歌低唱耐人聽前途一事堪

怡悅南海新篇索阮亭

時王阮亭少詹自南海返命

秋日過南溪寺恭步先文康原韻

先人開府地重此課桑麻野寺疎鐘在長河落照

斜巡簷容和句灑淚罷呼茶依舊門前柳西風繫

釣艖

題王黃湄都諫過嶺集即用集中惶恐灘寄

悔人韻

黃門千載人詩骨太華聳獨操三寸管藝苑闢荒

茸銜命嶺嶠遊雙江接余踵鷓鴣增旅懷况復

聞秋蜚韻石虎牙撐偏鬪驚湍涌三板泊危灘即

境堪惶恐羨君賦停雲岸憤旌麾擁奇思鉢腎肝

刻畫松毛氂

陰巘松毛氂黃湄句

縱橫其誰敵所向鏟坡壠

牛腰傳卷軸心折手還拱周旋愧苕邾願以敦盤
奉雲霄鵬鸚姿斯事乃餘勇

宋刻絲蟠菴圖聯句同兒

短縑結奇繪有蕢羨嘉果仲牧纂組渾端倪點染謝

婀娜至藉機杼寫生堪禋祀伴旅青絲用引枝縹

色妙烘顛仲牧獨樹迴扶疎連蒂恐傾墮至幹橫待

胎禽葉蝕疑螺贏仲牧頰榴或等觀玉李未足駁至

海嶠貌來遙斗室懸處頗仲牧硯礪實一雙掩映雲

五朶至鳳梭意良工鮫織筆非左仲牧在藝得神明

涉想極么麼至肖形儼吮粉申咏窮炙輶仲牧細玩

倍咄咄驀見信可至憎俗錦段拋畏偷房櫳鎖

仲牧鵝溪遜爛熳顧繡笑纖瑣經營實云勞位置亦

殊妥至王母授恒珍徐熙技難播涎從摩抄流摘

欲襟袖裏仲牧宋代製何人潞沙寶維我至精光騰

卷軸壓倒米家舸仲牧

重過遵化練泉恭步先文康韻有序

遵化城東北隅有泉澄澈流周於隍舊名

烏龍先文康開府畿東時易名曰練暇日

築亭種樹與賓客泛舟遊宴其間曾有泉

上作後入相諸將士置酒餞別公復留斷

向一首刻石置泉上時爲順治二年犖方
稚齡今康熙二十二年犖奉命觀察通
永明年二月按部過遵尋訪舊跡而泉以
地震涸久矣因次斷句韻有方塘無復舊
泉音之句又明年復過其地泉忽湧出頓
還舊觀邦人士亦驚喜共事修葺犖留連
久之爰次泉上作原韻勒諸貞珉以誌今
昔之感

先人漁陽擁節旄我今重來駐畿甸山城訪舊空
亭留不見清泉照人面古隍庚庚龜兆橫千畝安

能灌卮茜獨倚怪石弔斜陽忍對長松自葱蒨今
年一事出意表壞甃依然明匹練迴溪鬻沸得舊
觀幽響臨風傳別院縛橋設檻走士人輿隸驚看
亦云便昔如黃犢今霜髭插脚誰知此開宴何戡
歌發感客心况復林端山鷓嘯載尋邃洞剪煙蘿
苔蘚封門青一片顧瞻先澤矢淵冰求莫敢言黔
首賤摩挲斷碑景遺編口沫手舐咏百遍回首霜
月到方塘依稀諸將當年餞

寄楞嚴經與拙公

小卷楞嚴寶座隅看來宋槧未應殊微文大義無

須問寄與山僧覆醬瓿

綿津山人詩集卷十七終

首類率也... 昔籬杜門青... 始發友客公... 亦云野昔... 歸坐... 平一車出... 須歎... 詩集卷十七終

綿津山人詩集卷十八

商丘宋 犖牧仲

漫堂草

雨中漫堂聯句

同何次德 陳次山

薄宦念索居苦早憂正切客驚二妙來霖降三伏

節雷殷驅鬱烝颺散動騷屑牧仲商舞日色沉礎潤

土脉泄次山黑入太陰垂光閃銀海澈衛公一何莽

錢唐信作孽澎湃河勢傾照耀電影掣次德賦草愁

漫摘亭名喜任竊別院飛潺湲急響傳駟鐵牧仲閣

鈴亂匄匄庭麥漂澈冽燕翻失呢喃鶴聳羨孤潔

次誰移匡山瀑懸向官舍枕生憎溢堦除將毋煩

榜檣次石洗苔露錢漲發洲隱玦灤鯽竚大上潞

沙畏突決床遷豐溜隨步舉洪濤截仲披襟彌清

涼卷幔謝炎熱次幸停吳牛喘宜取漢書閱仲蝸

廬紛縱橫蛙鼓獨怡悅次荷葉倒半池榴英墜干

結仲檐柯俯而恭檻草偃莫茁次俗韻清淙淙幽

興爭滴滴氣侵香篆搖波晃觥心凸仲娟淨明葛

衣蕭爽透簟篔次坐起嗟滂沱轉盼屆寥泚豐凶

變俄頃天地用奇譎仲汎濫成巨浸畚鍤開水埒

只合把釣緡還須躡輕橈垣頽戶難扃薪濕煙不

蕪次泥融拔蜀黍風微鳴蜻蛚次蝶綵黏簾旌蟻

陣遁槐穴酒瓢憶空山破窗記老鐵楊鐵崖有破窗風雨記

感宋玉秋懷奪阮瑀吟訣仲茫茫隔林巒活活泥

車轍次咫尺同濠梁曠望渺勃碣陂塘下閒鷗睥

睨挂殘蛻次雲威互凌競星芒乍明滅次戍漏聽

已罷筵燭跋亦迭既醉霽景臨申旦高唱闕城南

追勝遊絕塵共奔軼仲

何次德見過漫堂感賦

厨俊英游幸拍肩侯羸鞭弭共周旋緇衣需次仍

遺老白首重逢話往年柳暗隋隄花是雪月明遂

步酒如泉雲煙過眼嗟三紀疎雨青燈一惘然德遊梁主侯朝宗家余同雪園諸子賦詩送之後遇於金陵與周櫟園袁擇菴諸公讌集秦淮下繼之水閣今屈指三十餘年矣

秋日寄顧梁汾舍人次韓元少閣學韻

剪燭論文夙共之執鞭邾莒敢云辭風流薇省傳

高躅補葺筠鑪有近詩開閣殷勤千古在輟絃懷

抱九京知潞沙秋月相思甚漚酒無從進一卮惠

竹茶鑪明初高僧性海製王舍人孟端爲之圖李文正邵文莊諸公題咏甚多鑪久壞今爲梁汾重修有倡和詩第六句謂成侍中也

題周鼎高秋翫月圖

高臺何突兀環以青梧桐遙天湧圓月煙景開朦朧片雲掃無迹庶免滓太空誰其快登眺提攜兩詩翁琴樽亦不設倚檻惟孤童顧此三尺練颯颯生秋風古來貌夜山妙手推克恭卓哉秣陵叟走筆追前蹤衙齋掛晴晝清輝照簾櫳掉頭拋俗韻置身丘壑中幽人不我棄霞外偕支筇

秋日同蔣京少重遊河曲精舍用月泉吟社

韻即送京少還江南

幾度溪頭看藕花芟梁微雨坐浮瓜重遊忽聽潞

沙雁初地同傾陽羨茶案展晴嵐消放梵時觀石田畫卷

籬侵淥水罷停車風前一曲送歸客悵煙江颿
影斜

晚坐漫堂留京少小飲仍用前韻

漫堂三見放蘋花隨手年光已及瓜薄宦真同秋
社燕奧香聊試武夸茶武夸山小九曲有奧香茶聯吟莎柵堪
扛鼎送客蒲颿可當車漚酒一杯君且住高槐突

元月敬斜

鷄泉校射歌八首上大中丞于公兼呈朱徽

蔭胡存人李梅崖三同官

旌旆悠悠映碧空秋原校射快從公手柔弓燥雍

容甚不少襄陽太傅風

鷄距清泉遶郭斜琮潺幽響雨餘加今朝小隊經
行處應號迴溪作浣花

桓桓使相坐平臯破的風前寄興豪夾道千人瞻
畫戟我公丰采太行高

褰衣徇略喚漁舟容與微波得勝遊饒吹欲傳還
小住蒹葭深處有眠鷗

如笠孤亭俯澗光擬添欄檻種垂楊甘苦自來同
將士當筵斟酌散魚湯

斜日淹留暢酒懷銜盃射覆任詼諧城南醉尉天

機到上壽殷勤亦復佳
雲霄攀附誇今日僚寀追陪况素心何人獨擅登
高賦舊賜宮袍李翰林
馬鳴風動角頻吹忽憶甘泉羽獵時薄宦無須嗟
瀆落雕鐫今已遇工倕

上谷謁楊椒山先生祠次魏司寇環溪先生
李僉事梅崖壁間韻

椒山峻與太行同謇諤居然折檻風曲突豈惟彈
馬市傷心終使媿龍逢清霜氣結臨刑句赤日光
留未了忠魂魄自來思故里渚蘋殷薦廢祠中

歷盡艱危謫遠方還將一死震巖廊批鱗目已無
丞相列俎人爭拜奉常夢裏笙鏞元有志街頭枷
鎖任飄香靈風蕭颯鬚如戟庭舞神鴉老檜蒼

讀康對山武功志題卷尾二絕句

絕代風流康對山琵琶一擲老秦關千秋邑乘留
殘帙簡潔居然並馬班

有齎風物七篇中騷筆由來撰述工太息斯人甘
廢棄交情端祇篤崆峒

為陳藹公題傳青主徵君村居圖次青主原

韻

水石明素練觸迂江湖心高士寫平遠妙蹟追雲
林村居寄寥廓一半煙靄沉竭來斗室內忽覩郎
山岑幽人時危坐耳畔流清音藹公家上
谷近郎山

冬夜漫堂文宴同王令貽用章八元新安江

行韻

舫齋依老樹有客共維梢
簞簪懷漁具蒲團愧鳥巢
壁懸石溪道人鳥巢圖
杯深孤月晃屏曲凍梅交一段婆娑興將無候吏嘲

附奉和前韻

青浦王原令貽

曲窗藏潞渚泛宅此維梢
白墮釀三斛青緇栖

一巢霜凋帘燭瘦月盡
盞花交不淺登樓興清
狂任客嘲

太學石鼓歌用蘇子瞻原韻和王令貽張弘
蘧

我髮未燥心好奇周宣獵碣詢遺叟執經曾爲國
子生屢肅衣冠戟門走嶙峋驚覩石鼓文欲讀抵
牾難上口累朝攷究窘鉅公矧我生當千載後樸
質輪囷列仍千古蹟剝蝕載維九臨池學書眇蟣
蝨筋骨徒教誇顏柳嗒然對此喪所懷昂首高天
爛箕斗我車我馬辨不易畫肚移時動右肘續紛

光景浮雲歆隸楷俗書掃稂莠強尋邊旁鬱深衷
乍測奧義呼良友卧度卯酉推索艱如趙武靈探
穀穀憶昔中興蒐岐陽紀績銘功勒蝌蚪歌辭烜
赫躋雅頌從臣撰述定耆耇或云嬴氏或宇文異
議相沿誰所啖天留重器登成均壓倒犧樽與鬯
卣趨蹌上舍勤俊髦想像歌工煩矇眊金石刻畫
蛟鼉盤聖作巋然並岫嶺竭來摩挲儼落星元氣
淋漓蘚花厚昌黎子瞻遞咏嘆音訓豐碑表某某
蹉跎三紀緬神物光怪羅胸詫希有厭親簿領謝
文翰忍見庭除設械杻拓本寓目心一洗斯邈以

還等瓦狗陳倉淪棄鳳翔遷日炙火燒存亦偶流
傳奕禩位置妥蹲鳴排比齊其首曰窠曾憐任春
揄牧豎幾遭來擊捃縱經鄭重金玉鏗播蕩戈鋌
旋剔取嗟哉顯晦固有時至寶終難辱埃垢出之
泥草獻清廟祭酒先生昭世守江左兩生韓蘇才
鞭撻風騷若拉朽石鼓之歌欲和難應附此石千
萬壽

附原倡

原

我謁太學歲丙寅九秋旣雨天氣新廟貌肅穆
迴絕塵右平左城通堂陳戟門森立高嶙峋內

塾十鼓碁布勻周宣垂今二千春三代法物希
世珍文謨武烈隆復振烝民韓奕學士呻方叔
召虎儕鳳麟尹氏仍氏詞絕倫大小二正存其
醇大蒐岐陽韎韐親廼命譔列示無垠編詩不
入昧所因翻幸虐馘逃暴秦陳倉滅沒同泗淪
李唐獲九竒不純其一刳中投杵頻皇祐得之
田野民呵護浩劫宜鬼神鋸之黃金錯白銀金
源剔取馳北輪宣撫宅廢埋管榛虞公請置功
可泯竭來摩挲餘百巡史籀不作難考詢手畫
生胝吟燥脣心重古器詞罔伸斑斑駁駁星向

晨三百廿五龍蛻鱗九未全蝕二一辛耳目荒
忽雲雷屯鳥跡蚪蚪辨莫真蛟蟠鸞翥勢未馴
韓蘇鉅公生不辰強尋難讀淚墮巾矧當愚蒙
識如燐邈從天漢窺涯津麋鹿速速驂駢維
鱖維鯉以柳緡約略大義車攻鄰難以意解取
笑嗔我聞彛鼎銘至仁武功勒銘則鼓鐔合江
鐘石紀禹禋厥制最古聖所循之罟詛楚焉與
鈞麗牲沿俗羞彬彬崇尺有咫徑度逡銳上廣
下妥帖蹲白仰虛受鼓覆均圍圓質厚膚理皴
緬懷上世風何淳封山禪亭空積薪大書特書

磨貞珉高陵陸陵邃谷堙其蹟盡逐雲煙湮惟
聖有作無緇磷縱亡其器辭在紳授受箋釋窮
白申况傳此鼓士響臻絕勝熹平觀經人恍與
揚解揖讓賓幾忘眇末蟣蝨臣生逢敢冀充介
僕潛然後百六紀身

原倡追和子瞻韻

吳江張尚瑗弘蘧

嗚呼古來神物顯晦不可常軼事難從訊遺叟
掩抑千年忽昭揭蛟龍撫護五丁走魯宮魏冢
竹素書祇今一一誦人口煙銷煤燼行復著何
疑獵碣初唐後爾日陳倉披草看十二其一唯

存九剡刮土花拭苔繡琅琅炳若天星柳遂令
流傳徧好事周廟錚于甄墓斗韓公蘇公詩繼
作淋漓大筆字運肘聚觀日多口日衆瘡痂彈
射爭好莠由來名盛百毀生疑信喧騰供惡友
此鼓自唐流至今子復生孫雛哺穀立乎定哀
指隱桓零編斷字皆蚪蚪就今餘慶僞手造已
堪閱世稱耆耆何況宇文與嬴政羣言狝咩一
夫嗾聖朝崇儒興禮樂峩峩泮壁新鬯卣虎
觀還聞聚學徒鹿鳴曾說歌矇眊十碣依然盡
無恙靈文翕絕齊岫嶠園橋受學肩相差古物

摩掌手胝厚韋帶摳衣堦下誰江表鯁生名氏
某觀碑亦廁羣英後俯仰從前歎希有司空解
辨桐山鼓中壘能知貳負杻搜求茫昧須博物
奚懼墳羊與土狗所嗟歷劫仍至此劉蹶羸顛
視若偶丘墟已聽幾鷓聲輦載頻回萬牛首向
使仍前尚淪汨牧兒蹴蹋羗童捩直置金鐘大
呂間陸離光彩人爭取自古成名在得地清水
難同濁泥垢要之至寶不終棄自分球圖堪世
守琉璃質脆楛葉輕斯須悅目旋彫朽嗚呼君
不見方召功勲樊尹才文字模糊石猶壽

余作石鼓詩蒙觀察牧仲先生用子瞻原
韻賜和因再用韻奉答並寄檢討朱竹垞

先生

原

史籀大篆聞周宣肇變蟲魚述遺叟羸氏次仲
造八分斯邈隸書供下走蔡邕楷法張芝草柔
媚悅俗炙人口趨今昧古質是非鮮解輕前但
軒後寧曉古作若溟渤奚啻雲夢吞八九橋舌
安敢侈鍾王插脚何由有顏柳石鼓巋然靈光
存色正芒寒麗天斗元氣磅礴一畫前難從波
磔尋跟肘夾漈考證猶舛訛子卿何人肆言莠

禹鼎湯盤始與參，嶧碑岱銘焉足友。友好古上故，
慚商彭敏學下思。追鬪穀周文郁郁，半磨滅矧
從倉頡辨蚪蚪。韓韋蘇梅不復作，欲問奇字乏
黃耆。如冥擿埴失其持，那瘳噬物信所嗾。我昨
摳衣見斯鼓，肅穆欽愛等彛卣。蕪詞軋茁抒素
懷，曾堪登歌習矇眊。祇嘆身未丁厥時，得窺宛
委摩峒嶁。宋公屬和太崛奇，春麗鯨鏗寫淳厚。
直看千載敵髯翁，寧許中間置誰某。張生硬語
壁壘堅，張弘蘧亦有作蚪竅蠅聲我何有。公之爲政美
無度，狴犴空虛庭廢杻。公餘藝苑恣跌宕，畿輔

月明無吠狗，盤山山翠潞水煙。渲染大文世，少
偶目覽耳聽給環請對客，擘牋詩幾首有叩輒。
應縣洪鐘顧我寸莛怯，撞捭泰嶽出雲海。浴日
部婁細流罔擇取，橐鞬周旋避三舍。竊欲從公
剔癥垢，魯輸巧攻當者靡。亟將朱公助墨守，願
屈燕許爲此詞。肯使公詩獨不朽，附驥致遠古
有云小年大年均石壽。

賦詩余和東坡石鼓詩，觀察牧仲先生亦用其
韻。見投再次奉贈兼柬令貽。

北宋以來古調稀，
倨奇獨數東坡叟。
攀韓提白追少陵，
廬陵宛陵皆却走。
釋褐初年判鳳翔，
八觀佳句流人口。
遂令學步似者難，
寶玉當前瓦礫後。
於今作手推商丘，
雲夢羅胸吞八九。
切泥獨淬漢江流，
射札偏穿董澤柳。
有如樊侯擁大盾，
嗔目斯須飲一斗。
紛紛債帥何足當，
木絰兩驂戟鉤肘。
由來七字分藩籬，
無異嘉禾別稂莠。
難將時代論後先，
文筆頡頏皆好友。
公於眉山真嫡嗣，
威鳳將雛靈鵲穀。
無端俗耳耽淫哇，
兩部池塘聒蝌蚪。
鄭鼠積藏荆鳳貴，
流傳謬種愚。

童者依人作活終，
後人狂走踏堦帷。
所嗾自悼菰蘆識，
見陋目眩商彛與。
周卣淵海靈源浩，
莫探深池瞎馬悲。
盲瞍企踵俊厨心，
所向蟻封無路登。
岫嶁忽辱陽春和，
里辭殷勤拂拭情。
何厚難邀顧况一，
看人何意孔融知。
有某長歌跌宕辭，
倣詭千彙萬狀無不有。
句奇欲敵彌明鼎，
韻難屢叶雲棲杻。
軟紅十丈東華塵，
車如雞棲馬如狗。
幾處揶揄逢路鬼，
窮年漂泊嗟莩偶。
富兒肥馬意氣揚，
明月夜投空掉首。
誠知欲益常反損，
但願無人來擊捩。
先生識趣與衆殊，
人棄何

妨我獨取此心便與坡公似湔袞偏多在泥垢
不忝遊踪故故同鬱孤奉使黃州守作詩聊爲
志感激敢附青雲名不朽好在蓮花幕下人靈
光賦筆王延壽

西陂雜詠

余家西陂去宋城數里而近魚藕菱芡亘
延於隋堤南湖有江南之勝老屋數間麤
庇風雨擬號所居爲淶波村爲釣家而堂
以緯蕭菴以和松名村之外縛芟梁築放
鴨亭蓋躊躇數年於茲矣顧宦遊四方僅

託諸夢想暇日爲西陂雜詠屬和者纍纍
更乞華亭葉洮寫爲圖裝而藏之篋中俟
異日歸老補葺焉昔劉克莊欲構後村精
舍以周旋世故終未能插一椽施一鏹以
爲浩歎即陳北山所書精舍字亦付之蛛
網蟲蝕而已則余於今日豈可僅託之圖
與詩致今有後村之歎也康熙丙寅仲冬
廿有九日書於淶沙官舍之漫堂

淶波村

芳洲魚麥多全家就來久門巷渚花叅眠食溪禽

友泱泱淨兼天色映五株柳

釣家

已作煙波徒占斷煙波境籬根一綸竿檐隙雙笻
筇時鼓鴨嘴船長歌逐落景

緯蕭草堂

蟹舍秋風吹荻枝堅可截織薄衡茅間暫把魚經
輟偃仰幽事多好待鹿門說

和松菴

髯翁蔭詩屋蕭瑟如空山長風拂虬枝天際來潺
湲操絃那能和此曲非人間

芟梁

水栗紛橫塘遠接撈蝦步采采刺我衣平橋踏涼
露竚立聞荷香月掛迴堤樹

放鴨亭

鳧泛殊容與銜苔弄溪沙空亭鎮相向何須能言
誇風標兩公子伴爾棲蒹葭杜牧之晚晴賦白鷺
潛來兮颯風標之公
子

綿津山人詩集卷十八終

綿津山人詩集卷十九



商丘宋 犖牧仲

漫堂草

濟南雜詩九首

濟南城北兩峯殊積翠凌空過小孤怪道相看如
故友鵲華秋色舊披圖

曾見趙文敏鵲華秋色圖

鵲華橋上每停車尤愛新晴返照餘城裏看山惟

此地真成手弄玉芙蓉

虜涕驚看趵突泉來從王屋世爭傳署書留得

君王筆不數鷗波七字篇

濟南人說勝江南菱葉荷花戶牖參無數山光收
不起月明染得水拖藍

歷亭風物妙清秋湖水湖烟極望浮多少新詩容
疥壁杜陵碑版不曾留

真箇南山碧玉環我來半載阻躋攀留著勝遊他

日裏祇應詩識是遺山

元遺山詩留著
南山更一游

聽事前頭古栢多高槐幾樹更婆婆西風一陣吹
黃葉露出南山兩碧螺

風雅從來有廢興濟南當日氣憑陵誰知天畔峨
眉雪又作禪門退院僧

水門偶讀南豐記厄井頻過大舜祠故疾未逢蝦

蟹發齊州六月不題詩

余宦濟南半載瀕
行始得此數詩

峒嵒

鴈影落霜蕪驚心歲欲徂長途驅欵段斜日過峒
嵒蒼莽江淮近消沈楚漢俱勞歌聞瓠子河上一
踟躕

題王澹游歲寒三友卷

文牒紛座右埋頭困神明偶一對圖史頓令耳目
清朝來得寶軸古錦裝池精黃華老人子實維北
地英三友名頗襲逸筆殊縱橫髯翁聳而立龍鱗

腹彭亨修篁帶蒼烟數枝森相迎更貌江南花苞
綻幽香縈瀟灑拔俗懷誰能及此儻倪迂訝高脫
王蒙說手生上智得神解妙語非譏評摩挲廢眠
食嗒然坐前楹收卷忽一笑學道須忘情

早飯姊妹橋

霜橋踏去耐春寒菴裏人家作畫看索墅

地名

疎林

參戶外茅山空翠落簷端吟情不屬憐隨牒歸夢
難成笑據鞍此日朝衫真可脫頻將苦筍入盤餐

山谷贈東坡詩云君如端爲苦筍歸明日朝衫應可脫

秣陵關避雨

奔濤側耳萬松間不覺穿林驀塢艱急雨遠來靈
谷寺行人小憩秣陵關琮潺流水頻驚馬斷續殘
雲苦戀山剩有城南聯句樂宦情鄉思頓教刪

虎丘山後僧舍看玉蘭用東坡遊道場山何

山韻

扁舟曲港循山麓爲覓芳春入空谷禪關寂歷小
院幽一樹繁葩看不足雪塔矗立白漫漫柔枝亦
作蒼虬盤清香縹緲遍法界餘英散落隨驚湍別
院高樓花外出倚欄相對容展席玲瓏映日訝神
功輪囷臨風想初植遙峰林隙聳翠鬟點綴總入

圖畫間春光淡沲蜂作陣騁懷豈必千重山吏事
鞿轄夜達旦忽復三春已過半纔愜勝賞又言歸
嚼蕊攀條起長嘆

夏日同蔡九霞王勤中姜學在兒至遊支硎
華山用元遺山天涯山韻

昔我觀海行斥鹵更訪秦岱經鄒魯江南山水不
得遊日日相對惟阿堵瀕行始鼓一棹來首路楓
橋名最古支硎山色呈遙青一半朝陽一半雨竹
輿嘔啞凌陂陀梔子萱花相媚嫵支公亭廢尋馬
櫪旋螺菴幽憩梅圃提携上客千載人翰墨之英

文字府冲襟已將瀑布濯短策還向華山舉泉噴
鳥道怪石多象馬瞿塘何足數影留丈室弔蘂菴
僧話行滕歷天姥薄暮佛巖縱遐眺萬樹青松不
見土臨風長嘯谷響應定有清詩出歌舞呼兒題
名繼凡夫綿津山人牧仲甫

集變詩

有序

康熙二十七年夏六月余奉命撫江西

舟次蕪湖聞楚北兵譁江西震恐急鼓棹
入南昌撫慰之蒞事未十日於月晦突有
奸徒李美玉袁大相勾結楚逆以酉字帖

潛授其黨多人將於詰朝謀為不軌賴
聖天子威德偵知奸謀乘夜計擒二元惡
且即斬首懸藁街餘黨盡鳥獸散亂遂以
平其事詳劉榛記中暇日賦此用存崖略
云

聖皇二十有七載臣竚承 命撫洪州爰從茂苑
歷建業溯流直泛長江舟時丁盛暑南風發江干
晨夕阻石尤忽聞鄂渚兵脫籍倡亂一旦據上游
二十餘城倏陷賊烽傳浦溆驚眠鷗殘黎絡繹蔽
江下船如蟻蝨排荒洲我禱馬當得風助小孤彭

郎無停留蒞事人心稍安戢詰戎籌餉綏四陬孰
知十日突生變羆罷遠結封狼謀實維六月之晦
日螳臂擬將大邦讎須臾風鶴徧城闕婦女奔竄
聲咿啣厥黨無筭暗勾致洶洶之勢未易收夜以
計擒二傑惡繫頸不異當檻猴詰朝秉鉞正 國
典碧油幢下懸其頭俄頃奸徒鳥獸散十三郡始
安鋤耨捷書一紙報 天子宵旰庶寬南顧憂故
人千秋推作者濡筆紀事昌黎儔新建英猷詎敢
望銅梁取况增之羞或以張肖甫定浙亂相况沃民勿緩正有
事藥石語佩西園劉附劉記西山不戒於火鬱然而將騰矣主人曰撲之火得

撲而大熾枯槁不及施瓶罌未有備主人焚死井
邑巖谷盡以燎四方來救者竭清漢之波未濟也
而東山之火復欲然苟其炎炎攸灼風牽勢引寧
但續西山之焦枯哉主人乃聲色弗形沃饗漿而
無事西山亦以無所助而焦頭爛額者得以收其
功然則東山之主入其所謂見幾之君子不俟終
日者非乎宋中丞牧仲先生實類是先是楚有去
籍之卒踞山而要餉撫軍柯公永昇易之遣十餘
騎往繫焉卒用以叛公及參政葉公映榴同日死
妖燄縱橫連破二十餘城勢洶洶不可知而先生
乃受撫西江之命密邇寇氛人情蠢然先生飛
槽入境靜以鎮其搖撼誠以收其心脅嚴以飭其
戎行明以申其賞罰決旬而秩然有備矣六月之
晦日垂沒先生聞變有李美玉袁大相者裂紙書
酉字為符勾結城內外三千人約詰旦礮舉而行
事先生輒乘昏誘二人密禽以來問則直道之不
為諱文武諸僚屬惶懼無所措城中士女半已遁
部下士甲而坐不敢寐帷幄中客有危而去之者
方伯王公業興一悸不十日死先生高眠徹曉從
容起三搨三吹而升堂一切如常朔儀畢再鞫二

人無異辭命中軍遊擊詹英奉天子所賜節兩
力士綠帟首捉刀擁二人出西轅門外立斬之即
張信示曰倡亂者已誅餘不復問也其黨俟二人
指揮如約日高不見俄聞中丞門礮鳴而二人之
首已懸藁街矣眾乃疑神疑鬼不知發露之自而
豕驚魚散四境帖然以寧設使是時需不先發怯
不早斷寇一舉而西連於楚聲勢互倚警及百粵
遺廟堂之憂不知如何矣而談笑定之楚亦以
平伊誰之功哉夫今之民惴惴於烈山之患而待
先生沃之以甦者非一端矣意者身教于未形而
法制於不敢肆庶其并省挹注之勞而不負先幾
之哲乎予親著遊屐於東山見主人禦變之方略
而奇其孱孱書生輒能定大難而暇豫有餘
勇也故為紀之并以勉先生沃民而勿緩焉

附 豫章行

朱載震

江夏城中夜鳴礮譁卒倡亂橫戈矛紀年戊辰
月夏六黑雲森慘烈日收撫軍自裁楚撫柯叅

政死

楚督糧葉公映榴

震驚漢南延東陬浹妖氛徧

三郡

漢陽德安黃州旬日俱破

機宜一失夫何尤時維宜君

鎮皖口

皖撫楊公素蘊

典兵擁節領上游豫章地勢接

吳會交南百粵閩咽喉緊誰受

命撫茲土用

汝方伯臣商丘牽船行不五百里烽堠羽檄紛

江洲天門山下風浩浩盡日不見來往舟縱金

打鼓祭風伯乞助一帆無停留大孤彭郎瞬息

過兼程單舸來洪州推誠布德戎行飭激忠賈

勇廢墜修蠢爾袁李連夏逆

湖廣賊首夏逢龍

忽忽乃

敢恣異謀裂紙三千書酉字要結游惰開覺讎

聞者男女競奔竄馭唯以靜抒良籌曰予禦侮

詹英往爰授秘略縛兩囚詰旦曳斬軍麾左手

提模糊血髑髏餘悉縱遣雲鳥散幸不蒙賞同

焦頭楚賊援絕禽易耳飛章上緩 天子憂赦

臣專殺鑿臣苦誠恐寡斷貽儒羞乃知詩人其

餘事扶顛大業管樂儔具書所見示來者傳信

庶無煩徵求

過北蘭寺四首

霽景開南浦秋郊訪北蘭沙隄延野色竹塢瞰江

湍妙相拈花示禪心即境安平生端有異興發是

林巒

豆棚連曲牖竹逕轉虛堂圖史心無著茶瓜味總
長觀泉嗟面皺踏閣愛山蒼白袷憑欄處松風作
意涼

山脊孤亭峙荒寒傍棟林苔文隨展席鳥語應調
琴偃仰消兵候低徊望闕心劫灰僧話久磬響
夕陽沈

別圃從容過迴岡更有亭沙痕浮日白山色印江
青列岫承餘韻是地舊有列岫亭支頤感客星無須催小
隊漁唱暮堪聽

丁景呂傅貞生見過席上有作用景呂韻三

首

絕代佳人聯袂至周行示我正相須堪從仲舉殷
勤問穉外還能一客無
傳咸棄世元高躅丁密休官有令聞一樽齋閣修
篔下不少清風似此君

指揮定亂尋常事敢向文成步後塵剩喜素心相
對處焚香掃地作閒人

潘稼堂檢討歸自嶺南便道見訪以詩留贈
次韻奉答

輕裝短棹接歸途盡紀風謠似爾無屐遍羅浮偕
老袖研分蕉葉慰貧夫小留滕閣詩堪續更訪廬
山興不孤最是分携憐歲暮幽蘭折贈有珍珠

別張長人十九年矣遠道新篇見贈依韻奉
答

蝶夢蘧蘧感歲年每逢秋雁望書傳梅川丰格誰
堪擬魯壁靈光世共憐品墨雪堂疎雨夜捫碑赤
嶺晚風前詩來又得題襟樂依舊低頭願執鞭

秋日雜興疊北蘭寺韻寄示侄起四首

帶露收園橘臨風徙盜蘭庭空餘豆架籟遠殺江

湍退食初心在聞鐘噩夢安何當乘暇日取次問
煙巒

鈴閣幽閒地依然號漫堂節旄肩不易饘粥味何
長帖訝漏痕古圖披松鬣蒼尋常分俸得宦况未

蕭涼

偶得吳說手
簡王蒙畫

鞭弭憐廝養風騷拜士林撫時思害馬行藥偶攜
琴懷古江濱閣餐英歲暮心浦鷗閒似我元不問
升沈

昨日東湖曲行歌孺子亭汀煙涵月白梁芟入秋
青輦路疎書遞霜波照鬢星題詩寄小阮賓鴈幾

迴聽

漫堂咏物

小靈壁研山

磬石黝以奇，萃嶽傍硯匣。髹几發翠嵐，盈尺羅巫峽。方之小九華，幽賞未云乏。

宣銅鹿書鎮

小物鑪之餘，厥質十二鍊。攸伏貌來殊，寶色朱櫻絢。風牀罷攤書，應同辟邪薦。

大食索耳茶盃

愛茲海國陶，彷彿卵色天。索耳撲愈妙，官哥寧比

肩奧香泛永，夜詩思來悠然。

武夸有奧香茶

小華道人一池春綠墨

隄麋媚分宜，萬杵光奕奕。春綠象曲池，品欲加尺

璧冰壺秋月胸，磨啜亦何惜。

何雪漁凍章

鐫無非佛事字

雪漁運鐵筆，邈焉追羸政。片石粟以溫，摩抄得繕性。玉局昔有言，玩之足去病。

東坡與元章云卧閣四印奇古失病所在

倭漆桃香盒

鷗翎騰鑑光，奩具肖有蕢。金泥映螺彩，遙從海嶠分。龍涎宜爾貯，果園奚足云。

賦得江月滿江城

激豔雲間月，淒其江上城。
清輝連極浦，灝氣逼虛楹。
竹露泫時滴，林鳥棲復驚。
冲襟默相對，申旦浩歌生。

題陸包山梅鳩次原韻

好鳥坐春枝，刷羽未成哢。
暗香襲襲來，正結羅浮夢。

題王勤中畫用兒至韻

堂上三尺練鞞紋，漾晴波垂楊生。
新稊因風掃圓荷，何來兩黃鳥相喚如。
和歌彷彿放鴨亭，欲佩苓

箸過

題錢舜舉三蔬圖

幾年燕京擁地鑪，黃芽之羹薦中厨。
竭來南州食單減，大巢無味薯蕷麤。
披圖新翠嫩可摘，為菹擬備三冬需。
中夜酒罷相如渴，先生端祗期冰壺。

右白菜

古煙一抹春雨注，懈谷蟄龍想騰翥。
青苔迸地生峒屨，千尺琅玕錦綉護。
金鷄嘴斲平臺東，風味殊佳懷舊圃。
好趁江國爛朱櫻，上座聊參玉版去。

右筍

詩人昔賦采葑菲土酥雖賤味則良嚙根萬事皆可就英雄種菜知何妨雲溪遺老寫生手紙上如拳淨堪剖深衷抑鬱待爾舒一飽怡然更奚取

右蘿蔔

梅仙祠二首

梅尉棲真處山坳半畝塘間雲開鶴圃修竹護丹房籙秘三天字花傳七里香花名到來心一洗琴韻滿迴廊

垂釣磯難問橫橋水自流樓臺懸絳節林壑駐華輶地近洪厓子居宜帛道猷高風聞賣藥吟望思

悠悠

除夕次劉山蔚韻

竭來俗韻喜全拋鶴伴人間似在郊吐纈分明花映燭浮蛆澱灩酒盈匏春迴霜鬢慚持節夢繞雲峰擬結巢遠札殷勤傳洵水始知冰雪有深交時接

三河令彭無山書

元日疊前韻

鄉心昨夜醉能拋曉色雲山媚近郊幾載承明違伏謁九天仙樂憶懸匏印生綠字間鈴閣架引紅蓄綴鳥巢怪道輕裘還欲脫西江風物接南交

宣銅琴爐三十韻

焚香購雅製厥品貴而狹部鼎貌太莊博山韻殊
乏宣廟冶最良文房用維甲質當百鍊精式與七
絃合形縮難動操工巧煩撥蠟欵識逼鍾王雕鐫
勞目睫叶陋啞朝冠聳色允栗殼雜誚擁祥雲麤
奚貝多葉壓遠矚體匪佻近撫爪欲招中翠含瓜
皮外斑點僧袖柔物帝京紀贗器吳門法磨洗此
僅免奩孟邨容狎摩抄鑑避光細膩肉偏洽潤媿
端溪珍秀奪美人頰叶亡蓋熱愈便疑杯酒將呷
特薦選倭盤防觸慎火筴滷水沈若嵐貯楫拙如

匣寶惜元禁籞拂拭經繡袷雖下彼天球詎儕乎
睡鴨傍銜氣熊熊竝研位恰恰刻論尚愧乳別種
自登閣穎師緬抱携荀令藏周匝削足樸有稜側
耳鑿以插微薰愛氤氳急響失鏜鞳炷幸謝閨闈
供還遠禪榻偶冷怕深宵常溫宜殘臘聊取膝上
橫莫更櫝中納賺或蘭亭同價終連城答吟興弄
處增鼻觀悟來嗒句擬石鼎聯盟共彌明畝

附
和前韻

劉榛

當今張茂先佳翫常盈榻良冶稱宣皇懸河論
撥蠟十二經鍊錘二百閱曆莢巧摹焦桐奇暗

點金徽匝神鬱潤益生絃無趣不乏善價準露
臺得意出寶匣沈水祇自添纖指許誰狎無聲
勝有聲若離妙若合鮮色恍栗披嫩膚防蚊啣
連血剡龍肝帶水斲文甲異彩閃若流膩骨嬌
可掐疑化質爲柔直恐觸而磕一彈常有情三
車何用壓叩當吐商音玩爭側白恰堪薦老龍
涎肅佐聖主裕不然伴書劍無容褻閨閣活火
養不寒輕筋勤爲夾篆挾古氣浮匙并寶光插
觚稜四面峭徇略三寸狹四足高峙如架橋梁香幸荀令
依酌思劉郎呷歸耕吾欲操在鎔君有法念昔

時盛隆皇心荒以雜鑄物不鑄人一傳幾不臘
周鼎重亦移秦人銷且溘此製垂於今言觀動
鳴呶焚薰常懶疎操縵未洞洽恥人躍冶鳴獨
自橫膝嗒虞絃古有懷廬峰今全納韻事得偶
聞迂情無可答愧少鑿賞識徒爲要盟歆

次前韻

廣昌羅 癸 珂雪

寶器歸博雅豈復論廣狹鑿精辨乃真式古世
不乏良冶獨擅長貴品斯爲甲製自宣廟鎔遇
從開府合碧影映螺青紺色深珀蠟質宛佩珂
球光可矚睂睫和潤逼清虛靜遠謝喧雜位之

爨鼎間遂使元白壓韓偓戒膩汚麻姑惜爪招
翠結毘盧頂紫奪老僧衲象形泯七絃識款工
八法冰縵未動操伽楠頻見狎影搖絳燭輝歡
佐綺筵洽幽韻薄李徽增妍傳鄧頰衣香風袖
生烟篆霞杯呷微薦沈水脊輕舉疏灰筴宵旦
駐蜀茵舟車藏倭匣雙耳綰金鉉渾身裹繡袷
將儼叅遊龍詎肯儕睡鴨停勻不溢銖宜稱此
云恰氤氳透簾櫳縹緲深閨閣延詰蓄品彙茂
先考周匝幘軸難爲侶瓶葩相間插非指亦非
軫無鎗亦無鞞緬彼淵明壁麴似中郎榻閱歷

幾滄桑春秋經伏臘鈴閣喜良辰蓮院夙嘉納
珠璣牋滿欄琳瑯賡且答讀竟繹元音情冥思
靜塔公寔主齊盟碌碌何敢歆

綿津山人詩集卷十九終

綿津山人詩集卷十

清谷公真主齊盟新

和與劉蕭歸林神觀且答前

幾欲乘春好

綿津山人詩集卷二十

商丘宋 犖牧仲

漫堂草

雪中登滕王閣次多玉巖孝廉韻

章江西望山為界風急奔濤響碎泮雪中登閣信
一奇水濶雲深迷九派昔年僅過石亭寺未訪滕
王恒介介竭來持節繼閔公天畔褰衣意良快瑯
琊吟魂儼可招俗韻憑欄掃纖芥歌舞已散野鷺
留畫棟朱簾幾成敗徙倚看雪雪愈狂邨許羈人
堅酒戒臨風怊悵覓遺篇斷碣消沈失倒薤薄暮

蒲颿駛如馬南浦蒼茫去疑隘逢逢鼉鼓何處鳴
震起魚龍驚百怪新詩題壁得未曾讀罷真成爪
爬疥繫余微尚契雲山擬駕籃輿謝機械匡廬面
目霽後看次第閒吟償夙債

附原倡

阜城多時珍 玉巖

章舟人報入洪州界雉堞臨江俯澎湃崔巍傑閣
冠雲霄坐鎮章流朝百派滕王昔日駐旌旄閔
督當時盛賓介座中年少有王郎一賦纔成衆
稱快憐才自見古人真意氣文章鍼引芥古今
勝蹟幾荒丘此閣千年疊成敗捲飛雲雨朝暮

愁出沒風濤舟楫戒遙峰隱隱淡於烟遠樹濛
濛紛若薤登臨不獨憑弔多放眼已覺塵寰隘
落霞孤鶩景依然筆有化工吁可怪莫將駢語
薄前人我欲題詩羞壁疥此際真成曠遠觀半
生悔被詩書械青鞵布襪興有餘此行尚了匡
廬債

疊前韻呈中丞公

放舟已下章江界雪虐風饕舞澎湃長須追我
捧一函開卷波濤洶百派龍文萬斛獨能扛斫
陣神兵馳不介自然元氣力排奐寧止齒牙誦

清快子安昔日賦稱工較此須彌納一芥古今
世事亦何常文筆才名有成敗詞章一道根性
靈布鼓雷門從此戒况公德業炳霄壤清若冰
霜嚴拔薤行看燮理坐明堂節鉞江湖誠覺隘
何期瓦缶觸黃鐘滿幅蛟螭森百怪珍也生平
好文史如遇枯楊便馬疥盤空硬語啟蓬心一
脫騷壇詩律械願公吟嘯有餘情未敢築臺思
避債

次前韻

榛

白雪連空茫無界惟有洶流走滂湃亂片疑寫

蛺蝶圖長吟爭講西江派帝子千秋尚憶滕厭
原一區思封介高閣未改朝雲飛彩筆誰復清
風快當年雕組豔春葩過眼繁華成土芥區區
賦草終何益紛紛陣壘都堪敗每讀佳句卻有
情曾受讜言未能戒

徐邈黃先生嘗有書戒予爲詩詞

北望不

挹斗中漿南來爲拔兒邊薤君歌知有黃竹愁
予懷肯讓青天隘忽得瀛海發慨慷遂令洪都
出光怪正欲三緘學守瓶不覺一痒如搔疥鴻
爪姑爲再印痕雕蟲要須終破械投毫俯仰有
餘思莫償別有乾坤債

雪同山蔚賦

效歐陽體不以鹽玉月梨梅練絮銀鶴鴝鷓鷯蝶飛舞之類爲

此仍不使皓潔白素等字即次原韻

曉起忽訝樹添萼怪道中宵錦衾薄從來南雪不到地如掌漫空卻大作支派章江歸混茫面目廬山失寥廓戟門畫角吹劇澀竹屋紙牕光乍爍空階跂足對灑灑破帽蒙頭殊落落拍欄蕭瑟爬沙解埋踪寂寞藏丘貉幽人閉戶或晏眠稚子忍凍時競攫輪困壓折嗟古松啁啾道飢憐寒雀故人平臺舊賦客遠路看山踏芒屨冰衙那阻鼓柝與地爐聊共傾杯樂坡老橐鞬與周旋醉翁號令嚴

洗滌擊鉢快意傾泉源聳肩旁搜窮冥漠三徑滅沒手欲龜一舞縱橫蔗當槩來麩雖慶吟太苦門外吏人聞而噤

附前題

榛

入春三日雲氣揚一夜滕六過章江幕府清寒冰堪結霏霏况復三尺彊家住梁園舊與狎風流文雅臺名還未荒搖筆一弄郢人曲敢叱司馬驚鄒陽於今志氣甘消歇徒擁破被高眠僵公念故人下折簡聿來南浦同寒光凌曉山郊莽四顧續紛直似平臺鄉不遠廬陵存遺令白戰

旗鼓期相當寸鐵尺箠毋容假一往真勇空拳
張睂山遵之如蕭律我亦三申懸罰觴莫盡掃
烹鱗眼銚且須留充驢背囊我聞此地二十載
陰蝕寒剥羣生傷但知三時剜肉赤誰聽一聲
歌竹黃公吹葭灰温百物又感麥瑞來千倉喜
極頻將穿履踏團取還作解醒嘗嘗似嫌山甜
且香願賦既飽十三邦

再次歐公韻

五出試驗春來萼鴛瓦初承紙樣薄疎疎枯葉
零亂鳴灑灑空城次第作漸凝逕竹强撐持不

辨雲山莽寥廓深壑偏容風去填清江更比日
能爍身若栩栩在廣寒世已漫漫連碧落何處
覓得三窟窺果然溷作一丘貉佳人自會茶鐺
掃小兒戲爲粉資攪累積有時折凍松翔迴無
地啄飢雀謝莊原不在鮮衣東郭何妨少完屨
惟我來分銷金煖與公堪鬪拈髭樂天地精華
足探搜兒女塗抹盡滌淪老興雪時愈騫騰本
色風光歸澹漠堅陣要防攻偏師對壘不容持
短槩孫武徒將粉黛驅不堪白戰將軍發一噓

春日遊翠巖寺四首

寺後傳有洪
厓子丹井

涉江遵野岸策馬望層巒物候芳春好招尋法界
寬衣涵桃色嫩心洗礪聲寒多謝田家子殷勤夾
道看

地自蕭梁闢千年幾廢興斷幢隨洞失傑閣入雲
登樹簇喧黃鳥簷虛挂紫藤晨昏孤磬裏羨殺白
頭僧

別院黃茅屋凄清洗鉢泉淙綠剝木走響竝素琴
傳玉版叅初地繩床借晏眠疎籬蕉影下步屨惜
苔錢

越嶺更披榛厓荒古甃堙危橋容坐嘯纖月快迎
人燒藥懷高躅支筇了勝因退尋還有句端不負
嘉辰

春夜雨後同袁士旦劉山蔚小飲士旦談黃
山之勝出紀遊詩共讀之即席有作用范石
湖登姑蘇臺避暑韻

紅薺點幽砌快值餘春閏涉江羣屐臨閉閣壺觴
進聽殘豐溜激坐剪孤檠燼曰余擁節旄百事惟
任運曠懷託莊騷虛聲薄厨俊客談天都奇恍已
凌千仞心折五字篇直斫康樂陣味憐啗蔗佳興
同舞鶴振宿霧林際收纖月籬根印屢看頭觸屏

邨顧山童愠星芒
眈酒鱗印首河漢
近墨探豹囊
秘硯拭鵝眼
暈聊罄良夜歡
待發遠遊軼
高風挹
彩鸞遺軒訪
寫韻

附
和前韻

袁啟旭

今春勝事賒三已
欣逢閏霜臺
鼓角閒蓮幕
賓僚進高館
玉琴橫芳筵
銀螭燼名理
有劇談
魁柄看斜運
巍巍川嶽崇
濯濯風儀俊
詞源沛砰磅
如瀑下飛
仞短力易
訾窳沈吟
怖堅陣
漸酣胸臆豁
作使雙眉
振憑將金
石心出與
明哲印荷
錫清晏嘉
足破窮居
愠俛仰神
自超憑陵
天

欲近沾沾露氣濃
漠漠花光暈
軫茲幸舍遷
稍息征途軼
千秋柏府中
著此高閒韻

和前韻

榛

天亦惜春歸
故遣東皇閏
妒雨飛乍停
殘紅飄以進
時乎再為難
願續蘭膏燼
况公簿領清
揮毫如鵬運
已避叱咤鋒
又逢東南俊
謂士且氣勢兩相加
峻嶒仰萬仞
長卿無堅城
條侯閉空陣
壁觀已多時
老興忽一振
蘭雖鄙鄭采
屐堪從謝印更
襖章貢流滌
我平生愠餘
芳薇架披晚
尊藥攔近柳
開舊眼青月
畫新眉暈未
肯移星

杓忍遽發車，輒宵靜楚天。高江濤颺遠韻。

送劉山蔚歸里四首

子舍君頻夢，歸期敢重違。山將五老別，潮挾片颿飛。野岸牽芳草，長河訪舊磯。天涯明月在，相對共依依。

昨歲滄江上，煩君草捷書。幽探偕亂後，白戰愜公餘。山蔚曾傲歐公作白戰體詩金石留音遍，河梁結恨初。南州

今日榻，猶接故人裾。

染翰從花外，銜杯每夜分。空亭看鶴乳，曲牖挹蘭薰。俯仰成陳迹，湖山隔暮雲。祗餘雙孔雀，聯句未

同君

掉頭君竟去，閉閣我仍留。老愧施行馬，心搖逐泛

舟。樂箴情不淺，山蔚以樂箴見贈初服願終酬。怙悵西園

讌，明朝欠老劉。

題柳愚谷畫寄北蘭澹公

愚谷秋容寫，北蘭茅亭疎。樹訝高寒衙，齋不合長留。此送與山僧，壁上看

題愚谷畫

紙上分明接素秋，風林颺颺水漉漉。耆卿興致飛揚甚，享盡烟雲到白頭。次韻

舊時名畫說丹臺丘壑何妨又別開地下王蒙應
一笑後生咄咄逼人來

次韻 叔明有
丹臺春曉圖

烟艇戛溪來竹閣綠雲上佳句憶蘇州天秋百泉

響

藤纏老樹欹雲斂孤峰峙羨殺結茅僧泉聲鎮盈

耳

黃王遺法此偏優不與金陵八子儔彷彿輞川詩

意在鶴巢松樹葺門幽

臘月十七夜衙齋小集同柳愚谷用陳子文

豐臺看花韻二首

捎簷梅萼雪爭新鎖印俄驚又一巡終歲艱虞持

節地幾時端的罷官人隔江雲岫遙相媚攬鏡霜

髭漸欲勻何物好醫詩思澁麻姑名酒貫來頻

時買

得麻姑酒

薺菜登盤逼早春青熒燈火酒千巡分題每愛詩

中畫入座偏宜世外人南浦疎鐘催短景西陂孤

櫂待閒身清輝恰送江天月頓洗胸中十斛塵

盆梅

素盜疎枝嶺外傳幽香歲晚挹來偏貯從官閣風

簾下韻奪山橋野店前映雪清寒渾欲笑張燈的

曠倍增妍故園回首無消息每到花時幾悵然
偶得黃魯直游青原山寺詩石刻後有施愚

山跋同愚谷次韻

雪霽天宇肅南榮絕纖埃俯摘菜甲嫩仰睇斗柄
迴適得涪翁碑遠自青原隈冲襟有深契懸玩耳
目開太史玉局亞曠代稱瓌材遷謫被黨禍所遇
良足哀結伴遊寶坊振筆題荒崖高風留至今攀
附無梯階遺碑嵌堊壁千年覆華榱好事宛陵叟
慇懃滌塵埋磨墨搨萬本汎覽遍九垓嗚呼此詞
翰下士恒嫌猜繫余晚篤嗜披尋到根荄寒夜集

勝友法鑿傾深杯官樣脫已盡狂叫忘形骸緬當

揮灑時氣將礪壑摧宜與顏平原名山相追陪寺有

魯公碑我輩今且樂鼓角消喧逐發揚西江派眼底

驅淫哇須知元和腳翻與鍾張偕卷持入宦橐西

陂歸去來對作駱駝坐吟同轆轤催漏殘缺月上

庭鶴雙徘徊

錢塘顧啟姬鄂子幼輿室人也曩於京師有

花憐昨夜雨茶憶故山泉之句一時豔稱之

茲幼輿遠道見訪口占以贈

閨中有高咏茶憶故山泉似此驚人句難爲贈婦

轉船
篇畫眉君暫輟下榻我相延賦就滕王閣靈風促

賦贈憩雲菴心壁上人用虞道園題旦景初
僉司畫韻

東湖之東蘇浦南荒岡古柳垂毵毵把茅蓋頭來
衲子晨夕甕牖得勝探西山對面作屏幃江城不
隔浮空嵐澹臺墓近梵度壠百花洲迴鐘搖潭昨
者雪片如掌落曾一過訪駐兩驂化鹿拂子留几
席木陳大師別號化鹿山長上人其法嗣也石溪畫本藏勝絨石溪金陵高僧
善畫幸未凍死聳肩坐詩懷禪理相交參繞籬且種

幾行菜底車郵羨千章楠我官烜赫居以冷邂逅
法侶知無慚生平眠食願學道况復衰病百不堪
好聽粥鼓伴彌勒何須海岸方投簪

歲暮放歌用元遺山游黃華山韻示諸友

小兒燈下笑挽鬚阿爺真箇成衰翁曉對厭原起
嘆息芒鞋那躡青芙蓉此間發願信天耳虛無因
應余何功竭來詔蠲租之半冰雪已過開春容

簿領朱墨紛且卻逼除庭戶披和風年年鎖印一

酬倡還以酒澆磊隗胸愚谷金陵柳子雖老熊豹姿衆

賓意氣凌長虹錢塘少君謂顧姬傳賦草疇昔驚倒

新城公謂王阮亭宮詹嗚呼終歲困轅下高談今竝焦遂

雄食單頗訝備方物龍豬龍南產遼菌放箸空自顧

一飽亦良易西陂魚麥况未窮搔頭忽憶篋中句

次第杏子櫻桃紅元次山選同時人詩為篋中集高念東先生有作云故園小圃

又東風杏子櫻桃次第紅明日春明門外路清明消遣馬蹄中

早春燕射六首

首春校射灌嬰城肅肅官僚待倚旌不比當年宴

滕閣僅將詞賦博虛聲

堂下桓桓將士雄左支右屈技何工須知氛祲全

消日都在雍容旅進中

破的將軍矢不虛連搥畫鼓一軒渠行觴就席無

矜色似熟顏公論座書謂趙總戎

曩肩生啗酒淋漓彷彿趨庭薊北時旂常功業慚

家學祇肖先公兩鬢絲

又見東風入豫章衰遲無補起徬徨甘泉倘更從

游獵難挽雕弓射兩狼

斜景天開落酒卮簷花逕柳弄芳姿吟鞭擬向郊

坳指試手先成燕射詩

秋日夢葉荃伯內兄以菊花卷索題醒而作

歌奉寄

涼秋一別十載餘每逢秋日嗟離居今年聞鴈向
江國夢君不與平生殊手持畫卷索題句迫促但
願急就書鵝溪乍展豔秋色黃華翠葉何蕭疎振
筆一笑殘夢破窺人片月當牕虛句不能記意則
省餐英歲晏幽懷攄聞君目盲類張籍行階恒用
柳栗扶顧我朝衫苦未脫眼有黑花霜生鬚幾時
親戚共情話間間十畝真歸歟君盲雄談尚驚座
我老吟興吞江湖東籬斗酒足娛樂還堪寫作二
老圖天涯此際漫矯首宮亭雲樹愁模糊題詩寄
君待回鴈寸心飄比風中旟

對秋日重過北蘭寺六首

薄書烟海坐相仍秋日羈愁一倍增何處空林堪
脫帽祇應還訪北蘭僧

竹逕茅堂蘚色滋芭蕉葉大蔭方池到來空綠生
衣袂恰好詩翁著句時

荒阜孤亭緩步躋棟花坪好故人題香篝茗椀纔
料理苦被蟬聲攪日西

棟花坪爲邵子湘題

烟江疊嶂曾看畫列岫亭邊畫意賒奇絕廬山飛
鳥外一痕晴碧落簷牙

宋王晉卿有烟江疊嶂圖

澹雪泉開碧篠籠酌來真與錫山同太平寺裏誇

牛乳僖父應知是杜公泉舊名俗甚亦于湘做
偃仰禪關愜素心黃昏待月向風林騶人莫漫催
歸騎且聽莎鷄自在吟

鎖闈即事二首

豫章鎖院傍東湖試日秋高氣象殊蕉葉風微江
籟靜賞花雨過月明孤縱橫文陣來天馬遠近華
燈散夜烏獻賦幾迴思輦下少年餘興未曾無
羣賢將事盡從容簾靜堂虛氣愈恭使者定推冰
作鑑老夫先識劍為龍烟雲匡嶽開生面文字廬
陵有正宗畫角無聲公讌罷庾樓清嘯答霜鐘

題唐解元墨杏花

度雨籠煙帶淺嘖芳園貌取惱花神始知落墨徐
熙格別具嫣然一段春

瞥見緇塵改豔妝臙脂何必點窺牆依稀穀雨長
洲苑正袖風流鬪女郎唐題句云穀雨長洲苑旗

亭賣酒家女郎全正袖杏

綿津山人詩集卷二十終

然對山入詩集卷二十然

林莽
附茲玉
曾見
烈烈
雨
墨杏
外

綿津山人詩集卷二十一

商丘宋 犖牧仲

嘯雪集

歲暮對雪用王元之除夜寄羅評事韻二首

何處厭原山江城一皓然殘蕉當徑蠹孤鶴背風
眠蕭城公餘地崢嶸歲暮天欲將新熟酒分給釣

魚船

幾日即朝正寒威凜劍稜雲深南浦驛烟斷北蘭
僧社鼓喧江舫官梅簇畫燈長歌容鍵戶雙戟結

輕冰

水破硯

誰令端明體不全應從洗墨墮池邊良工巧致雙
符合尤物寧慚片月圓文字發皇還藉爾溪巖靈
秀固依然花鈿貼處饒丰韻俯足昂唇詎可憐

相蕭竹屏翰此制製苑暮天於林深燕面合益險

竹屏樸以華韜匝畫堂遮玉版淚痕結金絲蟬翅
加青蒼仍篠蕩縹緲帶烟霞何必神臺上琉璃始
足誇

孔雀聯句 同兒

珍禽產炎方嘉名錫南客品流亞鳳鸞羽毛豔圖

冊 牧 紀官今大夫獻瑞昔重譯 至 卯伏或在埒籠

致恒從舶小兒對本佳九嬪賦稱藉翠旌兮楚吟

飛蓋焉漢借 牧 樹尾聲肅肅蹠足晴覩覩矜麗逐

冶容導舞應手拍 至 思鬪儼鷄雄獨立分鶴格 牧

金錢列繡屏綠蕤聳彩額 至 行憐襦褌披叫任郁

吶嚇似竊龜背穹應受鶯歌責 牧 飲泉牴防牛啄

地毒尋螫 至 薄怒首漫翹偶驚角忽坼 牧 入春倍

絢奇落花齊凋翻碧雞謝森纏綠鳩畏逼迫絲竹

愛啁啾鷓鴣等格磔團扇製孫工車輪樣爭赫栖

宜珊瑚枝步當瓊瑤席織裘藻火鮮珥戶錦雲奕

萬里來三梁兩年伴雙戟鈴閣引頸閒嶺徼歸路

隔至影弄晴景初夢繞瘴海夕仲牧每嘆造物靈允

屬文鳥伯至命儔整以暇比翼光而澤朝飢生菜

耽暮宿高架擇沙虛卧喜便徑曲飛嫌窄仲牧頰渾

染淺黃衣不著點赤至傍籬菊愧金照水池全碧

看雲頻孤鶩下堦時一擲懿哉西施稱困矣太尉

宅枇杷取共寫黃荃有枇杷孔雀圖鸚鵡許同適丹梯舊訝

登桂蠹疇醫瘠病亦來清詩貴維因創獲蹉跎感

待士悵望傷寄迹仲牧久結青霄懷會充元圃役至

西崑刻畫餘漫堂更擴擴仲牧

聯句後戲成一絕

解道能文是虎兒天涯歲暮共深卮三年宦况惟

今樂雪夜聯吟孔雀詩

附步前韻

投老心情喜譽兒聯吟又把歲寒卮極知學語

多生澁不類斜川集裏詩

題沈石田所作米不米黃不黃小畫

米不米黃不黃淋漓水墨餘清蒼觀此石田題畫

句便知其畫神妙不可當昔為王子石谷所寶惜

後為歸叟希之所秘藏今也等閒落吾手不啻稚

子得珍果連噉不輟出入懷袖神飛揚竭來挂之
高齋之素壁橫峰側嶺斷雲疎樹一一生動發奇
光漁舟儼瓢小萬頃凌渺茫舉似宋代晉卿烟江
疊嶂卷正復難爲軒輊各自光燄萬丈不減李白
杜甫之文章精神所注足不朽即此偶然片紙當
有鬼神呵護豈是尋常粉墨雲烟過眼旋消亡嗚
呼畫之妙也如此安得驚人句題向畫之傍坐卧
其下者三日推敲不定空徬徨今日雪中大醉忽
然振筆直寫所欲吐滔滔如決江河之隄防世間
萬事非強致投筆一笑且覲瓶內凍梅香

簷冰

雪晴簷雷忽無聲寒逼琉璃寸寸生列處疑簪將
取戴看來似筍漸抽萌消須門戶和風入墮恐兒
童爆竹驚笑我頭銜今轉大依然不媿一條清

鱸魚

食指連朝動幾回銀鱗分自泖湖隈遠同黃雀馳
孤擢急倒清樽醉四顛風物蓴羹堪顧惜烟波篚
笠重徘徊一官不直由來是抹煞張翰亦辯哉

放翁

有千載虛名笑張翰
一官元不直蓴鱸句

得梁曰緝侍御報書卻寄

鄢陵先生梁曰緝卓品崧高竝崑岷年未五十解
組歸勇退誰能似此急庵結老學不窺園剝啄何
人許攔入昔余需次金明門冷炙殘盃每霑及君
方嶽嶽冠惠文邸舍一樽將我揖晨夕厨俊快追
陪堯峰之叟手頻執謂汪鈍翁貴游車馬不暫停我輩
閉關類蟲蟄有時雄談到五更僮觸屏風蜚語澀
別來忽忽三十年舊雨相思祇於邑前一寄書恐
莫達千里報章如取給中間引喻詎敢承人物王
東湯潛邈階級計日笑謝碧油幢同向煙波著蓑
笠講解孝經君語謙來書引放翁欲為鄉隣講孝經句鑽研知遍

經史集曰余雖老願執鞭遙望陶城幾竚立

題太真調笙圖

花底楊妃弄玉笙貌來纖指最多情誰知此曲聽
纔好惹動漁陽戰鼓聲

歲暮喜周杞公過訪即留小飲次日同至北

蘭寺看雪次見贈原韻二首

天寒山稜削歲晏江流清蕭辰坐膝閣懷抱何崢
嶸故人千里來颿與孤鶩爭相見嗟我老君顏仍
玉英讀君贈我句如露霑金莖拂拭漫堂榻傾盃
話平生梅花爛然開無限冰雪情

朔風吹倒人江徼忽凜冽相携策馬去飽看北蘭
雪竹屋壓欲摧池冰迴激激嘯歌雜詼嘲頓慰七
載別高文晚愈妙堪追韓杜傑品泉滌俗韻論研
得怡悅禪語叩叅寥君優我維劣

林檎

嘉果名元著芳鮮出上林蘋婆同似玉霜橘愧稱
金擘自憐珍味收應奪衆禽濟南開館處遺帖大

王欽

刑子愿有
來禽館

早春新霽有感用梅宛陵和景彞閏臘省宿

韻

循牆幾載抱凌兢隨手年光又解冰綠竹風聲傳
細細碧天雲葉卷層層間從簾外移花盜鬧說街
頭賣紙燈禪榻鬢絲何限意誰云不是入山僧

雪夜飲酒二首

我官一何熱我心一何冷

同邑沈文端相
國家書中語

卓哉前

輩言其味佳且永自我來江國頗厭煩囂境衙齋
類僧居冷味快獨領三載冰雪窟今歲雪更猛入
春遍霑灑西山玉作屏梅花凍不開何處覓紅杏
寂寥燒燈前文案恰稍省繙書駱駝坐爐篆兼燈
影相伴鶴與鷗羽毛殊修整詼嘲誦歐詩風騷羨

馳騁

我素不飲酒飲祇一蕉葉嚴冬因臂痛遂與樽壘
接一杯露枯腸芒角不可攝兩杯磊隗消起舞亦
何捷三杯變朱顏春色入雙頰譬彼枵腹子文史
聊涉獵不輟日勉旃聲名頓超躡深夜更傾倒霜
笛小童撼大雪漫天來屋隙飄蝴蝶吟情邈空山
不復知沿牒呼兒寫硬句凍硯急磨歛

喜得彭無山黃門報書

彭侯磊落襟懷孤歐陽四門堪為徒孝廉鄉舉自
蚤歲英名直與烏石俱昔當閩亂託疾卧三年身

上無完膚時平筮仕得洵水跼蹐何異轅下駒勸
農講學比家事按治豪右矜無辜時余持節向通
潞薦揚曾上大府書強項之號舉以贈開心寫意
欣相於我官于南灑淚別轉燭不覺五載餘西江
建牙愧濫寄臨事迂拙手口瘖十三郡人少休息
旦晚自劾歸田廬聞君畿東久閱歷薑桂為性終
如初議鐫議罷考功法賜金乃復停鑿輿盤錯
屢試望愈峻大臣推轂帝曰俞黃門給事荷
寵命聲價不啻璠與璵臨風短札聊寄訊雜以規
諷伸區區不圖作答二千字委曲盡將肝膈舒嘉

猷誓矢告我 后焚草敢將虛名沾紙尾數語頗
瑣細添丁笑作三河呼似此交情足千古方之金
石良非殊回環莊誦口流沫中夜起舞傾杯壺再
拜擬作王褒頌抔揚鳳鳥鳴高梧

寄黃梨洲徵君

文獻南雷尚未湮望從卻聘愈嶙峋忠端氣節傳
先世顧及交游號黨人大業名山驚乍拜暮年撰
杖擬相親中原應社侯羸倡已自垂髫向往頻

倡自朝宗所
以應復社也

土無柳子

異果分來自嶺南棕皮剥盡殼中含白膚盈寸驚
初剖清液霑唇得半酣葉少林高傳載籍品奇味
別帶煙嵐非同蒟子徒為醬留作詩瓢挂草庵

燈夕用韓持國韻

雪晴豐霽驚間牕詩懷似海筆似杠聯句兀臬傲
韓孟角勝不待金鼓縱向夕治具酬令節草草何
必烹羊腔畫屏匝匝妙剪刻空堂照耀開明釭琉
璃挂定灑秋水當簷祇恐風擊撞自我蒞此忽三
載守拙頗宜民俗厖有時策馬出北郭褰衣列岫
名臨長江今也清興復不淺嘯歌邠許南樓降喧

闐街鼓雜爆竹旗門深閉森矛縱起踏明月偕賓
從蹠躑鶴舞當堦雙轟飲無筭到酒腳呼童仍進
大食缸

綿津山人詩集卷二十一終

...

綿津山人詩集卷二十二

商丘宋 犖牧仲

漫堂草

春日雨中用至韻

溟濛江上雨正是插秧時種樹催辛秀聯吟擬退
之濤應翻古井柳欲暗叢祠惆悵遨頭阻空餘弄
酒卮

雨

去冬十日雪今春十日雨端居豐暇豫冲襟快容
與霑灑遍江界淒清逼解宇懸麻急陣催驚湍空

堦聚雲濃儼潑墨雷殷過撾鼓秧針戰遠騰浪花
翻別浦巖崖遲芳眺花藥探深塢翠憐棕扇欹紅
訝櫻脣媵照水聳海鶴望晴叫鸚鵡巡簷腰髀便
閉閣樽壘舉畫展江南春思入古竹圃燒筍願莫
酬束帶情何苦且好讀漢書因之教兒炬
空翁偶讀江湖長翁詩有西江米粟絲作窩之句
適午飯有此欣然爲長句用原韻

天陰對畫向霜壁嗒然移情忘午食西江米粟絲
作窩妙句偶檢長翁冊竭來厨娘適進此風味殊
佳驚創得我家西陂十頃麥芄芄每愛沒牛膝餅

盤麩磔飽農夫至老不見長腰粒况此粉之復縷
之蠶緒遜工玉遜德芑以薑橙點醯醬放箸縈迴
定千尺飯罷江樓望江甸如毯新秧風策策

雨中示朱樸士時樸士將遊齊州

旗靜門閒戟自交雨中飢鶴上堂坳花枝檻列春
秋桂山礬一
名春桂菜把園供大小巢雙履輕拋苔欲浣
三杯軟飽句從敲暢遊擬共修之去免使山靈遠

獻嘲

采芑作用陳簡齋村西買山藥韻

曉起向射廳偶試登山脚鶴邊送遙青紛披足花

藥芭從故鄉移生意恐小卻孰知春風吹新苗映
叢薄采采念雅詩清露衣上落我今困塵鞅如鳥
雙翅縛野飯偕村農幾時踐夙約芳歲委江濤搔
頭聽姑惡

起姪出守威寧將取道豫章詩以遲之三首

蠻煙瘴雨自遐陬年少何妨萬里遊此去當官須
鄭重道傍負弩是諸侯

過家上塚清明後取道西江慰老懷風雨連旬縱
留滯也應擁傳度臨淮

矯首江天耿寸心月明還惱蔽層陰鱗魚將到紅

薔發遲爾衙齋次第吟

咏庭前花木五首

誰傍疎籬種小桃亂藤惡竹苦相交年來手爲芟
除卻牆角棕櫚得竝高

架上紅薔錦段張惱人顏色帶人香簿書叢裏抽
身去獨凭欄干到夕陽

叢桂連蜷色可餐凌晨清露更溥溥白頭翁亦知
憐此故把新巢葉底安

西江昨歲兼旬雪末利芳蘭晚吐芽一事最爲殺
風景佛桑兩樹不開花

山櫻矯作盆中景輪困離奇亦可觀不道如珠纜
數子朝來已被鳥銜殘

鮒魚聯句

同周岷公朱悔人吳志上兒至

時鮮誇南州首夏三鰲薦嘉味配朱櫻芳辰趁紫
棟仲牧白浪狎噉喙碧藻恣遊行至昔名江東產近

憶富春岸

叶公

巨口靡足稱縮項那堪羨

至

响沫

信知樂小觸輒生悵色潔鏤晶寒腹蟠堅甲繕悔人

鼓鬢奪爛銀脫網閃淨練形秀躍匣刀刺翫折襪

線

牧仲

後濟諒匪誣去鯨當屬諺

至

出水尾未頰入

苟目猶眴

岷公

來應月令候行不江湖徧

至

恪貢馳

驛騎特獻開寢殿稍踰往歲期恰佐端午醮牧仲飫

嘗歡野客中厨先使院悔人既陋白小微亦晒松鱸

短

叶

如茶列犀鎧滋灰結寶鈿細瑣骨支撐叢苞

子連貫

叶

飪合澗芹兼雋竝盧橘見

岷公

滌腴挹泉

乳助韻芣薑片志上釋名爾雅闕方法本草撰登俎

防損鱗貯肪偏宜甌悔人較河豚謝毒與熊白等觀

叶

牧仲

香疑蹻鼎熟飽覺颺飲濫

叶公

脂滑乍霑脣

羹美留漬麪志上生致體姝瑩緩烝勢若顛畏啖何

其愚

蜀人呼為瘟魚不敢食

得珍未妨擅

悔人

買時綠荷包膾

處霜刃剗玉屑簇簇攢冰花差差纏至風透座送

馨日晡色不變骨鯁雖摧殘煙波仍眷戀志上老饕

偕五君朶頤或三燕盤罄風雨疾箸鬪楚漢戰牧仲

蠻語詠參軍齋心戒許掾予是日蔬食志上雅章緬信陽

託諷意何限叶牧仲

別院二首

別院如山靜旗門鼓不過往來行藥地開徧蜀葵

花

搗醬收梅子移欄避筍芽也知公事少清課近來

加

朱悔人雨中見過留飲衙齋同吳志上兒至

分賦用湯西崖簡張弘蘧韻

潞沙一別五年強猶未抽身返芟梁何意宦途容

建節無多家法祇循牆故人偶過同聽雨好句分

題各據床端酒依稀便酒冽醉餘消受竹風涼端酒

出金陵味類豐潤便酒

次前韻

載震

風流不減昔年強五載相思月照梁久許心香

師宋豔誰搖健筆短曹牆操卮憶往東西路跋

燭論文上下牀最異戟門清似水幽花滿院雨

蒼涼

次前韻

錢塘 吳允嘉 志上

夜分索句興偏強爭似新泥落燕梁戶外雨聲
多在竹燈前花影自窺牆官宜老鶴同三徑客
許清琴共一牀贏得宋家冰雪咏頓教五月座
生涼

孔雀雛

炎方珍鳥得佳雛飲啄風前本自孤棲桀何妨從

奮迹吮毫堪為寫新圖

趙松雪有錦石雙雛圖

微聞格磔呼

都護已訝斑斕類鷓鴣待到屏開倍馴擾青蓮閒

客頓教輸

白鵬號閒客太白有詩亦稱為雛所伏

辛未夏五月過北蘭寺時煙江疊嶂堂初成

漫賦五首

茅堂一到一番幽碧筍如簪傍檻抽得得山僧扶

杖出楮袍翳笠總風流

棟花坪子最荒涼徑轉籬開石几張好處花時還

記取繽紛紫雪點衣裳

小閣秋屏竹樹團蕭森五月欲生寒推牕又改山

川面不與空亭一例看

煙江疊嶂堂中坐流覽烟江疊嶂圖莫把清光浪

摹寫且須長句誦髯蘇

斷雨殘雲滯復行蒲颿十幅往來輕斜陽忽放山
根出江外重湖一線明

附次前韻

載震

小堂通野阜轉清幽壓戶藤梢帶葉抽最好江洲
浮遠綠孤懸塔影漾中流

領取空庭五月涼烟生粉壁畫高張羅牧畫壁何來

萬箇青鸞尾翠滴層欄欲染裳

歷落村坳碧幾團隔江遙睇動深寒雲嵐橫側

紛成態載酒頻來不厭看

晴簷對景閒披卷松雪翁書文沈圖不是漫堂

雅好事阿誰舉似到王蘇宋王晉卿烟江疊嶂圖東坡題詩真迹今

不可得公有趙承旨書蘇詩沈啟南文衡山補圖卷是日携至同觀

短柵透蛇曳履行晚颺搖颺葛衣輕老僧送客

烟江外一鳥啼殘落照明

題祝京兆髮書

迸出驪珠濡墨時縱橫真欲逼游絲香鬟髮鬢盤
鴉色剪付枝山也不辭

小蘸烏雲向研池中書君老未應奇宣和飛白看

雲字為余家舊藏三昧均將造化師

雨中用至韻

近得西陂信，荒寒比舊加。空亭浮積水，茅屋映疎麻。
鄉國愁何劇，江城晚不譁。射堂間對酒，冒雨摘新瓜。

次韻答朱悔人四首

鬢上繁霜逐歲增，風雲真自愧依乘。姚江姓字瞻

巖谷

時得陽明廬山紀功碑

滕閣登臨感廢興，小草也知人

共薄高文何綺老，無能天涯喜接掀。髯客梅雨庭蕉綠幾層。

堆案文書撥不開，敢言胸次絕纖埃。事當鑿柄新愁結，詩別源流舊雨來。江上鱗魚纔出網，幕間乳

燕乍翻雷，臨觴古跡無勞問。已妥先賢闢草萊。

新

理學忠節二祠

河曲勾留憶潞沙，鈴齋會合興還賒。經旬眠食都添味，何處林巒不是家。古寺扶筇行竹色，方塘展席對蕢花。匡廬傲我曾遊眺，指點空亭帽影斜。跋燭分題共策勲，深衷湖海託鷗羣。家人雜沓求書扇，裨將追隨解好文。小別西江浮篋舫，言歸東浦卧溪雲。祗應歲晚寒梅發，明月幽牕好遲君。

漫興六首

稀疎梅子墮階黃，雨過棕櫚葉有光。末利蘭花相

鬪發高齋長日罷焚香

吳下楊梅未結綠嶺南荔子倩誰傳眼前一事差
強意頓頓鮓魚六十天

盆內荷花靜且妍愛他新葉更田田幽牕夢醒聞
疎雨只欠西陂打鴨船

曲徑斜陽豔草花幾枝紅蓼奪明霞蜂房偶過堪
成笑我放衙時爾報衙

連日北蘭間看竹全拋俗韻得相羊依稀東圃筮
籬下二十年前一段香

庭敞簷虛對遠天桃笙烏几晚風前小兒下學來

相揖左氏喃喃誦一篇

送羅飯牛入廬山歌

子以牧爲名我以牧爲字二牧生平偶不同各於
詩畫有深寄我詩苦吟四十年得小三昧嗟華顛
子亦行年平七十一生供養惟雲煙昨於北蘭寺
中煙江疊嶂堂見子所作烟江疊嶂畫壁纔數
尺意興何瀟灑一掩一重出肺腑徂畧茅亭總光
怪猶云此水石規摹董巨而爲之更有粉本迴出
董巨外匡廬五老崢嶸霄漢皆吾師子携畫筆往
我寫詩篇送如澗之酒壯子行何惜傾倒畢卓甕

酒酣一棹浮章江恰值梅雨初晴山鳥哢

題石田翁虎丘圖次原韻

權弭禪關路舊知可中亭畔步威遲誰憐奉使三

春住祇辦看花一首詩余官平江時僅有虎丘看玉蘭一詩塔影山

光心獨繫茶香歌韻老偏宜披圖愈切誅茅願惆

悵爐烟裊細絲

浯溪磨崖碑

驪珠顆顆照荒厓元頌顏書一色佳大業當時勞

紀述後人持論苦擠排秦碑周鼓寧須詫兩點苔

花詎可埋墨本看來頻下拜浯溪還擬躡青鞋

以方竹杖贈悔人作短歌

寧州方竹亦一奇截以為杖良所宜四稜獨異碧

篠蕩七尺誰琢黃琉璃杖兮我把朱髯餉相扶直

到廬山上勸君慎勿規而圓本色一改不值錢

附前題

方竹杖子長七尺產于寧州積雪石觚稜節節

削不成竹色渾如一條碧朱髯性好名山遊贈

之濟勝應不惜聞君新製方山冠更著方袍躡

方舄茲遊將訪廬山松手扶此杖凝方瞳由來

圭角世所妬須入白雲峰裏峰

答詩

載震

明日別公廬山去贈我竹杖隨行膝體方節堅
色滑淨一條碧玉丰稜稜側聞分寧窅巖谷狼
虎部曲蒙茸藤截致頗難形甚古大樸不雕囊
以繒世間圓柔易爲好直方誰解堪依憑我老
嬾拙無一可舍藏信宜行未能大布一領書一
簾漫遊得此真良朋匡君舊識不我棄招手高
峰穿峻嶒扶携萬仞觀天地大笑齊物無鯤鵬
拜公嘉錫感公意知己名言永服膺何當杖頭
書歲月幽尋衡岱高華恒

北蘭僧房半間余題詩處也悔人倣曹峨眉
司成爲王阮亭司馬題漁洋詩屋例署爲綿
津詩屋繫以斷句余愧不敢承漫爲賦答

綿津三舍避漁洋詩屋新題詎敢當祇好罷官詩
也戒蒲團分據已公房

附原詩

載震

茶鑪筆格日橫陳一榻蕭然對綠筠風味漁洋
真可比此中也合署綿津

白槿

舜華自昔豔新粧皎皎風姿獨擅場一樹籠煙間

倚檻幾枝如雪澹窺牆唐昌品格從教異蒼荀霏
微祗遜香習靜朝來相對處分明姑射共徜徉

奉懷徐俟齋先生時得先生畫芝蘭圖

吳閶幽絕是華山高士何年此閉關造訪旌麾空
悵望湯潛菴曾過訪不遇逃名巖穴愈孱顏月泉吟處仍霞

外海嶽圖成落世間乍喜芝蘭一披拂清風千里

欲追攀

偶讀松圓詩集題卷末

風流詩老說松圓妓席歌場句每傳斟酌四聲成

白髮低徊三嘆是朱絃長蘅李流芳比玉宋玉題襟數

楚水吳山寄興偏蒙叟錢虞山於今亦黃土阿誰真

賞浪淘編

題李長蘅蒼巖古木二首

蒼巖古木寫蕭疎名士風流託興餘題字幾行心

折甚知音誰似董尚書文敏

紙上烟嵐若可餐董源老筆共噴嵬怪他丘壑如

相識在昔忘歸贛州巖名得飽看

數月來聞汪鈍翁王勤中惲正叔劉山蔚相

繼謝世灑淚賦此

遠道頻傳薤露歌人琴此日奈愁何宋中耆舊傷

心盡吳下風流逝水多塵篋祗憐餘翰墨荒墳欲
拜阻關河黃昏鈴閣題詩處忍見空梁夜月過

漫嗟再用西厓韻

漫嗟霜鬢入秋強且聽童兒誦穀梁無賴戎葵紛
上砌斬新斑竹欲過牆鷗情鶴思天涯客筆格茶
鐺露下床缺月漸升江介白一聲畫角助蒼涼

贈羅飯牛

老去飯牛子圖成破墨山襟期自丘壑揮灑到荆
關寄迹蓼洲上時遊廬阜間烟波相對處羨爾似

鷗閒

喜錢介維見過

秋日秋屏接鹿牕介維別號鬚眉也作鹿門龐江湖又

得冲襟合歲月真驚過鳥雙壁出豹囊聲瑟瑟時

藏墨樽開檠燭影幢幢看山尋寺中丞事王文成有中丞

見貽不解了公事到處看山復尋寺句從此題詩獨爾降

秋日示介維

莫漫江頭問檝師天涯會合且題詩北蘭修竹東

湖月恰好新涼欲到時

扁舟羨爾全無繫倦鳥嗟予尚未還不少雙江風

味在兩翁相對聳吟肩

天都峰勢迴孱顏摹寫輸君倚杖間今夜老夫有
清夢暫拋廬阜向黃山

曹實庵靳封熊年來共酬倡鹿牕句子訝偏清何妨鼓

吹西江派也學涪翁作主盟

紅豆聯句同錢介維吳志上兒至

亭亭海南木結子麗不億仲牧託根自蠻方秉性具

炎德維介種植徐表傳土物宋初識至樹爭號杪櫨

花迴類蒼葛脫莢狀仍菽卻瘴功等蕙仲牧擊珊瑚

紛如染靺鞨一色維介臍裂儼招痕膚茜足首飾志上

啄許綠衣嘴栖合丹山翼至妃淚凝冰丸鵲血漬

粒食維介含桃唇乍翻澡豆面同拭志上飮果陋巴蜀

夥銀尚京國俗多于銀中貯之至袂豔將火棗齊圓未驪珠

逼志上映燭暈彌增記曲名舊得維介貽喜傾筐傾貢

缺職方職愛之則龍睛棄之則鷄肋至嵌骰播樂

府賭酒效鉤弋仲牧打鴛鴦以雙寄綢繆怨特志上比

難窮羅虬藝匪待后稷維介好製絳囊盛恐被黠鼠

賊志上蒙叟名山莊風流信無極仲牧

送介維還歛兼寄靳熊封

楓葉飄蕭動夕吹送君南浦意凄其小留黃篾鷗

邊舫共吸清光月下卮求研邨辭開古井相傳歛研出獄

中古井者佳

搗烟須為寄西陂

託介維製西陂墨

鴈堂令尹如

相問報道殘年祗辦詩

介維將解纜為風雨留一日再賦送

江上驚飈起征颿未許揚幽蘭留閉戶疎雨對持

觴悵秋屏閣逢迎問政堂熊封堂名月明修翫事干

里望佳章

早秋雜興五首

豫章兵火苦侵尋何限 朝廷眷顧心三載蠲租

三十萬江流難竝 湛恩深

武陽陶瓦教當時碑版煌煌紀牧之報稱愧臣無

一可也從天上荷 殊知

劉楨禦變有遺篇此事當初亦偶然敢做文成磨

石壁大書深刻向開先

讀法仙宮月吉趨先賢祠宇闢東湖千牛習氣都

驅遣甘作乾坤一腐儒

北蘭寺裏看山罷種菜亭邊校射歸一事夜來徵

左氏青熒燈火坐書幃

夢中得句醒而足成之

戶外青山扶杖得隴頭明月咤牛還夢中得何須此

景親消受夢裏題詩亦灑然

綿津山人詩集卷二十二終

五刃青笑過火空言對

其蘭香寒香山頭雨本無對恨詞一年亦來遊

翠豈甘打掉帆一臥

黃去山宮且言歡夫習所半關東賦十中皆京

中登大書彩條向開夫

隱謝東變音影為北喜當西亦斷想其文九

一四山翁天土荷

綿津山人詩集卷二十三

商丘宋 犖牧仲

漫堂草

奉酬阮亭司馬見懷之作次原韻

清詩遠道寄南州正值天涯獨倚樓 聖代史才

借司馬老夫心事付閒鷗雲烟鎮日分洪井魚麥

何年慰白頭欲答鐘鏞慚瓦缶坐看孤月下江洲

附原倡

王士禛

中丞持節鎮洪州滕閣重開勝庾樓清簟疎簾

過暮雨隱囊紗帽對江鷗曾來弭櫂悲前劫未

許題詩到上頭安得乘風度彭蠡與君吹笛坐
滄洲

又奉答題烟江疊嶂堂絕句二首次原韻

茅堂樹色隱重湖堪入營丘水墨圖編籬開逕年

來事卻恨漁洋志裏無司馬數年前
粵有南來志使

勾留初地對江湖功業韓襄毅
公雍林貞肅
公俊敢浪圖詩

罷老僧同啜茗風流龍井未全無

原倡 士禛

東湖勝事擬西湖幻出烟江疊嶂圖也似坡公
憩龍井不知曾有辨才無

題松圓詩老寒林曳杖圖

孤岫聳天外寒林參路傍松圓寫平遠老筆追河

陽縣我漫堂壁當暑生風霜踽踽曳杖叟定向華

子岡

空庭

空庭明月共徘徊偶試玻璃海外杯石谷新圖阮

亭句恰從京國一時來

雨中同心壁上人集烟江疊嶂堂

雨過江干寺尊開樹下窻花香齊已共詩格阮亭

降時誦阮亭司
馬見贈詩斜照山全出沿波鳥自雙清光費

摹寫回首暮鐘撞

羅浮仙蝶歌寄至兒

有客贈我羅浮繭狀如榭繭大二三甕形雖非扶
桑敵土色良與赤埴參筠筴遠致自海嶠依稀尚
帶青羊嵐南榮高縣清明候兒童周視恒耿耿恐
遭陰翳傷獨蛹默加愛護祈先蠶昨者蠕蠕忽蠢
動化生彷彿縑箱蟬輪困翅展摺疊扇五色渲染
畫史慙勻圓四點儼雲母奇光異彩紛相涵文身
祇宜花底活纖眉卻令閨中耽紅薔正吐摘藥飼
移置美蔭選石楠三日戢翼蟬抱葉相倏爾薄

蔚藍恨不維繫作佳玩秘篋聊記資清譚今夜月
明晃流汞空庭佇立當微酣一蝶翩然拂檻落絳
霞幾縷從天南殊常綺麗奪人目風前畧辨眉黛
甦或云其母實覓子藥畦苔徑恣幽探漆園偶夢
情不極滕閣欲揭誰能諳俄驚霄漢去無蹟神仙
窟宅隨鸞驂葛洪遺衣迴茫昧此理揣測余何堪
夜闌高咏誠一快千里屬和催中男

鄭谷口寄隸書韓詩喜而賦此

雲陽遺法邈難窺谷口農今擅此奇寄自臨池呼
酒後快同駐馬看碑時縱橫似出華山格排冪宜

書韓愈詩舞女插花人始愛邨從老櫟覓鍾期

谷口

與周元亮先生最善

壬申四月十九夜夢阮亭司馬屬咏瀟湘鴈醒而急錄之一字不遺

湘岸澗水無際月明春鴈翔徘徊念儔侶清影落瀟

暇日治圃志上以詩美之次韻奉酬

荷鍤腰鎌命老奴射堂種菜學髯蘇初心祇許親
藜莧勝事還教理竹梧雨後青葱人罷灌畦邊吟
嘯杖堪扶多情上客來相美石谷他年待補圖

附原倡

吳允嘉

放衙無事課花奴翦竹移蕉土氣蘇清味盤供
鶯宿菜濃陰牕借鳳棲梧練裙亦可居官著藤
杖何妨未老扶安得虞山揮老筆爲公寫作灌

園圖

玉茗花

雙樹連蜷傍檻斜園丁喚作白山茶種疑后土廟
中得名自臨川堂畔嘉灌溉每同蒼筍惜陰森還
借海榴遮春前看取開如雪細咏西江第一花

題倪高士幽磻寒松小幅次畫上原韻

松色與礪幽依稀寒溪路珍圖傳江南三日留閉
戶雲烟拂几席流覽慰遲暮寥寥此筆墨深合荆
關度俗韻吾庶免永言高士晤江南人家以有
無倪畫分雅俗
西城別墅詩為王清遠賦追錄丁
卯年作
停不掛五兩去聊愛羣峰青

石帆亭

苦竹截為檻香茆縛作亭宛同一扁泛憶向雙江
樵唱軒
返照轉樹腰微風坐來歇是時開南軒可以望明
月我愛孟襄陽呼與掘詩窟

半偈閣

小閣不數級香鐙閣上俱亦有和松菴不去啜我
迂幾時持半偈來共叅文殊

大椿軒

鼠姑色太妍栗留聲太滑獨有薜荔裳風髯自摩
戛何如漆園椿曾閱千春八

雙松書塢

粲粲列宿迴謾謾輕濤生秋陰落滿地雞犬亦未
驚但聞深塢裏夜牕出書聲

小華子岡

柴門鑠松筠林麓何窈窕有時出西莊村火動林
杪指點華子岡比似輞川小

小善卷

藏書萬卷餘置身百尺樓不若緩步閒洞屋得清
幽試問高卧者樂亦有此不

春草池

何用遙相遺烟草不堪翦池塘佳句抽康樂夢徒
福別後思青青裊腰更應展

三峰

三峰出羣早磊落秀削成寧使米顛拜我見亦乍

驚下有萬斛泉鳴玉長琮琤

嘯臺

長嘯臨高臺游目入歸翼安得塵鞅紆來此借肩
息終無綵筆干所恐萬象逼

石丈

嶽崎故有意離立長如人環以羣木古况乃蘚繞
身誰謂石無語亦貴氣象伸

竹徑

夾徑千琅玕新詩上頭刻彈琴不見人衣染青蒼
色豈知王逸少亦向竹中匿

綿津山人詩集卷二十三終

[Faint bleed-through text from the reverse side of the page]

綿津山人詩集卷二十四

商丘宋 犖牧仲

廬山詩

壬申七月余自江右移節三吳放舟彭蠡抵南康初十日謁白鹿洞禮成遂過三峽橋遊棲賢觀玉淵潭明日經萬杉至開先坐漱玉亭觀瀑布就宿寺中又明日登舟往返三日得古詩六章同遊者南昌廣文楚材諸生涂居璉錢唐太學吳允嘉釋宿應超淵寧都山自人羅牧兒基筠族孫鈞凡九人

自我來豫章便結匡廬想顧為塵網羈不得掉頭
往今晨泊落星篷牕晴嵐盪巖厓擬攀躋懷抱輒
蕭爽初途背城闈肅然五老仰陂陀屢登陟耳畔
清泉響小住傍松根山疏時在掌鹿洞千年踪絃
誦欣吾黨行行促輿夫樂地兼幽賞
洞古之國學肇興自南唐考亭昔主此垂訓何周
詳適際堯舜世大化九域翔宸翰與世賜書照
燭留山岡繫余忝秉鉞咫尺恒相望學規藉文敬
余曾頌胡文敬學規愧未親敷揚移鎮荷新命來謁夫子
堂諸生肅奔走特達咸圭璋勸勉亦云切廩餼聊

薄將余置洞田少許象山講義利令人泣霑裳大哉子朱

子錄取置座旁斯人不可見後學徒徬徨洞壑蘚
花積橋亭松風長欲去仍頓軛願此抽篇章

久曠山澤遊冲襟鬱以積出洞偕衲子展眺意良
適溪攢芋葉青籬綴豆花白村農遮道周兒童窺
門隙酒漿競跪進誰忍去爾迫俄驚三峽橋截礧
卧千尺斷岸儼瞿塘奔濤撼怪石亭午炎威熾橋
下任投憤颺迴難久留更振厓畔策玉淵得一奇
深潭注寒碧葉落鳥應救中藏蛟龍宅林際開寶
坊鐘魚震幽僻講堂倍寂寥緬懷讀書客連蜷雙

桂樹攀條足晨夕解帶鎮山門佳話傳自昔我匪
蘇揚儔一笑踵其迹

楊文襄效坡公留玉帶于焦山余復繼揚留玉帶于此

題名倩山人顛米爲辟易須臾織月明松杪翻宿
翻呼酒勞徒侶流螢點絺綌

趁曉催遊伴竹輿嘔啞喧削壁望五乳隱隱辨寺
門緣壁出汲僧騰擲疑孤猿誰繼憨大師妙義闡
風旛三歎舍之去萬杉停短轅當逕排古礎驚並
石鼓捫法界啟北宋丈室殊弘軒昭陵御筆失賴
濱長句存香飯分一盃杉影清心魂僧誇槐京字
導我過荒園

寺後有槐京包帚書龍虎字

俗書那足貴乃比與

與璠磴礴楓樹下嘯咏石上蹲野翁筓籬外擁瞰
頭如黿秋暑酷未退何時兩翻盆行將挹飛瀑庶
滌胸中煩

精藍首開先欲到心甚渴望見鶴鳴峰已覺俗韻
割迨至招隱橋一旦詩意豁千松夾道迎虬龍鬪
空澗茗華放翠蓋可玩不可掇路轉殿閣雄欲並
山巖薛紆迴軒檻幽經營元宗末浮慕世外遊忍
將民財括轉瞬幾滄桑書臺蒙野葛石眼聰明泉
畱洗水精鉢煌煌紀功碑聲施何弘達嘉靖識良
異觀者恒咄咄

王文成刻石在正德庚辰明年世宗即位碑中有嘉靖我邦國語觀

者異之

涪翁七佛偈顏柳受鞭撻墨本舊已藏苔石
今一抹披尋榛莽中何處萬雷聒西偏沿礮屑引
溜來活活忽入青玉峽奇勝千山奪絕壁瀑花翻
箭急雪色潑潭曲神物蟠靜對戒嗔喝移情海岸
同衣袂露跳沫孤亭坐忘歸朝衫此回脫
月落潭上回入寺月仍見始知玉峽高直遮天之
半叶香臺敞宜步禪室靜堪戀老桂當簷盤美蔭
周一院雪公雪嶠大師遺額縣筆勢鍾張擅古秀奪華
亭洵足光紺殿解衣投繩床聲送莎鷄亂叶炎官
織未收經旬苦揮汗叶異哉今夕涼不待秋風薦

空山氣候殊即次眠食便曉起覓歸路不禁再三
歎叶茲山燦往牒雲岫夙健羨三日走山麓聊識
匡君面何當謝圭組千峰探欲徧拾松煮瀑水息
我雙翮倦捨舟復登舟惆悵猿就檻叶回頭眺黃
巖飛淙掛匹練

綿津山人詩集卷二十四終

蘇軾詩集卷二十四

蘇軾詩集卷二十四

蘇軾詩集卷二十四
蘇軾詩集卷二十四
蘇軾詩集卷二十四
蘇軾詩集卷二十四
蘇軾詩集卷二十四
蘇軾詩集卷二十四
蘇軾詩集卷二十四
蘇軾詩集卷二十四
蘇軾詩集卷二十四
蘇軾詩集卷二十四

商丘宋之南京也東都盛時由汴水浮舟達通津
門三百里而近車徒之擊互冠蓋之絡繹妖童光
妓自露臺瓦市而至樂府之流傳朝倚聲而夕勾
隊於照碧堂上蓋流風雖遠遺響宜有傳者故言
詞於汴宋若燕函秦廬夫人而能之者也然自金
源變而爲曲中州言韻者四聲乃去其一按以大
晟之律呂不能無誤生於是土者又必游覽四方
交友之往來審音於南北清濁之辨用心專一而
後可無憾焉理藩院判宋君牧仲倜儻好結客其
談論古今袞袞不倦至爲長短句虛懷討論一字

未安輒歷繙古人體製按其聲之清濁必盡善乃已故其所作成可上擬北宋雖東南以詞名者或有遜焉不觀夫函乎必先為容乃以制革權其上下旅衣之始可無斷至於廬摩鐱矣又置而搖之使其無蝟炙諸牆以眡其撓之均橫而搖之以眡其勁蓋專且審如是然後謂之國工則非燕秦夫人之所能然矣君之詞殆類是與秀水朱彝尊序

楓香詞目錄

天香

水龍吟

摸魚兒

齊天樂

二調

桂枝香

虞美人

永遇樂

調笑令

阮郎歸

唐多令

蝶戀花

綺羅香

魚遊春水

青玉案

送我入門來

醉太平

柳梢青

百字令

少年遊

三字令

越溪春

珍珠簾

采桑子

南浦

高陽臺

天香

木蘭

楓香詞

天香

商丘宋 犖牧仲

龍涎香

島嶼蟠沙煙波抱月潛虬吐沫如許斂自綃宮滴
同薇露萬里浮槎誰取博山小試似快剪雲英一
縷裊裊縈簾拂座悵望海天何處最憐空閨獨
炷對氤氲燕梁鶯戶漫倚銀篝聽盡夜深梅雨此
際相思不淺嘆荀令風流頓非故素被餘薰纏綿
未去

水龍吟

白蓮

田田漫舞銀塘魚牀捧出梨雲好新妝淡佇靜窺
湍瀨臨風窈窕翠羽低穿水萍斜壓數枝偏皎宛
湘妃獨立輕綃掩映明璫綴波光照 三十六陂
森森漸黃昏冰姿恁悄開宜玉井折應素手闌紅
都掃露冷纔香月明無影蕢花共老對鶴洲千朶
堪成雪賦向鄒枚道

鶴洲在梁園即鄒枚賦雪處

摸魚兒

蕙香萼

甚江東綠波無際柳湖風物尤美露葵生處春洲
遠翠葉紫莖鋪水輕摘起見說道參差荇菜渾難
比煙村小市算只有吳鮮依稀釵股好自伴菰米
秋風動有客天涯徙倚采芳曾作歸計當時但
爲鱸魚膾何事悵然如此誰鼓柁常是那香羹調
向蘆花裏樽前漫記與碧礪芹芽簾泉玉版瀟灑
共丰味

齊天樂

蟬

西園漸屆清商節疎林一聲淒切葉底潛流枝頭

乍送常向空庭紛聒齊姬恨結正無限傷心曉風
殘月寥落高天滿身涼露響還歇故園舊曾聽
處柴門間倚杖清韻飄忽翻入雲深傳來院靜不
數哀蛩啼鳩悲秋自說任南陌東城斜陽明滅更
憶閨中鬢絲真髮

桂枝香

蟹

江湖歲晚正水落空洲楓下高岸設斲平沙敗葦
燈光零亂輪囷乍向臨流得掩青筐霎時皆滿誰
憐攜去漁莊草舍清霜一片又早是重陽欸宴

嘆秋色殊佳籬金初徧幾處酒人對擘新橙同薦
老饕只愛持螯嚼想眉山曠懷如見還從醉後茶
烹石鼎恍窺雙眼

齊天樂

春日同諸公遊祖園分賦

柳煙如織綿初落好春尚留南郭野色分橋清陰
漲圃彷彿江鄉池閣碧莖吐萼更紅藥芽新紫藤
苞弱斜日溪亭半篙綠水燕低掠舊遊歲華已
遠賓朋仍此地共傾山酌扇底眉彎花間句麗多
少相思依約東風輕薄漸吹得羈人鬢絲非昨一

曲高歌醉中天作幕

虞美人

酒邊用吳凝父春色韻

橫波剪得吳江影髮覆螭蟻領文茵走上臉微紅
恰聽雛鶯羞澀哢東風輕盈擬倩遊絲惹留住
春光也暖香艷雪綺筵邊好個朦朧煙月斷腸天
永遇樂

柳絮和曹實菴

望去非花飄來疑雪輕狂如許未作浮萍已離深
樹此際誰爲主隋隄三月幾回翹首一片漫天飛

舞最堪憐無根無蒂總被東風弄汝 蹋歌魏女
離情多少問道春光何處乍撲空簾旋粘芳逕好
倩鶯銜取還思往日鵝黃初染變態頓分今古枉
垂着長條踈地縮伊不住

調笑令

任丘旅店有吳門怨婦題句自敘云妾白浣
月號蓮仿家住半塘勿失雙親寄養他姓姿
容略異慧業不同非敢擅秀閨中願效清風
林下豈意我生不辰所適非偶日彈琴而相
對百恨纏綿時捲幔以言征一詩哽咽余爰

題之驛亭人各憐之黃土可耳丙辰三月廿
日北上過此挑燈細讀感慨係之因隲括原
詩爲小令用貽好事云

吳宮春深怨別離風塵慘淡雙蛾眉鶻啼月落
寸腸斷香消芍藥空垂垂流黃未工機上織生
小殷勤弄文筆新詩和淚寫郵亭珍重寒宵誰
面壁

面壁淚痕濕想見含毫燈下立風鬟雨鬢吳宮隔
芍藥香消堪惜明妃遠嫁歸何日一曲琵琶悽惻
阮郎歸

聞畫眉聲和徐方虎用山谷韻

雕籠小鳥兩眉彎誰爲描遠山好音縹緲落簷前
空堂成碧山 低格磔碎閒關新聲李義山聽鷓
攜酒送春閒何時少室山

唐多令

偶憶

楊柳正如絲蟲蟲見客時愛房櫳乍出遲遲幾度
問年羞作答微笑道有娘知 不回首便天涯幽情
減牧之悵紅橋雲樹迷離應是尋春人去晚風雨
過綠陰滋

蝶戀花

送曹娥眉歸毘陵用王阮亭韻

溽暑長安榴吐纈客憶尊鱸不待清秋節座上高
談驚乍歇篋中留得文如雪折柳旗亭歌一闋
竟別東華人道真癡絕無限相思何日徹春申浦
上蘆花月

綺羅香

螢

借草生情因風弄影熠燿飄來何處箇箇輕盈點
綴秋光無數纔亂穿小幔疎櫺又暗照空墻廢圃

似從他狡獪天孫繁星灑作夜深雨佳人輕把
扇子撲取青苔砌上玉纖籠住淒切寒蛩妒殺流
輝遲暮怕燭至暫斂微明綴庭柯頓成珠樹最堪
憐數斛徵求遍山崑放去

隋煬帝徵求螢火數
斛夜遊遍放崑谷

魚遊春水

漫懷

蕃馬屏風小圍向洞房春正好鴛鴦飛起不道雲
深波杳映日曾憐杏蕊新籠煙還憶楊枝裊片月
常虧雙魚恁少遠道萋萋芳草天外山同眉黛
掃誰知孤客登臨總傷懷抱輕寒輕暝春歸久間

悶閒愁秋到早斷續哀蛩蕭疎叢篠

青玉案

余以楓香名詞漫賦

楓香橋是黃州路曾岸幘扶筇去一望霜天風景
暮空山流水白雲紅樹動我悲秋賦於今屢夢
高歌處聊取嘉名錫癡語蘭畹金荃休見妒花間
低按尊前輕度總愧江楓句宋高賓王詞名竹屋癡語
送我入門來

閨怨

翠浪翻帷紅綾燦枕燈花細落銀缸夜雨春風寂

冥掩蘭房吐絲妾似蠶眠箔奈化枳君同橘過江

此恨倩誰說與願逐晨風飛去遂到君傍水遠

山高雲樹但蒼茫鴛鴦幾見池中睡歎芍藥空飄

檻外香

醉太平

春閨用方虎偶作韻

花開亞枝鵲飛遶枝臨風偏惱萱枝道春歸有期

窗懸網絲琴間鳳絲傷心聊寫烏絲問人歸幾

時萱枝婢名

柳梢青

早春

何事淹留朝來春色又遍皇州綺陌燒燈鳳城挑
菜吹面風柔招尋漫逐鳴騶回首處傷心舊遊
燕子穿簾杏花倚檻小小紅樓

百字令

同王北山葉詠菴王阮亭過張晴峰寓齋聽

金山人彈琴

晴峰出藏
畫鑒定

消憂何處愛張融舟屋軒窗偏潤綠樹陰森新雨
後一架藤花爭發文酒移情雲煙過眼俯仰塵襟
豁枯桐掛壁鞠通

古琴內
蛀蟲名

隱隱曾齧

客有江左

風流郢中高調抱取金徽拂四座無言燈影靜清
響傳來超忽曲奏離騷腸迴冰炭宿鳥驚林樾嗒
然相對當簷飛出明月

少年遊

清明

禁煙時節好花開客思暗中催幾樹垂楊一庭芳
草小雨燕初迴春光記得江南早林際倒深杯
杏子衫輕藕絲裙軟游女踏青來

三字令

春夜雨

春正好雨絲絲濕花枝朱戶掩畫屏圍耐輕寒聽
細響夜何其三更後夢遲遲幾多思燈影澀漏
聲稀恨殘紅愁嫩綠曉來時

越溪春

賦得流水菼花色

灼灼花開溪水上天氣艷陽中斷橋野岸芳菲滿
把碧流染就嫣紅沙鳥驚波遊魚駭浪春到綃宮
木蘭艇趁東風好景武陵同最憐十里五里淺
瀨明霞一片輕籠漁父舊時應有恨捨棹去匆匆

珍珠簾

題陳其年詞集

蘇門曾說孫登嘯又何似仲舉清歌偏好一曲和
皆難聽餘音縹緲漫寫江南腸斷句又變作離奇
天矯高調是烏絲舊唱迦陵新草還憶往日風
流向旗亭畫壁雙鬟爭道廿載飄零剩髯霜多少
天子凌雲思賦手喜歲晚遭逢非小堪傲有牛腰
詞卷將人壓倒

采桑子

舟泊南康望廬山用錢介維韻

停帆舊是兵戈地寂寞城闌腸斷行人何處炊煙

一縷新 屏風九疊千霄立翠染波紋多謝匡君
雙劍峰高割曉雲

南浦

登滕王閣

高閣尚巋然背江城俯瞰東流朝暮雙槳遡波來
登臨好襟帶風煙無數斷霞縹緲孤飛猶是當年
驚潭影悠悠渾不定送盡幾番歌舞 最憐詞客
消沉有殘碑剝落半敲古礎勝地走戈鋌帆檣集
乍息一天輦鼓倚欄呼酒黃昏還聽濤聲怒歸去
篷窗明月上照我醉眠南浦

高陽臺

章江舟次讀玉田詞步集中韻

遠水拖藍晴峰送翠徐牽三板輕船野岸風箏撩
人恰是新年垂楊不負東君約裊鵝黃一色堪憐
更悠然幾處漁歌幾點村煙 家山回首斜陽外
但萋萋芳草森森長川十八灘遙舟人指向鷗邊
紅牙漫拍王孫句倚篷窗聊破愁眠莫垂簾尚有
江梅尚少啼鵲